

KA GEOGRAPHY

NA KA BYNTA
KI
SKUL PRIMARY
(KLAS I, II & III)

DA,
P. T. MARWEIN M.A., B.T.

All Rights Reserved

*Approved as Text Book for Classes I, II & III
by the Khasi Hills District Council*

1981

La pynmih da :—

I L. Ropmay, "Warphlang".
Garikhana Road, Shillong - 793002

Shithi No. DC. VI-5/PEB/1962/1979 dated Shillong, the 20th. Jan. 1981 na I Mr. H. S. Roy, Secretary, Khasi Hills District Council, Lower Primary Education Board ba la thoh sha I Mr. P.T. Marwein, M. A., B. T.

Da kane la bthah ia nga ban pyntip ia phi ba ka Khasi Hills District Council Lower Primary Education Board ka la pdiang ia ka Kot jong phi, ka Kot Geography na ka bynta ki Klas I, II & III ban pynrung ha ki Skul kiba hapoh ka jing-pyniaid ka Khasi Hills District Council.

First Edition 1981

KA GEOGRAPHY

NA KA BYNTA
KI
SKUL PRIMARY
(KLAS I, II & III)

DA
P. T. MARWEIN M.A., B.T.

All Rights Reserved

*Approved as Text Book for Classes I, II & III
by the Khasi Hills District Council.*

1981

La pynmih da :—

I L. Ropmay, "Warphlang",
Garikhana Road, Shillong - 793002

KI JINGKYNTHOH

Nga la pule ia ka kot Geography ba la thoh da I bah P. T. Marwein na ka bynta ki khynnah Lower Primary Schools. La shem ba ki jingshisha ba la buh hangto ki long kiba ryntuh bha kyrdan pa kyrdan. Kine ki iahap bha bad ka bor sngewthuh ki khynnah bad ki jingkylla jong ka por ha ka synshar khadar. La sei madan ruh shibun ki jingshisha kiba la kum iehnoh shrah baroh shi katta.

U Nongthoh u la ai ki jingtip kiba kyrpang kyrpang ia baroh ki distrik bad u la ai ruh ki jingtip kyllum ia ka Jylla Meghalaya bad ki Jylla Mihngi baroh ha ka rukom kaba shai bad kaba suk ban sngewthuh. Nga ngeit ba kane ka kot kan long ka jingmyntoi ym tang ia ki khynnah hynrei wat ia ki nonghikai ruh.

Shillong,
The 29th. Jan. 1981.

R. PASSA^H
Deputy Inspector of Schools,
East Khasi Hills, Shillong

Nga la pule ia kane ka Kot Geography kaba la pynkhreh na ka bynta ki khynnah ha ka Primary Stage. Kum uba la hikai teng ha kane ka subject nga dap da ka jingsngewnguh kaba khraw ia I Bah P.T. Marwein ba lyngba ka jingtrei shitom jong I, I la lah ban pynmih ia kane ka kot kaba long shisha ka jingmyntoi kaba khraw na ka bynta ki khynnah.

Ki Kot kiba bha ki long kita kiba lah ban ai ka jingtip kaba dei ia ki nongpule Kane ka long ha ki kyidan kiba pher kat kum ka rta bad ka bor sngewthuh. Nga sngewshlur ban ong ba kane ka kot kumba la thoh bad pynkhreh ka long kaba da iadei eh na ka bynta ki khynnah ha ka Primary School. Ngam artatien ruh ban ong ba kane ka Kot kan long ka jingshakri ka ban kham bha ia ki khynnah bad kumjuh ruh ia ki Nonghikai kiba don ha kylleng sawdong jong kane ka Ri Baleid jong ngi.

Mawlai, 24. 1. 1981.

S. D. BASAIAWMOIT,
S.I. of Schools, East Khasi
Hills, Shillong.

SHIKYNTIEN

La thoh ia kane ka Kot ryngkat bad ka jingpyrshang ban wan rah ia ka rukom hikai kaba mynta kat kum ka phang ba la ruid dak ha ka Syllabus. Phin shem shibun ki jingtip kiba thymmai bad ki jingpynbeit kat kum ki jingkylla jong ka por. La thoh ia ka ha kata ka rukom ba kan iarap ia ki nonghikai ruh.

Ngam lah khlem da pynpaw ia ka jingsngewnguh ia kiba bun ki rangbah kiba la iarap lem ha kaba ai jingtip bad ai jingmut shaphang ki jingshisha ba la buh hangne. Katto katne na ki ki long I bah J. Kharmih, F. Suchiang bad Pastor R.K. Chonga na ka bynta ka Jaintia Hills; Pastor Ollin Singh, G. R. Sanceley, Kong Battimon Tymphai na ka bynta ka East Khasi Hills; Pastor S. Wollington, T. Nongsiej, S.D. Marwein, Bah W.G. B. Marwein, H.S. Lyngdoh, Raisen Mawsor na ka bynta ka West Khasi Hills; Bah P. D. Shira, C.S. Momin bad Kong H. B. Sangma na ka bynta ka East bad West Garo Hills bad ia I bah B. M. Rodborne iba la iarap lem ha kaba pynbeit bad pynryntih ia ka. Nga sngewnguh eh ruh ia I Mr. R. K. Bora, Dy. Director, Land Records iba la iarap ban pynioh ia ki map jong ki distrik ka Jylla Meghalaya kham tam ha ka jingiadei bad u pud u sam. Ym shym la kynthup ha ki map ia ki jaka kiba dang don hapdeng ka jingiapynbeit.

Ngam lah khlem da pynpaw hangne ia ka jingsngewnguh ba kyrpang ia I bah S. G. Lyngdoh iba la pynshlur bad iarap lem ban pyndap bun ki jingtip hangne. Khadduh eh, ka jingsngewnguh kaba khraw tam jong nga ka leit sha ka District Council kaba la niewkor ia ka jingpyrshang barit jong nga ban wad ia kiei kiei kiba kham bha na ka bynta ka lawei ka jaitbynriew. Kin don lehse shibun ki jingbymbiang ha kane ka jingtrei. Ngan sngewnguh eh lada ki nongpule, kham tam ki nonghikai, kin sngewbha ban ai jingmut lem ha kaba pynbha ia kane ka Kot.

30-1-1981,

JINCKDEW

BYNTA I: KI JINGTIP BA NYNGKONG

Page

1.	U Briew bad ka Mariang	1
2.	Ka Phang	2
3.	Ka Ing ba ngi shong	4
4.	Ka Ing Skul	6
5.	Ka Shnong jong phi	8
6.	Ka Pyrthei	10
7.	Ki Dur ka Sla Khyndew	13
8.	Ki Saw Aiom	19
9.	Ka Lyer	20
10.	U Slap	22
11.	Ka Rep ka Rieng	24
12.	Ki Lynti Synkien	25
13.	Ka Map	27
14.	Ka Jingsynshar	30

BYNTA II : KI DISTRIK

1.	Ka East Khasi Hills	35
2.	Ka West Khasi Hills	57
3.	Ka Jaintia Hills	74
4.	Ka West Garo Hills	94
5.	Ka East Garo Hills	103

BYNTA III : KA MEGHALAYA

1.	Ki Jingt看 ba donkam	110
2.	Ka Jinglong ka Mariang	112
3.	Ki Briew bad ki kam jong ki	115
4.	Ki Jingthung Jingt看 bad ki Par	119
5.	Ki Lynti Synkien	122
6.	Ki Khlaw	124
7.	Ki Mrad khlaw bad ki Jingri	127

BYNTA IV : KA RI INDIA BAD KI JYLLA MIHNGI.

1.	Ki Jingt看 ba donkam	131
2.	Ki Jingmih bad Mar salan ba kongsan	134
3.	Ki Lynti Synkien	135
4.	Ki Jylla Shatei lam Mihngi..	136

Ki Jingtynbeit — Peit ka sop kaba shadien.

BYNTA I
KI JINGTIP BA NYNGKONG

LYNNONG 1
U BRIEW BAD KA MARIANG



1. Ka Mariang : Ka Mariang ka kynthup ia ka Khyndew, ka Um, ka Lyer bad ka Sngi bad baroh kiba don ha ki.

U Briew bad ka Khyndew : U briew u shong halor ka sla khyndew. U rep u riang, u ri jingri, u trei u ktah halor jong ka khnang ba un ioh bam ban im. Khlem ka khyndew u briew um lah ban im.

State Central Library
Government of Meghalaya
Shillong.

U Briew bad ka Um : Ki kynja baim baroh ha ka khyndew ki donkam ia ka um. U briew u pyndonkam ia ka ban dih, ban shet jingshet, bad ban sait ban khlieng. U pyndonkam ruh ia ka um na ka bynta ki jingthung jingtep jong u ha lyngkha.

U Briew bad ka Lyer : U briew bad ki kynja baim baroh kim lah ban im khlem ka lyer. U briew u ring bad pyrsad mynsiem da ka lyer. Nangta pat, ka lyer ka wan rah ha ngi ia u slap.

U Briew bad ka Sngi : Ka sngi ka don jngai bah na ngi. Ka ai ha ngi ia ka jingshai bad jingsyaid. Lada ym don jingshai bad jingsyaid yn ym don jingim ha kane ka pyrthei. Ki briew, ki mrad, ki dieng ki siej, bad ki kynja baim baroh kim lah ban im khlem ka sngi


2. Ka Geography (Jiokraphi) : Ka dei ka tnad jingstad kaba iarap ia ngi ban sngewthuh shaphang ka jingiadei u Briew bad ka Mariang.

LYNNONG 2

KA PHANG

1. Ka Phang : Ka long ka jingkdew ia kano kano ka bynta jong ka khyndew kaba don sawdong ia u briew. Ka lah ban long shakhmat, shadien, sha kadiang ne sha kamon jong u.

2. **Ki Phang ba kongsan:** Don saw tylli ki phang ba kongsan ha ka pyrthei. La khot ia ki ka MIHNGI, ka SEPNGI, ka SHATEI bad ka SHATHIE. Lada phi ieng ha kata ka rukom ba ka kti kamom jong phi ka phai shaphang ba mih ka sngi bad ka kti kadiang shaphang ba sep ka sngi phin ioh ia kitei ki phang kumne :—



Ka Phang Mihngi ka don sha kamom
 Ka Phang Sepngi ka don sha kadiang
 Ka Phang Shatei ka don sha khmat
 Ka Phang Shathie ka don shadien.

3. **Kiwei pat ki phang ba donkam :** Nalor kitei don ruh sa kiwei pat ki phang kiba ngi donkam ban tip :--

(a) Ka Phang SHATEI LAM MIHNGI ka don hapteng ka Shatei bad ka Mihngi.

(b) Ka Phang SHATEI LAM SEPNGI ka don hapteng ka Shatei bad ka Sepngi.

(k) Ka Phang SHATHIE LAM MIHNGI ka don hapteng ka Shathie bad ka Mihngi.

(d) Ka Phang SHATHIE LAM SEPNGI ka don hapteng ka Shathie bad ka Sepngi.



LYNNONG 3

KA IING BA NGI SHONG

1. **Ka Iing** : Ka Iing ka long ka jaka kaba u brierw u shna khnang na ka bynta ba un shong un sah.

2. **Ki Jait Iing** : Ia ki jait iing la tip bunsien na ki jingsop ba la tap ia ki. Don lai jait ki iing ba kongsan:—

(a). **Ki Iing Phlang ne Iing Tynriew** : La shna ia ki da ki dieng ne siej bad la sop da u phlang ne tynriew. (U tynriew u dei u jait sla ba ju tap iing ha ri war. Ia ki iing phlang la khot ruh ki iing traw).



(b) **Ki Iing Tin** : La shna da ki dieng sawdong bad lyntang bad la sop da ki tin.

(k) **Ki Iing dewbilat** : La shna ia ki da ka dewbilat bad la pynskhem da ki nar. Ia kine ki jait iing lah ban shna bun mala.

3. **Balei ngi shong ha ki iing :** Ngì ki briew ngi shong ha ki iing namar kine ki daw harum :—

- (a) Ban iada na u slap bad na ka lyer.
- (b) Ban iada na ka jingshit bad jingkhriat.
- (k) Ban iada na ka jingma jong ki mrad.
- (d) Ban iada na ki nongshun bad ki riewsniew.
- (e) Ban buh bad sumar ia ki jingdon jingem jong ngi.
- (g) Ban shet ban tiew bad ban bam ban dih.

4. **Ka jaka jong ka iing jong ngi :** Ka iing jong ngi ka don hapoh ka shnong. Ka shnong ka lah ban don khyndiat ne shibun ki iing ba shong ki briew.

5. **Ka Kper :** Sawdong ka iing ba ngi shong don ka kper kaba rit ne kaba heh. Ka kper ka long kaba myntoi shibun na ka bynta u briew. Ha ka ngi lah ban thung syntiew, thung jingthung bad ri jingri.

(a) **Ki Syntiew :** Baroh ngi icit ia ki syntiew. Ki syntiew ba ngi thung sawdong ka iing jong ngi ki pynitynnad ia ka iing ba ngi shong.

(b) **Ki Jingthung Jingtep :** Ha ki kper jong ngi ngi lah ban thung tyrso, kubi, sohbaingon, pudina, piat, phan, dieng soh bad bun kiwei kiwei.

(k) **Ki Jingri :** Don shibun ki briew kiba ri jingri ha ki kper jong ki kum ki syiar, ki sniang bad ki masi. Kine ki ai bun ki jingmyntoj ia u briew.

LYNNONG 4

KA IING SKUL

1. **Ka Iing Skul ha shnong jong phi :** Baroh ki shnong kiba kham heh ki don kawei ne bun ki iing skul. Ki iing skul ki dei ki jaka kiba ai jingstad ia ki bried.

2. **Ka jaka ban shna ia ka iing skul :** Bunsien la ju shna ia ki iing skul ha ki jaka ba kham long pdeng jong ka shnong ne ka dong. Kane ka pynsuk ia ki khyannah ban wan skul. Ka jaka ka dei ban long kaba pyngngad bad kaba rkhiang.

3. **Ka Dur jong ka iing skul :** Ki kamra jong ka iing skul ki dei ban ioh ka jingshai bad ka lyer kaba biang. Dei ban don shibun ki jingkhong iit. Lah ban shna ia ki iing skul ha kiba bun rukom. Don ki iing skul ba la shna beit lynter ha ka dur u I bad kiwei pat ha ka dur u T ne H.

4 **Ki Kamra jong ka Iing skul :** Ka skul ka dei ban don shibun ki kamra. Donkam ban don kawei ka kamra na ka bynta kawei ka Klas. Ha ki skul kiba kham heh don ki kamra kyrpang na ka bynta ki nonghikai, ka kamra buh kot (Library) bad kiwei.

5. **Ka jingheh jong ki Kamra Klas :** Ka kamra kaba biang ka dei ban ngiam kumba 30 ngut ki khyannah. Kata ka mut, dei ban don kumba phra tylli ki ben bad ki des

na ka bynta ki khynnah. Dei ruh ban don kawei ka Blak bord (Black Board), kawei ka miej bad kawei ka shuki na ka bynta u nonghikai.

6. **Ka Kyrting ka Skul jong phi :** Baroh ki skul ki don la ki kyrting. Ki kyrting ki iarap ia ngi ban pynia-pher ia kawei ka skul na kawei pat.

7. **Ka jingring dur ia ka iing skul ha ka Kotsada :** Haba ngi ring dur ia ka iing skul ha ka kotsada ngi hap ban pynrit ia ka dur jong ka kat kum ka jingheh ka kotsada. Ka jingring dur jong ngi kan long ha kata ka rukom ba ka jingthew kaba rit ha ka kotsada kan ieng na ka bynta ka jingthew kaba heh jong ka iing skul. Nuksa. Lada ka lynter jong ka iing skul ka don 10 metre lane 1000 centimetre bad phi pynrit ia ka tang 10 centimetre ha ka kotsada, kata ka mut, phi la pynrit ia ka tang shi bynta na ka shispah bynta. Phi ioh ia kane da kaba dibaid da u 10 cm ia u 1000 cm. Ia ka rukom pynrit kaba kum kane la khot ka Scale. Ban sngewthuh katno ngi la pynrit ia ka jingdro ne jingring dur jong ngi ngi ju thoh kumne : $1\text{ cm} = 1000\text{ cm}$. Kane ka mut ba ngi ring dur pynrit tang 1 cm ia ka jingrong kaba don 100 cm.

LYNNONG 5

KA SHNONG JONG PHI

1. **Ka Shnong :** Ia ka jaka ha kaba don khyndiat ne shibun ki iing ba shong ki briew la khot ka Shnong. Kawei pa kawei ka shnong ka don la kajong kajong ka kyrteng kum ka Shillong, Sohra, Mairang, Jowai, Nongstoin bad kiwei.

2. **Ka jaka ba don ka shnong jong phi:** Ka shnong jong phi bad kiwei pat ki shnong ki don hapoh ka distrik (district). Ki distrik pat ki don hapoh ka Jylla Meghalaya bad ka jylla Meghalaya ka don hapoh ka ri India. (Ki distrik, ki Jylla bad ki Ri ki long ki jingpynbynta ia ki jaka na ka bynta ka jingsynshar).

3. **Ka jait Shnong ba phi shong :** Don lai jait ki jait shnong ba kham kongsan :--

(1) **Ki Shnong Rep :** Kine ki dei ki shnong ha kiba don kham bun ki nongrep kum ka Sohryngkham, Pariong bad Shangpung.

(2) **Ki Shnong Trei kam :** Don bun ki shnong ha ki por mynta ba la pynlong da ka jingdon bad jingmih ki jait jingtrei kiba pher bapher. Ka shnong Barapani kaba don shaphang shatei na Shillong ka dei ka shnong trei kam kaba dang shu mih shen. Ka la mih naduh ba la

den ia ka wah Umiam·Khwān na ka bynta ban pynmih ding ilektrik.

(3) **Ki Shnong Khaii** : Kine ki dei ki shnong kiba ki nongshong shnong kiba khañ bun ki im na ka khaii ka pateng kum ka Sohra, Mawsynram, Mawkyrwat bad Dawki.

4. **Ki Jait shnong** : Ia ki shnong la pynbynta kyllum kumne :--

(a) **Nongrit ne Village** : Ka dei ka shnong kaba don duna 5000 ngut ki nongshong shnong ha ka.

(b) **Sor Rit ne Town** : Ka dei ka shnong kaba don hapdeng 5000 bad shi lak ngut ki nongshong shnong ha ka. Ka Shillong (lait noh ka jaka shong shipai), ka Jowai bad ka Tura ki dei ki Sor rit ha ka Jylla jong ngi.

(k) **Sor Bah ne City** : Ka dei ka shnong kaba don palat shi lak ngut ki nongshong shnong. Ka Sor bah Calcutta (Kalkaa) ka don palat 70 lak ki nongshong shnong.

(d) **Nongbah ne Capital** : Kane ka dei ka jait shnong ha kaba don ka bor synshar ba ha khlieh duh jong ka Jylla ne ka Ri. Ka Shillong ka dei ka nongbah jong ka jylla Meghalaya.

(e) **Headquarters** : Ka mut ka shnong ha kaba don kano kano ka ophis trei kam bad u khlieh duh jong ka ruh u shong hangta. Ka Headquarters ka lah ban long ka shnong kaba rit ne kaba heh.

LYNNONG 6

KA PYRTHEI

1. **Ka Pyrthei ha Suin Bneng :** Ka Suin bneng ne ka Haw Haw ka long kaba iar haduh katta katta. Haduh mynta ym pat don ba lah ban tip ia ka jingiar jong ka. Baroh ki khlur, u bnai bad ka sngi kiba phi iohi ki don ha Suin bneng. Ka Pyrthei ha kaba ngi Shong ruh ka don hæ Suin bneng kum ma ki.

2. **Ka dur :** Ka Sngi, u Bnai bad ki Khlur ki long kiba pyllun syriim ia ka Bol. Ka Pyrthei jong ngi ruh ka long kaba pyllun kum ma ki.

Ka Pyrthei ka long kaba heh haduh katta katta. Ki Lum Bah bad ki Them Bah baroh kiba don ha ka ki long syriim ia ka ktieh kaba bit ha ka bol ba ngi ialehkai. Ka jingrben jong ka ktieh ha ka bol kam lah ban pynkylla ia ka jingpyllun jong ka. Kumjuh ruh ki lum bah bad ki them bah ha ka pyrthei kim lah ban pynkylla ia ka jingpyllun jong ka.

3. **Ka Jingheh :** Ka Pyrthei ha kaba ngi shong ka long kaba heh bad kaba iar shibun. Ka iar kumba 39,840 kilomitara (kilometre) sawdong. Lada phi shong da ka kali kaba march 40 kilomitara shikynta, kan shim por ia phi 40 sngi ban iaaid tawiar sawdong jong ka khlem sangeh.

4. **Ka Khyndew bad ka Um :** Ia ka sla jong ka Pyrthei baroh kawei la tap da ka khyndew bad ka um. Palat ar bynta na ka lai bynta (71%) la tap da ka um bad duna shi bynta na ka lai bynta (29%) la tap da ka khyndew. Ia ka bynta jong ka khyndew ngi khot Ryngkew bad ia ka bynta jong ka um ngi khot Duriaw.

5. **Khyndew Bah ne Continent :** Ka long ka bynta jong ka khyndew kaba heh bad ba iar kaba don ha sla pyrthei. Don hynñiew tylli ki Continent ha ka Pyrthei. Kita ki long :—

- | | |
|-------------------|-------------------|
| (1) Asia | (5) South America |
| (2) Africa | (6) Australia |
| (3) Europe | (7) Antarctica |
| (4) North America | |

Ka Asia ka dei ka Continent kaba heh tam ha ka Pyrthei bad ka Australia pat ka dei ka Continent kaba rit tam ha ka Pyrthei.

6. **Duriaw Bah ne Ocean :** Ka dei ka bynta jong ka um kaba heh bad baiar kaba ialang shi jaka. Don tang saw tylli ki Duriaw Bah ha ka Pyrthei. Kita ki long—


- (1) Pacific Ocean.
- (2) Atlantic Ocean.
- (3) Indian Ocean
- (4) Arctic Ocean.

Ka Pacific Ocean ka dei ka Duriaw Bah kaba heh tam bad ba jyllew tam ha ka Pyrthei. Ka Arctic Ocean

pat ka dei ka Duriaw Bah kaba rit tam bad kaba khriat tam ha ka Pyrthei.

7. **Duriaw Khun ne Sea :** Ka dei ka byna kaba kham rit jong ka Duriaw Bah ne ka um kaba kham rit ban ia ka Duriaw bah kaba ialang shi jaka.

8. **Ka Globe :** Ka Pyrthei ka long kaba pyllun. Ka long kaba eh ban dro ia ka dur jong ka pyrthei kaba pyllun ha ka kotsada kaba madan. Namarkata, ia ka dur bashisha jong ka lah ban ring dur tang ha kaei kaei kaba pyllun kum ka Pyrthei hi. Ia ka dur jong ka Pyrthei ba la ring bad thaw dur ha kane ka rukom la khot ka Globe.




Ka Globe

LYNNONG 7

KI DUR KA SLA KHYNDEW

Ngi shem ba ka dur jong ka sla khyndew kam long kumjuh. Ha ka don ki lum, ki madan, ki them bad kiwei kiwei. Ka jingdon u slap, ka lyer, u jumai bad kiwei ki ju pynkylla ia ka dur jong ka man ka por. Ngin iapeit mynta ia ki katto katne ki dur kiba iapher jong ka.

A. **KI LUM**: Ha ka sla pyrthei don ki lum bah bad ki lum rit. Baroh ki lum ha ka ri jong ngi ki dei tang ki lum rit. Ia ka jingjrong jong kine ki lum la thew naduh ka sla duraw. Ki Lum ki don bun jait ha la ki jong ki jong ki dur. Ngin iapeit mynta ia ki katto katne ki dur jong ki.



Lum Rit ne Hill ka mut u lum uba rit bad uba lyngkot.

Lum Bah ne Mountain ka mut u lum uba heh, uba jrong bad uba iar.

Lynter Lum lane Range ne Chain ka mut ki lum bah ne lum rit kiba iasoh lang ter ter para lum.

Syntai Lum ne Kliar Lum lane Peak ne Summit ka mut ka khlieh ne kliar jong u lum bah ne lum rit.


Sawah Lum ne Saddle ka mut ka jaka kaba don hapteng ar tylli ki syntai lum kaba syriim ia ka jin kulai. La khoi ruh ka **Syngid Lum**.

Lum Lyndiang lane Tableland ne Plateau ka mut u lum ne lynter lum uba don ka madan ha kliar jong u kaba syriim ia ka miej.


Lum Mihding ne Volcano ka mut u lum uba pynmih ia ka ding, ka dpei, ka tdm bad ki kynja uba-um napoh khyndew.

Teng teng kine ki Lum Mihding ki bthei. Ka jing-bthei jong ki ka long kawei na ki daw jong ka jingkhyanhuh jumai. Baroh ki Lum Mihding ki don ka thliw hapteng jong ki kaba pyniasoh bad ka ramew. Ka jingdon ki Lum Mihding ka long kawei ka dak kaba pyni ba ka ramew jong ka pyrthei ka long kaba shit bad kaba khluid.

Lum Pynkhlad Um lane Watershed ne Waterparting : Ka mut u lum uba don hapteng ar-tylli ki them uba pynkhlad lynti ia ki Um ne Wah kiba mih na U bad kiba ia id mar la ka jong ka lynti.



B. KI WAH : Phi la ju iohi ia ka wah ? Ngim artation ba baroh phi la iohi ia ka wah kaba heh ne kaba rit. Ka wah ka tuid arsut shi arsut haduh ban da poi sha Duriaw. Ka Duriaw ka dei ka jaka ha kaba baroh ki um jong ka pyrthei ki ialang. Ia ka wah kaba heh la pynlong da kiba bun ki wah rit kiba tuid sha ka. Ka jingtuid jong ki wah ka thaw ne pynlong ia ki dur kiba pher ba-pher ha ka sla khyndew. Ngim iapeit mynta ia ki jait wah bad ia ki dur ba iapher iapher ba ki pynlong ha ka sla khyndew :--



Umpohliew ne Spring ka mut ka um kaba mih napoh khyndew.

Tlong Um ne Source ka mut ka jaka na kaba ka mih ka umpohliew.

Wah Rit ne Wah Duit lane Stream ne Rivulet ka mut ka wah kaba rit.

Wah Bah ne River ka mut ka wah kaba heh ba la pynlong da kiba bun ki wah rit.

Shnat Wah ne Tributary ka mut ka wah kaba kham rit kaba wan hap sha ka wah kaba kham heh.

Tnad Wah ne Branch ka mut ka wah kaba kham rit kaba pait pnat na ka wah heh bad kaba tuid sha la ka jong ka lynti.

Sdad ne Shka lane Junction ne Confluence ka mut ka jaka iashem jong ki ar tylli ki wah bah ne wah rit.

Lynghuh ne Basin ka mut ka bynta jong ka khyndew baroh kaba ai um ia kano kano ka wah bad ki shnat jong ka.

Umshit lane Hot Spring ka mut ka um kaba shit ne kaba thnam kaba mih napoh khyndew.

Khriang ne Cataract
 ka mut ka bynta jong ka
 wah kaba tuid stet lyngba
 jong ki maw ha ki sharing
 lum.

Kshaid ne Waterfall ka
 mut ka um kaba noh arsut
 na jrong u mawsiang.

Den Um ne Dam ka
 mut ka jingker na shiliang
 sha shiliang jong ka wah ban
 set ia ka um. Ia ka um ba
 la set ha kane ka rukom la
 ju rah sha ki jaka rep lang
 sha ki jaka ba lah ban ring
 ding ilektrik.




Ka kshaid

K. KIWEI PAT KI DUR

Pung ne Lake ka mut ka um kaba lang shi jaka ba
 la ker kut baroh sawdong da ka khyndew.

Pubon ne Cavern ka mut ka krem bah kaba don hapoh khyndew.

Mawjymbuin ne Stalactite ka mut ka jingat kaba lam pyllun jong u mawshun ne mawramsong kaba ju don bad sdien hapoh krem pubon.



Mawshylluit ne Stalacmite ka mut ka jingat kaba lam pyllun jong u mawramsong kaba don hamar pyrshah jong u mawjymbuin.


Ki mawjymbuin bad ki mawshylluit ki nang san bad nang heh man ka por katba ka um ka dang hap lyngba jong ki.

Them ne Valley ka mut ka jaka them kaba don hapdeng ar tylli ki lynter lum. Ngi ju shem ba ka wah ka tuid lyngba jong ka. Bunsien ki them ki don ha ka dur u V.



Lhuh ne Gorge ka mut ka jaka them kaba don ka jingnoh kaba kynsan jong ki ar ne bun tylli ki lum. Bunsien ngi shem ba ka wah ka tuid napdeng jong ka Lhuh.

Ka jingdon jong ki them bad ki lhuh ka long namar ba ki wah bad ka um slap ki khleng ia ka khyndew ha kito ki jaka lyngba bun ki snem tad haduh ban da iakynduh mawsiang.



Riat Bah ne Precipice ka mut ka jingnoh kynsan jong u lum ne mawsiang sha them.

Ri Shyiap ne Desert ka mut ka jaka ka bym don jingthung jingtep kiba mih ha ka.

Madan Bah ne Ri Thor lane Plain ka mut ka jaka madan kaba heh bad ba-iar Ngi shait shem ia ki harud ki wah bah.

LYNNONG 8

KI SAW AIOM

Don saw tylli ki por ba iapher ha ka shi snem ba ngi khot ki Aiom. Kita ki long ka Pyrem, ka Lyiur, ka Synrai bad ka Tlang.

1. **Ka Pyrem ne Spring :** Ka dei ka aiom thung bad u slap u sdang ban hap. Ka dei ruh ka aiom ba ki sdang ban mih lung ki jingthung jingtep. Ka bneng ka pyngngad bha ha kane ka aiom. Ngi ioh ia ka naduh shiteng u bnai Lber (March) haduh shiteng u Jylliew (June).

2. **Ka Lyiur ne Summer :** Kane ka dei ka aiom slap. Ki jingthung jingtep ki jyrngam bha ha kane ka por. Ka sngi ka shit kham tam ha bym don slap. Ka miet ka lyngkot bad ka sngi ka jrong. Kane ka aiom ka sdang naduh shiteng u Jylliew haduh shiteng u Nailur (September).

3. **Ka Synrai ne Autumn :** Ka dei ka aiom ot bad lum. U slap u la duna ha kane ka por. Ka dei ka aiom kaba pyngngad shibun. Ngi ioh ia ka naduh shiteng u Nailur haduh shiteng u Nohprah (December)

4. **Ka Tlang ne Winter :** Ka dei ka aiom kaba khria tam bad kaba duna slap tam jong ka snem. Ka miet ka jrong bha bad ka sngi ka lyngkot. Bun na ki jingthung jingtep ki shong thait ha kane ka por. Ngi ioh ia ka naduh shiteng u Nohprah haduh shiteng u Lber.

Ia ki jingpule kiba kham bniah shaphang ki aiom ngin sa pulc ha ki klas kiba kham shaneng.

LYNNONG 9

KA LYER



1. **Ka Jingdon ka Lyer :** Sawdong jong ngi don ka lyer. Ka lyer ka don ha ki jaka baroh jong ka sla khyndew Ngim lah ban iohi ia ka lyer. Ngi iohi ia ka tang haba ka pynkhih ia ki sla dieng bad ia ki phlang. Ka lyer kaba

jur ka lah ban pynkhyllern ia ki dieng bah bad ka lah ban rat wat ia ki iing ki sem ruh. Ngi lah ban iohsngew ia ka lyer haba ka beh hyurei ngim lah ban iohi ia ka.

2. **Ka Lyer shit bad ka Lyer khriat :** Don ka lyer kaba khriat bad don ka lyer kaba shit. Haba ka lyer ka khriat ngi sngew khriat bad haba ka lyer ka shit ngi ruh ngi sngew shit.

3. **Ka Jingkhih bad Jingbeh jong ka Lyer :** Ka lyer kam ju neh ha kajuha jaka. Kham bunsien ka beh na ki jaka kiba khriat sha ki jaka kiba kham shit.

4. **Ka Lyer Duriaw ne Sea Breeze :** Ia ka lyer kaba beh na duriaw sha ryngkew la khot ka Lyer duriaw ne Sea Breeze. Kane ka shait beh ha ka por mynsngi. Ia ka kyrteng jong ka lyer la ju tip borabor na ka phang ba ka wan.




5. **Ka Lyer Ryngkew ne Land Breeze :** Ia ka Lyer kaba beh na ryngkew sha duriaw la khot Lyer Ryngkew ne Land Breeze. Kane ka lyer ka shait beh ha ka por mynmiet.

6. **Ki Jingmyntoi na ka Lyer:** (1) Ka lyer ka ai jingim ia u briew. (2) Ka Lyer ka wan rah ha ngi ia u slap. (3) Ka lyer ka pynpyngad ia ngi ha ka por shit.

7. **Ki Jingsniew na ka Lyer:** (1) Ka lyer bah ka pynjot ia ki iing ki sem, ka pynkhyllern ia ki dieng ki siej bad kiwei kiwei. (2) Ka Lyer kaba beh ha ka por ba duna um ka nang pynrit ia ki um. (3) Ka Lyer kaba jur ka pynsniew ia ki jingthung jingtep.

LYNNONG 10

U SLAP



1. **U Slap** u dei ki jingjaw um kiba rit kiba hap na suin bneng halor ka sla khyndew. Ia u slap ngi ioh na u lyoh ba la wan kit da ka lyer.

2. **Ka jingpynlong ia u Lyoh:** Ka jain kaba jhieh ka rkhiang noh hadien katto katne por ba ngi thad ia ka. Balei? Ka um kaba don ha ka ka kylla jynhaw um noh da ka jingshit jong ka sngi. Ha kajuha ka rukom, ka sngi

ka kjiit bad pynkylla jynhaw um man ka sngi ia ki um jong ki duriaw bad ki wah. Kine ki jynhaw um ki long ki symboh um kiba rit bha. Haba kine ki jynhaw um ki ialang ha kajuh ka jaka ki paw ha ngi ha ka dur jong u lyoh

3. **Ka Jingkylla slap u Lyoh :** Shim ia ka iit kaba khriat bad jynhaw ha ka da ka shyntur jong phi. Phin shem ba kato ka iit ka don ka dak jhieh ha ka. Kane ka jingjhieh jong ka iit ka pyni ba ka jynhaw um kaba mih lyngba ka shyntur jong phi ka kylla um noh haba ka iakynduh bad ka iit kaba khriat. Ha kajuh ka rukom, haba u lyoh u kiew shajrong u iakynduh ia ki lyer khriat halor ki lum. Une u lyoh u kylla um noh bad u hap ha ka sla khyndew ha ka dur jong u slap. U lyoh um lah ben kylla slap khlem da ia tyngkhuh bad ki lyer khriat ne ki lum khriat.

4. **Ka Lyer Slap :** Ia u slap la pynlong na u lyoh. Ia u lyoh pat la wan kit da ka lyer naduh duriaw. Ia kane ka lyer kaba wan rah ia u lyoh la khot ka Lyer Slap.

5. **Ki Jingmyntoi ba ngi ioh na u slap :**

(1) U slap u pynioh ha ngi ia ka um ban dih. U ai um ia ki mrad bad ia ki jingthung jingtep baroh ha ka ka sla khyndew. Lada u slap um don, ki jingthung jingtep kin ym lah ban mih bad ka khyndew kan kylla long ka ri shyiap.

(2) U slap u pynkhuid ia ki jakhlia kiba don ha suin bneng bad ha sla khyndew.

(3) U slap u pynlong ia ki umpohliew bad ki umpohliew ki ai um ia ki wah bad ki kshaid baroh shisnem.

6. Ki Jingsniew na u slap

(1) U slap u kit noh ia ka sboh jong ka khynde w

(2) Haba jur u slap, ka khyndew ka lah ban twa bad ka pynjot ia ki jingthung jingtep.

(3) U slap u pynwit ia ka jingtrei jingtah jong ki briew.

(4) U slap uba jur u lah ban wan rah ia ka jingshleu um. Bun bah ki briew ha ri Thor ki im jynjar bha na ki jingshleu um bad don ruh kiba iap.

LYNNONG 11

KA REP KA RIANG

1. **Ka jingsdang jong ka rep :** Mynhyndai eh ki briew ki im syriim ia ki mrad. Ki pynkdang ia lade da ki kynia soh, phan khlaw, doh mrad bad kiwei kiwei. Ha kane ka rukom ka bam jong ki kam ju thikna. Suki suki ki sdang ioh buit kumno ban rep, ban ri jingri, ban shna jingshna bad kumta ter ter. Naduh ba ki briew ki sdang ban rep ki sa ioh ia ka bam kaba thikna.

2. **Ki Jait Jingthung :** Don bun bah ki jait jingthung ba ki briew ki thung ha ki por mynta nador ki mar bam. Ia ki jingmih na ki jingthung lah ban bam hi ne ban die. Ki jingthung ba kham kongsan ha ka ri jong ngi ki long u kba, u phan, u riwhadem, u phankaro, ka kait, ki soh babun jait, kwai, tympew, sohmrit bad kiwei kiwei.

3. **Ki jaka rep :** Ki jingthung baroh kim ju mih kulmar. Uwei pa uwei u jingthung u mih tang ha ka jaka kaba iadei bad u Ki jingthung baroh ki donkam ia ka um, ka sboh bad la jingshit jingkhriat. Don ki jingthung kiba donkam shibun ka um don ruh kiba donkam khyndiat ka um. Don pat kiba donkam shibun ka sboh kaba kiwei pat ki donkam tang khyndiat ka sboh. Nangta don sa kiwei pat kiba mih tang ha ki jaka khriat katba kiwei pat ki mih tang ha ki jaka shit.

Ngi lah ban pynbynta kyllum ia ki jingthung ha ka ri jong ngi ha ki ar bynta :—

(1) **Ki Jingthung ha ki jaka shit :** Kine ki kynthup ia ki jingthung kum u kba, phan, riewhadem, kwai, tynpew, sohmrit khlaw ne tipui, sohmrit, kait, phandieng, phankaro, sohmynken, kynphad, sainalia, lasi ne latyrpad bad ki jait soh babun jait.

(2) **Ki Jingthung ha ki jaka khriat :** Kine ki kynthup ia ki jait jingthung kum u kba, phan myngngor, riewhadem, sohphlang, sohphoh, sohplom, bad bun kiwei kiwei.

LYNNONG 12

KI LYNTI SYNKIEN

1. **Ka Jingdonkam ki Lynti Syngkien :** Baroh ki briew ki donkam ban leit jingleit. Don kiba leit sha skul, sha iing ki paralok, sha lyngkia, sha iew ne sha kiwei kiwei ki shnong kiba don hajan ne ha jngai. Baroh ki briew kiba leit jingleit ki dei ban iaid na ka lynti. Kane ka lynti ka ialam ia ki sha ka jaka kaba ki thmu ban leit.

2. **Ki Jait Lynti :** Mynhyndai ki brierw ki leit jing-leit tang da ka kjat. Teng teng ki shong da u kulai ne hati. Kham hadien pat ki iaia da ki kali kulai. Katba ki brierw ki nang stad ki nang shem ki lad kiba pher qapher ban pyndonkam ha kaba leit jingleit. Ngi ioh mynta ki kali motor, ki rel, ki jhad, ki eroplein ne lieng-suin. Kine ki lad ki lah ban pynpoi kham kloia ki brierw sha ki jaka ba ki kwah leit. Nangta ki lah ruh ban kit ia kino kino ki jingkit kiba ki brierw kim lah ban kit. Ia ki lynti synkien ngi lah ban pyniabynta kumne harum :-

(1) **Lynti iaia kjat :** Kine ki kynthup ia ki lynti shnong, ki lynti bri, ki lynti iew lynti hat, ki lynti na kawei ka shnong sha kawei pat ka shnong. La shna ia ki tang ban bit ban iaia ki brierw.

(2) **Surok kali :** Kine ki dei ki lynti ba la shna konang ban iaia ki kali motor kam ki bus, ki trok, ki taksi bad kiwei. Ia ka jaka sangheh kali la khot Steshon (Station). Ki surok ki lah ban long ki Surok Bah ne ki Surok Rit. Ki Surok Rit ki long bunsien tang ki tnad jong ki Surok Bah.

(3) **Lynti Rel :** Ki Lynti rel ki iapher na ki surok Kali. La shna ia ki da ki ar'tylli ki nar kiba ia iaia ryngkat ryngkat na kawei ka jaka sha kawei ka jaka. Dei halor kine ki nar ba ki rel baroh ki iaia. Ki rel ki long kiba jrong bha bad ka lynti jong ki ka kham beit shibun ban ia ki surok kali. Ia ki jaka sangheh rel la khot Steshon Rel (Railway Station).

(4) **Lynti Jhad ne Lieng :** Ki lieng bad ki jhad ki iaia halor ka um. Ki lieng ki kham iaia ha ki wah katba ki jhad pat ki kham iaia ha ki Duriaw. Ia ki lynti jong

ki lieng ne jhad ym donkam ban shna. Ka jingleit da ka lieng ne jhad ka long ka lad kaba tad tam na ki rukom jingleit lynti baroh. Ia ka jaka sangeh lieng ne jhad ki khot ka kadlieng ne harbour (harbor).

(5) **Lynti Eroplein ne Liengsuin :** Ki eroplein ki her na suin. Lehse baroh phi la iohi kumno ka eroplein ka her. Shiwa ba ki eroplein kin her ki donkam ban da march shiwa katto katne ka jingjingai ha khyndew. Kurnjuh ruh haba ki hiar na suin ki dei ban da march shiwa katto katne ha khyndew shiwa ba kin sangeh. Ia kane ka jaka na kaba ki eroplein ki kiew ne ki hiar la khot ki erodrom (aerodrome) ne Jaka sangeh Eroplein. Ka jingleit lynti da ka eroplein ka long kaba stei tam bad kaba rem dor tam ha ka por mynta.

3. **Ki Jingkieng :** Ki long ki jingpun lynti na shiliang sha shiliang jong ka wah khnang ba ki briew, ki kali motor, ki rel kin laid. Lah ban shna ia ki da ki dieng ne ki nar kiba skhem bha. Ha ki chain ri war don ki jingkieng laid briew ba la pun da ki thri ne ki siej. Ki long kiba bynnad bad kiba ima ruh. Don kiwei pat ki jingkieng ba la shna da ki thied jong ki dieng jri.

LYNNONG 13

KA MAP

1. Kaci ka Map ?

Ka Map ka dei ka jingring dur u briew ia ka pyrthei ne ia kano kano ka bynta jong ka ha ka kotsada. Hadien kane ka jingring dur lah ban pyni ia ka jingdon jong kano

kano ka jaka ha ka map kum ka shnong, ka wah, ka surok, u lum, ka jaka rep, ka jaka ba don nar bad kumta ter ter.

2. **Ki Jait Map :** Don ar tylli ki jait map ba xham kongsan. Kawei ka long ka Physical (phisikal) Map ha kaba la pyini ia ka dur jong ka mariang kum ki lum, ki madan bad kiwei. Ia kawei pat ngi khot Political (politik) map. Kane ka jait map ka pyini ha ngi ia ki bynta jong ka khyndew kat kum ka rukom synshar khadar kaba don ha kata ka jaka kum ka East Khasi Hills, West Khasi Hills bad kumta ter ter. Lah ruh ban pyini lang ia kitei ki jait map baroh ar tang ha kawei ka map

3 Ki Jingmyntoi na ka map :

(1) Ka map ka iarap ia ngi ban tip bad sngewthuh shai shaphang kano kano ka bynta jong ka khyndew kaba ki kmat jong ngi kim lah ban kot kum ki lum ki wah, ki shnong ki thaw, bad kumta ter ter.


(2) Ka map ka iarap ia ngi ban sngewthuh bad tip ia ki phang jong ki jaka baroh ha ka sla khyndew.

(3) Ka map ka iarap ia ngi ban tip ia ka jingshit ne jingkhriat jong ka jaka.

4. **Ka Skel (Scale) ne Jingthew :** Ia ka jingngai jong ki jaka ka khyndew ba ngi ring dur la dei ban pynrit kat kum ka jingrit ne jingheh jong ka kotsada. Ngil leh ia kane ha kajuh ka rukom ba ngi leh ia ka iing skul. Nuksa. Ia ka jaka kaba jngai 5 KM (Kilometre) lah ban ring dur tang 5 cm (centimetre) da kaba mut dur ba 1 cm = 1 Km. lane 1 cm = 1,00,000 cm. Ha kajuh ka rukom la ju buh

ruh tang kumne : 1 : 1,00,000 kaba mut, shi bynta ka iaryngkat bad shi lak bynta. Ia ka map kaba don ka jingthaw kaba kum kane la khot ka **scaled map**. Ia ka map pat ba la shu ring dur khlem da don ka jingthaw kaba kum kane la khot sketch map.

5. **Ka Phang ne Direction** : Haba ring dur ia ka map dei ban pyni ia ka phang ba ka map jong phi ka phai ha ka kotsada. Kham bunsien ia ki map la pyni ba ki phai shaphang shatei. Ka phang kamon ka dei ka nihngi, ka phang kadiang ka dei ka Sepngi bad ka phang kaba sharum ka dei ka Shathie. Ia kine ki phang la ju pyni harud jong ka map da kaba buh ar tylli ki lain kiba iapom uwei ia uwei pat. Teng teng pat la pyni tang da uwei u lain ia ka phang ba shatei. Peit ia ki nuksa harum :



5. **Ki Pud Sawdong** : Kine ki dei ki jaka kiba don markhap sawdong ka map ba phi dro. Nuksa, Ki shnong kiba don sawdong ka shnong jong phi ki dei ki Pud sawdong ka shnong jong phi. Jer kyrteng ia ki pud sawdong ka shnong

jong phi. Lada ka dei ka bri jong phi, ki bri baroh kiba don markhap bad ka bri jong phi ki dei ki Pud sawdong jong ka bri jong phi. Ha kajuh ka rukom, ia ki map baroh ba ngi dro, la ka long ka hima Syiem, ne ka distrik ne ka Jylla ne ka Ri ngi dei ban da ai ia ki Pud sawdong jong ka.

6. **Ki Dak ne Jingbatai ia ka Map :** Ngim lah ban sngewthuh ia ka map lynda don ki jingbatai shaphang jong ka. Haba ngi dei ban pyni ia ka jaka ba ki don ki lum, ki wah, ki shnong, ki surok bad kiwei ngim lah ban buh da u lum ne ka shnong ha ka map. Ki don ki dak ba ngi buh kiba jeng na ka bynta jong ki. Ia kine ki dak dei ban da don ka jingbatai ia ka jingmut jong ki. Nuksa, Ka Shnong—●. U Lum—△. Ka Surok—=— bad kumta ter ter.

LYNNONG 14

KA JINGSYNSHAR

1. **Ka Jingsynshar ha ki Shnong :** Kawei pa kawei ka shnong ka don la ki nongsynshar. Kine ki peit ba ka shnong ka thaw kan shong suk shong sain bad kan leid beit laid ryntih

2. **Ka Jingsynshar ha ri India :** Ha ki por mynshiwa ka jingsynshar ia ki shnong ka hap hapoh ka jingpeit jong ki Syiem, ki Lyngdoh, ki Sordar, ki Wahadadar, Ki Doloi, bad ki Nokma. Mynta ia ka jingsynshar ba hakhlich duh la shimti da ka Sorkar India. U President u dei u nongsynshar ba hakhlich duh jong ka.

3. **Ka Jingsynshar ha ki Jylla :** Ia ka ri India la phiah sha ki 22 tylli ki Jylla ne State bad 9 tylli ki Jylla

Rit ne Union Territory. U khlieh duh jong ka jingsynshar ha ki Jylla u dei u Lat ne Governor. U khlieh duh ha ki Jylla Rit pat u long u Lat Khynnah ne Lieutenant Governor. Kine baroh ar ngut ki long ki nongmih khmat jong u President ka ri India. Ka Meghalaya ka long kawei na kitei ki 22 tylli ki Jylla.

4. Ka Jingphiah ia ka jingsynshar ha ki Jylla : Ia ka Jylla la phiah sha ki Distrik ; ia ka distrik la phiah sha ki Sub-division bad ia ka Subdivision pat la phiah teng teng sha ki Administrative Unit.

5. Ki Community Development Block : Ia kine la khot lyngkot ki Blok. Ki Blok ki don ha kylleng ka ri ha ki dong kiba dang kham sehdiem. Ka kam jong ki ka long ban iarap lan kyntiew ia ki briew ha ka jingnang jingstad, ka ioh ka kot, ka imlang ka sah lang, bad ki lynti syngkien. U khlieh jong ka Blok u dei u Block Development Officer ha la khot lyngkot u B.D.O.

6. Ka District Council bad ki Nongsynshar trai ri : Ka Sorkar India ka la plie lad sa kawei ka kyndon synshar kaba iadei tang bad ki riwulum. Ia kane la khot ka Autonomous District Council. Ka kam ba kongsan jong ka ka long ban peit bad iada ia ki hok bad ki riti ki dustur jong ki Riwulum. La ai bor ia ka ban peit ia ka thoh ka pule ha ki skul rit, ki khlew ki btab, ki iew ki hat, ka khaii ka pateng, ki ain ki dustur jong la ka jaitbynriew bad kiwei kiwei. La ai ruh ha ka ia ka bor ban peit ia ki nongsynshar trai ri kum ki Syiem, ki Lyngdoh, ki Sirdar, ki Wahadadar ha ri Khasi ; ki Doloï bad Sirdar ha ri Jaintia ; ki Nokma bad ki Laskar ha ri Garo. Ha ka Jylla jong ngi don lai tylli ki District Council kumne :—

(1) Khasi Hills District Council kaba kynthup ia ka East bad West Khasi Hills distrik.

(2) Jaintia Hills District Council kaba kynthup ia ka Jaintia Hills distrik.

(3) Garo Hills District Council kaba kynthup ia ka East bad West Garo Hills distrik.

Note : Ka kyrteng bapura jong ka District Council ka long Autonomous District Council.

KI JINGKYLLI :

1. Kaei ka mariang ? Balei ngi dei ban pule shaphang jong ka ?
2. Kaei ka Geography ?
3. Haba u briew u phai khmat shaphang shathie, kiei ki phang kiba don shaphang kamon bad shaphang kadiang jong u ?
4. Baiei ngi donkam ia ki iing ?
5. Iathuh ia ki jingmyntoi ba lah ban ich na ka kper jong phi ?
6. Haei don ka skul jong phi ? Jer kyrteng ia ki jaka baroh kiha don sawdong jong ka.
7. Kaei ka jait hnong ba phi shong ? Kaei ka jingia-pher hapheng ka town bad city ?
8. Kaei ka dur jong ka pyrthei ? Kaei ka jing'adei hapheng ka Pyrthei bad ka Sngi ?
9. Jer kyrteng ia ki Khyndew Bah bad ia ki Duriaw Bah ka pyrthei. Kaei ka duriaw kaba heh tam ha ka pyrthei ?

10. Batai ia kine da dro bad ki dur :-- Syntai um ; lum mihding ; shnei wah ; them ; pubon.
11. Pyniapher ia kine :-- ka lyiar bad ka tlang ; ka Synrai bad ka Pyrem.
12. Kaci ka kyrteng jong ka lyer kaba beh na duriaw sha ryngkew ? Iathuh ia ki jingmyatoi ba ngi ioh na ka lyer.
13. Uei u slap ? Kumno ngi ioh ia u slap ? Kiei ki jing-sniew ba ngi ioh na u slap ?
14. Jer kyrteng ia ki jait jingrep kiba don na ki jaka shit bad ki jaka khriat.
15. Jer kyrteng ia ki jait lynti baroh ba phi tip. Batai kumno la shna ia ki lynti rel.
16. Kaei ka map ? Balei ngi donkam ia ka ?
17. Jied ia ka jubab kaba dei :--
 - (a) Ia ka phang handeng ka mihngi bad ka shatei la khot shaphang (i) mihngi lam shatei (ii) shathie lam sepngi (iii) shatei lam mihngi.
 - (b) Ka kper ka don (i) hajan iing ba ngi shong (ii) ha lum ba rep nhun ne kba (ii) harud shuong.
 - (c) Ka kamra skul kaba biang ka dei ban ngiam kumba (i) 20 ngut (ii) 25 ngut (iii) 30 ngut.
 - (d) Ka Globe ka dei (i) ka pyrthei (ii) ka dur jong ka pyrthei (iii) ka dur jong ka bol.
 - (e) U lyoh u kylla slap hadien ba la iakynduh ia (i) ki lyer kiba dur pyrshah (ii) ka lyer khfluid (iii) ki lum khriat.
18. Pyndap ia ki dak kiba duna :--
 ta..lel..nd ; ..ol..ano ; so..re.. ; I..lan.. ;
 Jun..t..on ; wa..er..all ; s..ala..ite.

19. Pynbeit ia ki jingspel dak ba bakla :--
 Mauntein; pletaeu; watarshet; streem; gorje;
 valey ; plein.
20. Pyndap ia ki jaka ba suda :--
- (a) Ia ka jaka jong ka khyndew bym lah banthung
 jingthung la khot....
 - (b) Ia ka lyer kaba beh na ryngkew sha duriaw la
 knot ka.....
 - (k) U sohphoh u mih bha ha ki jaka.....
 - (d) Ia ka map ba la dro khlem jingthew la khot....
 - (e) Don....tylli ki Jylla bad....Jylla rit ha ri India.
21. Pynbeit ia ki jingong ba bakla :--
- (a) Ka tnad wah ka leit hap sha ka wah bah.
 - (b) Ia ki dieng kwai la thung ha ki jaka khriat.
 - (k) Ki rel ki izid ha surok kum ki kali.
 - (d) Ka Khasi Hills district Council ka kynthup ia
 ka East Khasi Hills, West Khasi Hills bad
 Jaintia Hills distrik.
 - (e) U nongsynshar ba ha khlieh duh jong ka ri
 India u dei u Lat ne Governor.
-

BYNTA II**A. EAST KHASI HILLS****1. Ki Pud Sawdong :**

Shatei	..	Distrik Kamrup bad Nowgong (Assam)
Mihngi	..	Distrik Karbi Anglong (Assam) bad Jaintia Hills
Shathic	..	Bangla Desh
Sepngi	..	Distrik West Khasi Hills

2. Ka Rukom Synshar : U Deputy Commissioner u dei u khlieh jong ka distrik. Ka Shillong ka dei ka shnong ha kaba den ka ophis trei kam jong u. Ia ka distrik la phiah sha ki ar tylli ki Subdivision kumne :—

Sub-Division	Ophis trei kam (Headquarters)
Shillong	.. Shillong
Ri Bhoi	.. Nongpoh

Hapoh ka Shillong Sub-division ka don ka Cherra Administrative Unit. Ka Ophis trei kam jong ka ka don ha Sohra (Cherrapunji)

3. Ki Bynta ba Kongsan ka Mariang : Don lai tylli ki bynta ba kongsan jong ka distrik kat kum ka jinglong ka mariang

(1) Ri War : Ka don shaphang shathic ka distrik. La khot Ri War ia ki jaka pynnoh ri lun baroh haduh khap Bangla Desh

Don bun ki ryndan lum na kiba lah ban iohi ia ka Madan Bah jong ka Bangla Desh. Kane ka bynta ka dap da ki them, ki lhuh bad ki riat. Don saw tylli ki Lhuh ba kongsan hangne (a) Ka Lhuh jong ka wah Khasimara ha ki thain Warding (b) Ka Lhuh jong ka wah Bakra ne Umiew ha ki thain Shella (k) Ka Lhuh jong ka wah Umnub ha ki thain Sohra bad (d) Ka Lhuh jong ka wah Umingot bad Umsong ha ki thain Nongryngkoh bad Langkyrdem

(2) **Ri Lum Pdeng :** Ka kynthup ia u lynter lum ka distrik naduh mihngi haduh sepngi. Ka dei ka bynta kaba jrong tam hapoh ka Jylla. U Lum Shillong u don ha kane ka bynta.

(3) **Ri Bhoi :** Ka don shaphang shatei jong ka distrik Ka kynthup ia ki sharing lum baroh naduh kjat ki Lum Pdeng haduh khap Kamrup bad Nowgong. Ki lum ki noh padun suki suki haduh ban da poi sha ri dkhar.

4. **Ka Suin Bneng :** Ka distrik ka ioh ia u slap uba jur tam ha ka pyrthei. U slap u wan ha ka por lyiur. Ki lyer slap ki wan beh na shaphang shathie lam sepngi. Ka Sohra (Cherrapunji) bad Mawsynram kiba don shaphang shathie ki ioh ia u slap uba jur tam ha ka pyrthei. U Slap ha ki thain Langkyrdem bad Pynursla ruh u jur bha.

Ka por tlang ka khriat bha ha ki thain ri Lum Pdeng. U thah u hap kumba ar bad lai bnai ha ka shi snem Ha ri War bad ri Bhoi ruh ka khriat tangba ym don thah.

Ka por pyrem bad synrai ki long ki por ba pyung-
ngad tam jong ka snem

5 Ki Lum ne Syntai Lum ba kongsan : Don shibun
ki syntai lum ha kylleng ka distrik. Shibun na ki ki don
ruh bad ki khana pateng kiba sngewtynnad shibun. Ngi
dei ban kynmaw ba ia ka jingjrong jong ki lum la thew
naduh ka sla duriaw.

Lum Shillong : U don shaphang shathie na Shillong.
U long u syntai lum uba jrong tam ha ka Jylla Mephalaya
U jrong kumba 1965 metre ne 6445 phut

Don saw tylli ki wah ka ri Khasi kiba mih na ki thain u Lum
Shillong,- ka wah Umiew ne Umiam Mawphlang, ka wah Umshyrpi,
(Ka shnat jong ka wah Umiam Khwan), ka wah Umngot, bad ka
wah Umkhen. Ki Khasi ki ngeit ba une u lum u dei ka jaka shong
jong u 'lei Shyllong. La ong ba ki Syiem Shyllong hyndai ki mih na
ka Pah Syntiew, ka khun u 'leit Shyllong. La ioh kem ia ka da u Sati
Mylliemngap ha ka por ba ka dang khynnah katba ka dang don ha ka
krem Marai kaba don hajan u Lum Shillong.

Lum Sohpet Bneng : U don ha ri Bhoi kumba 20
Kilometre shaphang shatei na Shillong harud ka surok na
Shillong sha Gauhati

Don ka jingong ba u paid Khasi hyndai u don 16 trep, 9 trep
ki don hajrong bad 7 trep ha tbian. Kine ki iakiew iahiar sngewbha
lyngba ka jingkieng kaba don ha une u lum tad haduh ba kata ka jing-
kieng ka dkut noh.

Lum Raitong : U don ha ri Bhoi shaphang shatei lam
mihngi na u Lum Sohpet Bneng U don harud ka surok
na Umsning sha Mawhati.

La ioh ia kane ka kyrteng na uwei u nongput sharati uba stad
eh uba kyrteng u Manik Raitong. Hadien ba la rai pyniap ia u da u
syiem, u la thang iap noh ia lade halor une u lum. La ong ba la rai
pyniap ia u namar u la iapoi kha bad ka Mahadei u Syiem kaba kyr-
teng ka Lieng Makaw.

Lum Diengiei (1851m) : U don shaphang shatei lam sepngi na Shillong. Lah ban iohi kyndiang ia une u lum na sor Shillong.

Ka khana pateng ka ong ba la don kawei ka diengiei kaba heh, kaba jrong bad kaba iar haduh katta katta kaba la mih halor une u lum. Kata ka dieng ka la tap dum ia ka ri Khasi baroh kawei. Dei tad haduh ba la pynkyllon ia ka ba ka sa shai pat ka ri Khasi kdar. Don kiba pyrkhat ba kane ka diengiei ka lah ban dei u Lum Mihding (volcano) uba ka tдем jong u ka tap ia ka ri Khasi baroh kawei. Ka tдем ding jong u ka jah noh hadien ba u Lum mihding u la bther.

Lum Mawkneng : U don ha Mawkneng shaphang sepngi na Sohiong. U long rwei na ki lum kiba jrong tam hapoh ka distrik.

Ka khana pateng ka ong ba don mynhyndai ka iew Luri Lura jong ki mrad hajrong une u lum. Haduh mynta don ki dienjat jong ki jait mrad ba bun jait halor u mawsiang uba don halor une u lum.

Lum Rapleng : U don shaphang shathie na Smit.

Lum Swer : U don hajan ka shnong Swer shaphang shathie na Mawkdok harud ka surok na Shillong sha Sohra.

Lum Lawbah : U don shaphang hathie na Sohra. Dei na une u lum ba ka Karkhana shna dewbilat ha Mawmluh ka ioh ia u mawshun ban slina dewbilat.

Lum Ryngkew Mawiong : U don ha Mawphlang.

Lum Dihum : U don shaphang shathie lam sepngi na Mawphlang.

6. **Ki Wah :** Ka jingsdang jong ki wah baroh ka long kaba rit. Katba ki nang tuid arsut ki nang heh nang heh namar ki nang iakynduh ia kiwei pat ki wah rit. Suki suki kine ki wah rit ki pynlong ki wah kiba heh. Ia ki wah ngi ioh na u slap, na ki umpohlieu bad teng teng na ka jingum u thah ba ki lum khriat. Ki wah ki ai ha ngi ia ka um dih, ia ki dohkha, ia ka um na ka bynta ki lyngkha rep bad na ka bynta ban ring ding ilektrik.

Ki wah kiba don ha ka distrik ki leit hap sha ka wah bah Brahmaputra ha Assam bad sha ka wah Surma ha Bangla Desh.

(a) **Ki Wah kiba hap sha ka wah Brahmaputra :**



Wah Umiam Khwan : Ka mih na ki thain Nong-thlieu bad Rangshken. Ki shnat wah ba kongsan jong ka ki long ka wah Umshyrpi. wah Umshiprah, wah Umbi bad ka wah Umsiang. Kane ka wah ka tuid lyngba ka

ri Bhoi bad ka long pud khyndiat ia ka distrik bad ka Assam (Karbi Anglong Distrik)

Ia kane ka wah la den ha ka jaka ba ju khot ka Krem Nonglieh shiwa bah poi ha ka shnong Umsaw Khwan kaba mynshiwa. Ka jaka ka don kumba 12 kilometre na Shillong. La den ia ka na ka bynta ban ring ding ilektrik. Hangne ngi ioh ia ka pung kaba heh tam hapoh Meghalaya ba la tip kum ka **Pung Umiam**. Don bun bah ki dohkha rit bad heh ha ka. Da ki spah bad hajar ki briew, shynrang bad kynthei, na Sor Shillong bad na ki jaka ba marjan ki ia leit khwai sha kane ka pung. Ka jingden ia kane ka wah ka pynphai noh ia ka lynti jong ka sha kawei pat ka lynti lyngba kawei ka thliw kaba heh ba la sam lyngba u lum Umsaw haduh banda poi sha Sumer. Dei hangne ba la pyndonkam ia ka um na ka bynta ban pynmih ding ilektrik. Na Sumer pat ka um ka leit hap sha ka wah Umtrew.

Haram ka den um ha Krem Nonglieh, don kawei ka shnat rit jong ka wah Umiam kaba kyrteng ka wah Umshing kaba mih naduh Mawlai. Kane ka wah ka bteng ia ka wah Umiam kaba rim bad ka sa heh biang ynda la poi ha ri Bhoi.

Wah Umsiang : Ka mih na ki thain u Lum Raitong. Ka long ka shnat kabi heh eh jong ka wah Umiam. Ka long pud khyndiat ia ka bynta ba shaphang shatei jong ka distrik bad ka Assam

Wah Umtrew : Ka mih najan u lum Raitong. Ka wah ka la heh shioun mynta nadien ba la pynphai ia ka lynti jong ka wah Umiam sha kane ka wah. Ki shnat wah ba kongsan jong ka ki long ka wah Umling, Umrleng, Umran, bad Umtham.

Don ar tylli ki jaka ba la den ia kane ka wah na ka bynta ban ring ding ilektrik. Kita ki long ha Kyr-dem Kulai bad ha Umtrew. Ha kaba den ia ka ngi ioh lai tylli ki pung kiba heh. Ar tylli ki don ha Kyr-dem Kulai bad kawei ha Umtrew.

Wah Umkhen ne Mynkhen: Ka mih na Laitkor najan u lum Shillong. Ka tuid lyngba ka ri Bhoi. Ka wah Shella bad ka wah Umlew ki dei ki shnat bakongsan jong ka.

(b) Ki Wah kiba hap sha ka wah Surma.

Wah Umngot : Ka mih na Smit na ki thain u lum Shillong. Ka long pud ia ka bynta ba shaphang shathie jong ka distrik bad ka Jaintia Hills. Ka wah Umsong ka long ka shnat ba kongsan jong ka.

Wah Umnab : Ka mih na ki thain Laitlyngkot La tip rah ia ka kum ka wah Rew bad wah Sohryngkew. Ki shnat ba kongsan jong ka ki long ka wah Umstew bad ka wah Sohra.

Wah Umiew ne Umiam Mawphlang : Ka mih na Ponnakrai, ka shnong kaba don ha kjat u lum Shillong. Ka iaid najan Mawphlang bad Shella. La tip ruh ia ka kum ka wah Bekra ha ki thain ri war. Ka Sorkar ka la sdang ban den ia ka hajan Mawphlang khnang ban pynioh um ia ka sor Shillong.

Hyndai ki ong la don ka jingiakob hapteng ka wah Umngot bad ka wah Umiew ban iapoi kloi sha ri dkhar. Ha ka jingsarong ka wah Umiew ka la iaid lyngba ka lynti kaba eh bad kaba kham shitom. Ka Umngot pat ka la iaid na ka lynti kaba jem. Ha ka jingialeh, ka wah Umngot ka la poi nyngkong. Ha ka jingap ia ka wah Umiew, ka Umngot ka la kyllain ia lade kum u bsein ha ri dkhar (Bangla Desh) ban peit ia ka

Umiew. Ia kane ka jaka la khot ka **Rupa Tylli**. La khot kumta namar ka jingphalang jong ka sngi kaba syiem ia ka rong jong ka rupa. Ka wah Umiew ka la lehrain suin bon iohi ia kane bad ka la phai noh na kawei pat ka lynti namar kam kwah ban iakynduh ia ka Umngot.

7. **Ki Kshaid** : Don bun tylli ki kshaid kiba heh bad kiba rit hapoh ka distrik Kiba kham bun ki don ha ki thain ri War Don bun bah ki briew ki bym ju ichi ia ki kshaid. Haba ki wan poi sha ka ri jong ngi ki sngew-tynnad eh ban leit peit khnang ia kine ki kshaid Kine harum ki long katto katne na ki kshaid kiba kham paw :--

(a) **Ki kshaid kiba kham heh bad kham jrong** :--

Kshaid Shrem : Ka don ha ka wah Umiam Khwan minngi na Tyrso

Kshaid Sunapani : Ka don na ka wah Umkhras shaphang shathie lam sepugi na Mawlai La tip ruh ia ka da ki nongwei kum ka **Beadon's falls**. Harum jong ka don kawei ka kor pynmih ding ilektrik kaba ai ding ia ka Sor Shillong naduh mvnshiwa.

Ka khana ka ong ba la don kawei ka khynnah kynthai hyndai kaba kyrteng ka Suna. Kane ka khynnah ka la noh iap ia lade ha kane ka kshaid namar ba ka la shah lehbein eh ha ka kmienah jong ka. Naduh kata ka por la tip ia ka kum ka Kshaid Sunapani.

Kshaid Weitdem ne Sweet Fall : Ka don ha ka wah Umkhen mihngi na Shillong.

Kshaid Thylliej Lyngwa : Ka don ha ka wah Weilyngkut mihngi na Sohiong

Kshaid Umkrem bad Wah Lynde : Ki don shaphang shatei na Nongshken.

Ka khana ka ong ba la don byndai uwei u bried uba kyrteng u Ren. Une u la ioh lok ia ka puri kaba don ha kane ka kshaid. Ha kawei ka sngi u Ren bad ka lok jong u ki la wan kai sha iing kmie. La ong ba ka kmie u Ren ka la kum klet ia u synsar ha shyngkup iing. Mar ia iohi ia u synsar, ka puri ka la phaidien bak bad ka la phet noh. U Ren ruh u la bud ia ka bad u da ong artat ba un ym wan phai shuh sha shnong hynrei kin iohsngew tang ia ka jingsaham jong u. Hana, ki trai shnong na sha kito ki thain ki ong ba teng teng lah ban iohsngew ia ka jingsaham u Ren haduh mynta.

Kshaid U Ren ne Kshaid Shyngliar : Ka don ha ka wah Shylla shaphang shatei lam mihngi na Nongjri.

Kshaid Risaw bad Mawtyngkong: Ki don shaphang mihngi na Mawsmat. Ka kshaid Risaw kaba don shaphang Mawsmat ka kham hah na kine ar. La tip ruh ia kine ki kshaid kum ka kshaid Nohsugithiang.

Ka kyrteng Nohsugithiang ka mih namar ka jingitynnad bad jingithiang jong ka lhuh ha kaba don kine ki kshaid khamtam ha ka por noh phai sngi. Don ki tymmen kiba ong ba kitei ki kshaid ki long tang kawei ha ki por hyndai eh. Bun bah ki riew iaid pyrthei kiba wan poi sha ri Khasi ki ju leit khnang ban peit ia kine ki kshaid.

Kshaid Dainthlen: Don ar tylli ki kshaid Dainthlen ha ka wah Dainthlen. Kawei ka don hajan Laitduh bad kawei pat hajan Mawmluh.

Ka khana pateng ka ong ba ki Khasi hyndai ki la pyniap ia uwei u thlen uba don hajan ka kshaid Dainthlen kaba hajan Laitduh. Une u mrad u la pynjolor jur bha ia ka jingim ki bried ha kata ka por. Haduh mynta don ki dak wait, dak dabor ha u mawsiang bad i krem rit ba shong uta u thlen ha kata ka por.

Kshaid Nohkalikai : Ka don shaphang mihngi na ka kshaid Dainthlen kaba hajan Mawmluh.

Hyndai ki ong ba la don kawei ka bried kaba kyrteng ka Likai kaba la noh iap ia lade ha kane ka kshaid namar ba ka la kum bam doh ia i khun lajong da ka jingshet shukor u panah ita i khyannah.

Kshaid Kynrem ne Kshaid Nianglang : Ka don hapdeng Wahlong bad Umwai shaphang shathie na Mawsmat Ka long ka kshaid kaba jrong bad itynnad shibun.

(b) **Ki Kshaid kiba kham rit :**

Kshaid Umshyrpi ne Bishop's Falls : Ka don ha ka wah Umshyrpi shaphang shatei lam sepngi na Shillong.

Kshaid Urkaiar ne Spread Eagle's Falls : Ka don hajan ka Madan Polo ha Shillong.

Kshaid Wirphnang : Ka don ha ka phud Umshun shaphang shathie lam sepngi na Nongpiur. Haneng jong ka don ar tylli ki kshaid kiba kham rit ba la khot ka **Kshaid Wei Iaplam** bad ka **Kshaid Umdiangpun ne Elephant's falls.**

Kshaid Byrdaw : ka don shaphang sepngi na Pamshutia

Kshaid Wahshriei : Ka don hajan Nohwet. Ka long ka kshaid kaba itynnad shibun.

Kshaid Wahkaba, Iapkhni bad Latara : Ka don shaphang shatei na Sohra.

Kshaid Longshynggai : Ka don shaphang mihngi na Thieddieng.

Kshaid Weisyntai : Ka don ha ka wah Mawsyntem shaphang shathie lam sepngi na Tyngnger.

Kshaid Umseifiong : Ka don shaphang shathie na Lawbah.

Kshaid Mawpuh : Ka don shaphang shatei lam sepngi na Thyllaw Warding.

8. **Ki Pung ba kongsan :** Baroh ki pung ha ka distrik ki dei kiba la shna da ki briew na ka bynta ka

jingitynnad, ka jingri dohkha bad ka jingring ding ilektrik
Ki Pung kiba kongsan ki long kine :--

Kyrteng :

Jaka :

Nan Polok ne Ward's Lake Shillong

Pung Umiam .. Khwan (hajan Barapani)

Pung Kyrdem Kulai .. Kyrdem Kulai**

Pung Khasaw .. Khasaw (hajan
shnong Khasaw).

Pung Umtrew .. Umtrew.**

Ia ka jaka ba don ka pung Umiam mynta la khot
mynshiwa ka Khwan.

* Ym pat don ka kyrteng kaba thikna.

9. **Ki iew ki Hat ba kongsan :** Ki iew ki hat ki dei ki
jaka ha kiba ngi lah ban die ne iapli ia ki mar ba ngi
pynmih bad ban thied ia kiwei pat ki jingdonkam kiba
ngim don. Ia ki iew ba don ha khap ri dkhar la khot ki
Hat. Ia ki kyrteng jong kiba bun ki iew, la tip na ki jaka
ba ki don. Kine ki long ki iew kiba kham kongsan :--

Iewduh (ha Shillong)

Iew Sohiong

Iew Umni (ha Smit)

Iew Umkseh (ha Tyrsad)

Iew Pynursla

Iew Mawhati

Iew Mawryngkneng

Iew Rani

Iewbah Sohra

Iew Mawroh (ha Jirang)

Iew Nongpoh
 Iew Shyllong (ha Shillong
 bad Laitlyngkot)
 Iew Mawsynram
 Iew Umsning

Iew Lyngka (ha Lyngshiang)
 Hat Shella
 Hat Lyngkhat
 Hat Byrni.

Ka Iew Rangjyrteh ha Laitduh (hajan Sohra) ka long ka iew khaii nar kaba heh tam hapteng ki Khasi hyndai. Dang don shibun ki mawnam mawbynna hangne haduh mynta. Kane ka iew ka la duh mynta.

10. Ki Jingthung jingtep :

(a) **Ki Jingthung ha ri War** : sohniamtra, sohtrun sohphan, kwai, tynpew, kait, shriew, phandieng, lasi ne latyrpad, sying, synsar. kba (ha ki pynthor khap Bangla Desh) bad kiwei kiwei.

(b) **Ki Jingthung ha ri Lum** : kba, phan myngngor, riewhadem, sohphoh Nongkhlaw, sohplom, ki jhur bun jait bad kiwei kiwei.

(k) **Ki Jingthung ha ri Bhoi** : kba, riewhadem, sohtrun, sohphan, kait, sohniamtra, phlangsohmat (citronala) bad bun kiwei kiwei.

11. **Ki Krem Pubon** : Don bun tylli ki krem Pubon hapoh ka distrik. Kine ki shait don tang ha ki jaka ba don mawramsang. Hapoh kine ki krem ngi shait shem ia ki mawjymbuin (stalactite) bad ki mawshylluid (stalacmite). Kine ki maw ki heh bad ki san na ka por sha ka por. Kine haum ki long ki krem Pubon ba kham kongsan :--

Kyrteng**Shnong ba marjan**

Krem Mawlum Syiem	..	Mawsmmai
Krem Mawkhyrdop	..	Mawmluh
Krem Dam Um	..	Mawmluh
Krem Lympud	..	Nongjri
Krem Umlatang	..	Wahlong (Bairong)
Krem Sohmrui	Nongtra
Krem Mawjymbuin		Mawsynram
Krem Dam	..	Mawsynram
Krem Blang	..	Hat Dwara

**12. Ki Surok Heh bad ki shnong ba kham kongsan
harud lynti**

(1) **Ka surok na Shillong sha Gâuhati :** Ka iaïd lyngba ka Mawlai, Barapani, Umsning, Umran, Umsaw, Nongpoh, Umling, Byrni, Jorabad sha Gauhati.

Na Jorabad ka don kawei ka surok bah kaba leit sha Nowgong bad shawei. Naloi kane, don ruh shibun ki surok rit kiba pyniasoh ia kane ka surok bad kiba bun ki shnong kiba kham heh jong ka ri Bhoi. Kiba kongsan na kine ki long (a) Ka surok na Barapani sha Bhoi Lymbong, Kyrdem bad Mawbri. (b) Ka surok na Umsning sha Mawhati shaduh Korhadem.

(2) **Ka surok na Shillong sha Jowai :** Ka iaïd lyngba ka Nongthymmai, Laitkor, Kynton-U-Mon, Umphyrnai'

Mawlynggad, Sohryngkham, Mawlyndep, Mawryngkneng sha Jowai. Najan Lad Nongkrem don kawei ka surok kaba iaid lyngba ka Smit shaduh Mawlat.

(3) **Ka surok na Shillong sha Dawki :** Ka iaid lyngba Pynursla, Mawshun, Umsyiem sha Dawki.

Shiwa ban poi ha Dawki don kawei ka jingkieng nar ba la shu pynsdien na shiliang sha shiliang ka wah Umngot. Ki briew bad ki kali ki iaid nalor jong ka.

Ha kane ka surok don ruh katto katne ki surok rit kiba pyniasoh ia kiwei pat ki shnong kiba kham heh ha kito ki thain. Kaba kham kongsan na ki ka long ka surok na Pynursla sha Umniuh.

Ka Umtyingngar ka dei tang ka lad jong ka surok kaba leit sha Sohra.

(4) **Ka surok na Shillong sha Shella :** Ka iaid lyngba ka Pomlum, Myllem, Umtyingngar, Kyrdem Khla, Mawkdok, Sohra, Rim, Laitryngew, Sohra (Cherrapunji), Mawsmat, Laittyra, Wahlong (Bairong), Umwai, Mawlong, Shella. Kawei ka lad na Sohra ka khlad sha Mawmluh.

Don ruh bun tylli kiwei pat ki surok rit kiba iasoh bad kane ka surok.

(5) **Ka surok na Shillong sha Balat :** Ka iaid lyngba ka Pomlum, Mawngap, Mawphlang, Lyngiong, Tyrsad, Weiloi, Mawsynram, Phlangwanbroi, Trongpleng, Pynden-sohsaw, Balat.

Lyngba kane ka surok lah ban leit shaduh Baghmara bad Tura hapoh West Garo Hills.

Na Weiloi, don kawei ka tnad kaba leit shaduh Mawkyrwat.

Na Mawngap, don kawei ka surok heh kaba leit sha Mairang lyngba ka Rangshken, Sohiong bad Mawmaram. Da kane kajuh ka surok lah ban leit shaduh Nongstoin bad ri Garo

Nalor kine don ruh ki surok kiba kham rit kiba iasoh bad kane ka surok.

Ka jingdon ki surok ka la iarap shibun ia ka leit ka wan ki brieve khamtam na ka bynta ki jingdie jingthied jong ki. Ka jingdon ki surok ka wanrah shibun ki jingkieng lyngba ki wah bah bad wah rit na kiba ki brieve ki lah ban iaid ha ka por ba heh um.

Ha ki thain ri War don bun tylli ki jingkieng ba la pun da ki siej bad ki thied jri.

13. Ki Development Block

Kyrteng ki Block	—Jaka Trei kam (Headquarters)
Myllem	.. Uppei Shillong (San Mer)
Bhoi Area	.. Umsning
Nongpoh	.. Umling.
Pynursla	.. Pynursla
Mawryngkneng	.. Mawryngkneng
Mawkynrew	.. Mawkynrew
Mawphlang	.. Mawphlang
Shella Bholaganj	.. Sohra (Cherrapunji)
Mawsynram	.. Mawsynram

14. Ka District Council bad ki Hima Trai Ri

Don kawei ka District Council na ka bynta ki distrik East bad West Khasi Hills. Hapoh jong ka don 25 tylli ki hima trai ri kiba la ju don naduh hyndai hynthai. Na kine don 16 ki hima syiem, 3 ki hima lyngdoh, 5 ki hima sirdar bad kawei ka hima Wahadadar. Kine harum ki dei ki hima kiba don hapoh ka distrik.

Ki Syiem : (1) Myllem (2) Khyrim (3) Sohra
(4) Mawsynram (5) Bhowal (6) Malaisohmat (7) Nongspung (8) Jirang.

Ki Lyngdoh : (1) Lyniong (2) Mawphlang (3) Sohiong
Sirdar : (1) Mawlong (2) Mawdon (3) Dwara Nongtyrnem (4) Pamsanngut.

Wahadadar : Shella.

15. Ki Shnong bakongsan :

Shillong : Ka dei ka nongbah jong ka distrik bad ka Jylla Meghalaya. Ka long ruh ka shnong kaba heh tam hapoh ka Jylla. Ka don ha ranab u Lum Shillong markhap bad ka ri Bhoi. U slap u kham duna hangne ban ia ha kiba bun kiwei pat ki jaka.

Ka Shillong ka long kawei na ki shnong kaba itynnad bad kaba pyngngad tam ha ri India. Namar ka jingitynnad la khot ia ka 'Ka Scotland jong ka ri Mihngi'. Don ruh kiba khot ia ka 'Ka shnong jong ki syntiew' namar don bun jait ki syntiew ha ka. Ha ka don ki jaka iaaid pyngngad kum ka Hyderi Park, ka Nan Polok, ka Madan Kyrkit, ka Kolphling (Golf Link) bad kiwei kiwei.

Ha ka snem 1971 ki briew ki la jan kot 88 hajar tang hapoh sor. Ki dong bakongsan jong ka ki long ka Jaiaw, Mawkhar, Laban, Mawprem, Malki, Laitumkhrah, Jail Road, bad Police Bazar.

Ka Shillong ka long ruh ka jaka shong jong u Lat bad ki bor synshar ba ha khlieh duh jong ka Jylla.

Ka Shillong ka long ruh ka shnong khaii kaba heh shibun. Dei ma ka kaba pyndap ia ki jingdonkam jong ka distrik bad ki distrik ba marjan jong ka. Lah ban ong shikyntien ba ka long u klong snam jong ka Jylla baroh kawei ha ki liang baroh.

Sohra ne Cherrapunji : Ki nongwei ki tip ia ka kum ka Cherrapunji. Ka ktien 'Punji' ka mut ka shnong rit. Ha ka por ba dang wan nyngkong ki phareng la pynlong ia ka Sohra kum ka nongbah jong ka Khasi bad Jaintia Hills distrik. Namar ka jingjur eh u slap la pynkynriah noh ia ka nongbah sha Shillong ha ka snem 1864.

Ka Sohra ka pawnam na ka bynta kiba bun kiei kiei. Ka long kawei na ki shnong kiba jur slap tam ha ka pyrthei. Ka ktien Sohra ka long ka ktien Khasi ba la pyndonkam ha ka thoh ka pule bad ka kren ka khana. Ka niam khristan ka la ioh rung nyngkong eh ha Sohra. U sohniamtra uba mih na thain Sohra u long uba pawnam shibun ha ka jingbang bad jingshngiam. Ka Iewbah Sohra ka long kawei na ki iew kaba heh tam hapoh ka distrik. Sawdong jong ka ki don ki Riat bah, ki them ki lhuh bad ki kshaid kiba itynnad shibun. Sawdong jong ka don u dewiong bad u mawramsong. Ki briew kiba kham bun ki im na ka khaii ka pateng. Hangne ka don ka Karkhana shna dewbilat kaba khraw shibun.

Barapani : Ka dei ka shnong kaba thymmai kaba dang shu mih shen hadien ba la den ia ka wah Umi-am-Khwan. Ka don harud ka surok na Shillong sha Gauhati kumba 12 Kilometre na Shillong. Ka long ka shnong kaba itynnad bad kaba pyngngad shibun namar ka don harud ka pung.

Umroi : Ka dei ka shnong rit shaphang mihngi na u lum Sohpet Bneng. Hangne don ka jaka hiar eroplein kaba heh bha.

Nongpoh : Ka don ha shiteng lynti jong ka surok na Shillong sha Gauhati. Ka shnong ka la sdang heh mynta naduh ba la pynlong ia ka ka jaka treikam ne Headquarters ka Administrative Unit jong ka Ri Bhoi.

Jirang ne Mynnar : Ka long ka shnong kaba heh tam ha thain ri Bhoi Sepngi. Ka shnong ka long kaba pyngngad shibun. Ki briew kiba kham bun ki im na ka rep.

Kreit : Ka don ha krung u lum Diengiei. Ka paw-nam na ka bynta ka jingpynmih phan.

Mawngap : Ka don shaphang shathie lam sepngi na Shillong. Ka la long shisien ka iew khaii phan kaba heh tam ha ri Khasi bad Jaintia.

Mawphlang : Ka don hajan Mawngap. Ka long ka shnong kaba rim shibun.

Mawsynram : Ka long ka shnong khaii kaba don ha khlieh ka ri War. Ka long kawei na ki shnong kaba jur slap tam ha ka pyrthei. Ki jingmih ba kongsan lyngba

kane ka shnong ki long u kwai, ka lasi, u synsar bad u] tipui.

Shella : Ki trai shnong ki khot ia ka ka Shala. Ka don harud ka wah Bakra ne Umiew. Ki brieve ki im na ka rep, ka tih maw (mawramsong), bad ka kam tong dohkha. Ia u mawramsong nangne la salan da ki lieng sha Bangla Desh. Ka la long shisien ka shnong kaba heh bad kaba riewspah shibun. La pynjot thiaw ia ka ha u Jumai bah ha ka 12 tarik Jylliew snem 1897. Bun bah ki brieve ki la iap bad bun bah ki la duh ia la ki iing ki sem bad ki jingdon jong ki. Haden u jumai pat la wan sa ka jingiap them ha kaba la iap bun bah ki brieve.

Nongjri : Ka long ka shnong kaba la rim shibun ha ki thain ri War.

Smit : Ka dei ka jaka shong u syiem Khyrim. Ka long ka jaka ha kaba ngi ioh ia ka Shad Nongkrem man ka snem. Ka ling Sad kaba don hangne ka ring ia kiba bun ki riew wad jingtip bad ki nongiaid pyrthei. Ka long ka shnong kaba jur bha u slap bad kaba khriat shibun ha ka por tlang. Ki brieve kiba bun ki im na ka rep jhur bad ka khaii pateng.

Langkyrdem : Ka long ka shnong kaba heh ha khlieh lum ka ri war. U slap u jur bha hangne. Ki brieve kiba kham bun ki im na ka rep.

Laitkor : Ka don hajan Shillong. Ka pawnam na ka bynta ka jingdon shibun ki mawbynna.

Jingkylli


1. Dro ia ka map East Khasi Hills distrik bad buh ia kine harum :--
 - (i) Ki Pudsawdong.
 - (ii) Lum Shillong ; Lum Diengiei ; Lum Sohpetbneng ; Lum Mawkneng.
 - (iii) Shillong ; Sohra ; Mawsynram ; Nongpoh ; Mawryngkneng.
 - (iv) Wah Umngi ; wah Umnub ; wah Umiam Khwan ; wah Umiew ; Wah Umkhen.
2. Kano ka bynta jong ka distrik ba ngi ioh slap eh ?
Kiei ki shnong bajur slap eh ?
3. Iathuhkhana shaphang uwei u lum ba phi la pule bad iathuh ia ka jaka ha kaba u don.
4. Kiei ki jingmyntoi ba ngi ioh na ka wah ?
5. Naei ka mih bad shaei ka tuid ka wah Umiam Khwan ?
6. Jer kyrteng san tylli ki kshaid bad iathuh ia ki jaka ba ki don
7. Jer kyrteng kawei ka iew ba phi la leit. Iathuh lut ia kiei kiei baroh ba phi la iohi hangta.
8. Kiei ki krem pubon ? Jer kyrteng san tylli ki pubon bad iathuh ia ki jaka ba ki don.

9. Lada phi iaid da ka kali na Shillong sha Byrni, kiei ki shnong ba phi dei ban iaid lyngba ?
10. Kiei ki jingmyntoi ba ngi ioh na ki surok kali ?
11. Lada phi mih na shnong jong phi ban leit sha Shillong ne Jowai kiei ki shnong ba kongsan phin iakynduh ?
12. Jer kyrteng ia ki Block baroh ha ka distrik bad ia ki jaka trei kam ki ophis jong ki.
13. Kiei ki hima trai ri hapoh ka distrik jong phi ? Jer kyrteng ia ka bima ha kaba phi don.
14. Batai katba phi tip shaphang kine ki shnong harum :--
Shillong ; Sohra ; Barapani ; Shella ; Smit.
15. Jied ia ka jubab kaba dei :--
 - (a) Ka ri Nongphlang ne Ri Lum Pdeng ka don (i) hajan u lum Shillong (ii) shaphang shatei jong ka ri Bhoi (iii) hapdeng ka ri War bad ri Bhoi.
 - (b) Ia ka jingjrang jong ki lum la thew na (i) trai jong u lum (ii) sla duriaw (iii) ka madan bah.
 - (k) Ka bynta kaba ioh thah myntlang ka dei ka (i) Ri war (ii) Ri Nongphlang (iii) Ri Bhoi.
 - (d) Ka wah Umkhen ka dei ka shnat jong ka wah (i) Brahmaputra (ii) Surma (iii) Umiam Mawphlang.
 - (e) Ki hat ki iapher na ki iew namar ba (i) ki kham heh (ii) ki don ha khap ri dkhar (iii) ki don bad ka dkhar.

16. Pyndap ia ki jaka ba suda :--

- (a) Ka Ophis trei kam jong ka Ri Bhoi Sub-Division
ka don ha _____.
- (b) Ki Lyer slap ha ka distrik ki beh na shaphang _____
- (k) U lum Shillong u jrong _____.
- (d) Ka kshaid u Ren ka don shaphang_____na_____.
- (e) Ka Pung _____ ha _____ ka long ka pung kaba
heh tam ha ka Jylla.
- (g) Ka shnong Laitlyngkot ka don harud ka surok
na _____ sha _____.

_____ .



B. WEST KHASI HILLS

1. Ki Pud Sawdong

Shatei	..	Distrik Kamrup (Assam)
Mihngi	..	Distrik East Khasi Hills.
Shathie	..	Bangla Desh.
Sepngi	..	Distrik East bad West Garo Hills.

2. **Ka Rukom Synshar** : U Deputy Commissioner (Diputi Komishnor) u dei u khlieh duh jong ka distrik. Ka Nongstoin ka dei ka shnong trei kam jong u. Ia ka distrik la phiah sha ki ar tylli ki Sub-division kumne :

Kyrteng	Ophis trei kam (Headquarters)
Nongstoin	.. Nongstoin
Mairang	. Mairang

Hapoh ka Nongstoin Sub-Division ka don ruh ka Mawkyrwat Administrative Unit. Ka Ophis trei kam jong ka ka don ha Mawkyrwat.

3. Ki Bynta ba kongsan ka Mariang :

(1) **Ri Lyngngam** : Ka don shaphang sepngi ka distrik. Ki lum hangne ki lyngkot bad don ki khlaw kiba rben bha. Ka heh lajan marshiteng ka distrik.

(2) **Ri War** : Ka don shaphang shathie ka distrik. Ka iasyriim ia ka ri War ha East Khasi Hills.

Don ar tylli ki Lhuh kiba kongsan hangne. (a) Ka Lhuh jong ka wah Umngi ha ki thain Mawpud bad (b) Ka Lhuh jong ka wah Kynshi bad Rilang ha ki thain Phlang-diloin bad Phlangmawprah.

(3) **Ri Lum Pdeng** : Ka don hapdeng ka distrik. Ki lum ki ia syriim ia ki lum ka East Khasi Hills.

(4) **Ri Bhoi** : Ka don shaphang shatei jong ka distrik. Ka jinglong jong ki lum ka ia syriim ia ki jaka ka ri Bhoi ha East Khasi Hills.

4. **Ka Jinglong ka Suin Bneng** : Ka jinglong ka suin Bneng ka ia syriim ia ka East Khasi Hills. U slap u jur bha khamtam ha ka por lyiur. Ka Mawkyrwat ka long kawei na ki shnong kiba jur slap eh.

5. **Ki Lum ne Syntai Lum ba kongsan :**

Lum Laitdom : U don ha Laitdombah shatei na Mairang.

Lum Kyllang : U don sepngi na Mawnai.

Lum Symper U don shathie na Kmawan.



Ka khana ka ong ba ha ka por mynshiwa eh u Lum Kyllang bad u Lum Symper ki iadon marjan. Ka la jia shisien ba ki la iakajia bad ki la ialeh thma para ma ki. Ha ka jingialeh la jop u Kyllang. Tang shu jop, u Kyllang u la iaid leh jop haduh ba un da poi sha ka hima Nongkhlaw. Ha kane ka jingiaid ka khyndew ka la hap lut na u bad u sah sa tang u Mawsiang suda. Namarkata, la tip ruh ia u kum

u Mawsiang Kyllang. Ha u lum Symper pat ki don haduh mynta ki krem ba la ngeit ba ki dei ki dak mong bad ki dak khloneg ktieh kiba la jia ha kata ka thma.

Lum Nongsynrih : U don ha Nongsynrih sepngi na Shngimawlein.

Lum Mawthadraishan : U long u lum uba jrong tam ha ka distrik bad uba ar ha ka Jylla. U jrong kumba 1925 metre lane 6314 phut. U don hajan Domkseh shaphang shatei na Pariong. U don ha u lynter lum Nong Shillong.

Ka khana pateng ka ong ba la don uwei u briew uba kyrteng u Syllei Langiong uba don ka khyndew kaba heh sawdong une u lum. U la long marwei kum u syiem. U syiem Myriaw u la pyrshang ban jop ia u hynrei um lah. Da ka buit u la ioh ban pyndih kiad ia u haduh ba un da buaid bym tipbriew shuh bad nangta u sa pyniap ia u. Haden ba u la iap, ki shipai u syiem Myriaw ki la theh pashait lut ia u krai ba la thad da u Syllai Langiong ha une u lum. Dei naduh kata ka por ba la khot ia une u lum u Lum Mawthadrai-shan ne u Lum Mawthadkrai.

Lum Miangiong : U don hajan Mawrok sepngi na Rambrai.

Lum Kyllai Lyngsngun : U don hajan Mariem shathic lam sepngi na Rangblang.

Lum Langbarai bad Sohlamut : Ki don shaphang shathie na Rangthong.

Lum Iawpaw : U don shathie na Nongnah.

Mihngi na u lum Iawpaw don ka krem ha shiteng riat. La ngeit ba kane ka krem ka dei ka jaka shong jong ka Lei Iawpaw. Don ruh ka jingngeit ba kiba iap baroh ki leit sha shnong ka Iawpaw, kaba mut sha kane ka krem:

Lum Pyndengru : U don ha khap pud bad ka West Garo Hills sepngi na Nongkulang.

Lum Niangram : U don sepngi na Byrki.

Lum Kohtyllaw : U don sepngi na Nongtnger harud ka wah Kynshi.

Lum Kut Traw: U don shathie lam sepngi na Mawmorin.

Ki khana pateng ki ong ba ki Lyngngam hyndai ki shait knia brier halor ki lum Kohtyllaw bad Kut Traw.

Lum Ryngkew: U don shatei na Mawthengkut.

6. **Ki Wah ba kham kongsan :** Baroh ki wah ki leit hap sha ka wah Brahmaputra ha Assam bad sha ka wah Surma ha Bangla Desh.

(a) **Ki Wah kiba leit hap sha ka wah Brahmaputra :**

Wah Khri : Ka mih na Dewshaw sepngi na u Lum Diengiei. Don kiba khot ia ka ka Khri Bah ne Khri Mawdem. Ka wah Rambrai, ka wah Khri Synnia, ka wah Rina bad ka wah Umpampling ki dei ki shnat ba kongsan jong ka.

Hajan ka shnong Mawkarah don ka um mluh ba la khot ka Iew Mura (Iew mrad). Harum sda bad ka wah Khri Synnia pat don sa kawei ka um mluh ba la khot ka Dipung. Ki mrad ki ju wan dih um bha na kine ki jaka.

Wah Khri Synnia : Ka dei ka shnat jong ka wah Khri. Ka mih na shaphang shatei jong u lum Mawthad-raishan. Ka wah Tyrsung-Myriaw ka dei ka shnat bakongsan jong ka.

Wah Rambrai : Ka mih na shaphang Umsaw sepngi na u lum Mawthadraishan. Ka iakynduh ia ka wah Khri ha Kyrshai. Ka Um It ka dei ka shnat ba kongsan jong ka.

Wah Tyrsung Nonglang : Ka mih na Nongstong sepngi na Klangrin. Ka wah Umsaw ka dei ka shnat ba kongsan jong ka.

Wah Rydiak : Ka mih na shaphang East Garo Hills. Ka long pud katto katne bad ka East Garo Hills. Ki Garo ki khot ia ka ka wah Ildek.

(b) **Ki Wah kiba hap sha ka wah Surma :**

Wah Kynshi : Ka long ka wah kaba heh tam bad kaba jrong tam ha ka Jylla. Ka mih na shaphang Nongthliew bad na ki thain u lum Mawkneng. Ka wah Blei bad ka wah Rilang ki long ki shnat bakongsan jong ka.

Haduh mynta dang don tang kawei ka jingkieng surok kali lyngba kane ka wah. Kata ka don hapteng Umkrem bad Pariong. La khmih lynti ba kan don sa kawei ka jingkieng lyngba jong ka hajan Nongkhlaw ha ka surok na Nongstoin sha Mawthawpdah. Ka Ranikor kaba don ha khap Bangla Desh ka long kawei na ki jaka khwai dohkha kaba pawnam shibun.

Wah Rilang : Ka long ka shnat jong ka wah Kynshi. Ka mih na ki thain Lawbyrtun bad Tihnongbah.

Ka khana pateng ka ong ba ka wah Kynshi bad ka wah Rilang ki ialong shipara. Ka la don ka jingiakop hapteng jong ki ban iapoi shiwa sha ka wah Surma. Ka Rilang, kum ka para, ka la thew na ba beit bad ka la iaid lyngba ki riat ki ram kiba bun katba ka Kynshi pat ka la wan na ki jaka ba kham suk. Khadduh ka la jop ka Rilang. Haduh mynta ngi shem ba ka Rilang ka iaid tang lyngba ki khriang bad ki lad lad katba ka Kynshi pat ka iaad na ka lynti kaba jem.

Wah Blei : Ka dei ka shnat jong ka wah Kynshi. ka mih na Mawpomblang ha ki thain Mawthengkut (Suna-pahar). Ki shnat bakongsan jong ka ki long ka wah Bytit, wah Kusang bad wah Rwiang.

Wah Rwiang : Ka dei ka shnat jong ka wah Blei. Ka mih na Sohshynrut hajan Rambrai. Ha ka jingshisha ka wah Rwiang ka kham heh bad kham jrong ban ia ka wah Blei hynrei la kham niewkor ia ka wah Blei namar ka don jingiasoh bad ka niam mane Blei ha ki por hyndai.

Wah Ryndi : Ka long ka shnat wah kaba heh tam jong ka wah Simsang. Ka long pud ia ka bynta kaba bun hapdeng ka distrik West Khasi Hills bad ki distrik East bad West Garo Hills. Ka wah Simsang ka long pud khyndiat ia ka West Khasi Hills bad West Garo Hills.

Haba kren shaphang ka jingiar ka ri Khasi bad Jaintia dei ban ong naduh wah Kupli haduh wah Ryndi. Ka long kaba bakla ban ong naduh Kupli haduh Rilang namar u pud ka ri Khasi u dangjingai bah na ka wah Rilang.

Wah Umngi ne Ummawpa : Ka mih na ki thain Mawkneng bad Marpna hajan Sohiong. Ka wah Nongspung ka long ka shnat bakongsan jong ka.

Wah Maheskhola : Ka mih na shaphang u lum Pyndengru.

7. (a) **Ki Kshaid ba kham heh bad kham phylla :**

Kshaid Shad Thum : Ka don ha ka wah Kynshi shaphang shathic na Nongstoin hajan Byrki.

Kshaid Winnia : Ka don ha ka wah Kynshi sepngi na ka kshaid Shad Thum. Ka jrong kumba 200 metre.

Don ka jaka ha ka wah Kynshi shaphang sepngi na Byrki ha kaba ka wah ka pait pnat ar tylli. Ha ka tnad kaba shaphang kadiang ngi ioh ia ka kshaid Shad Thum bad ha ka tnad ba kham rit shaphang

kamon ngi ioh ia ka kshaid Winnia. Ia ka dewlynnong hapdeng ki ar tylli ki tnad wah la khot **Nongkhnom**. Ki briew kiba shong hangne ki dei ki nongri jingri. Kim ju lah ban leit shano shano ruh ha ka por ba heh um mynlyiur namar kim lah ban jam sha shiliang wah.

Kshaid Lyngshiang : Ka don ha ka wah Kynshi. Ka don shathie lam sepngi na Nongsangriang. Ka long ka kshaid kaba jrong bad ba heh tam ha Meghalaya. Ka jrong kumba 300 metre.

Kshaid Riat Phyllaw : Ka don ha ka wah Rwiang shatei lam sepngi na Maweit.

Kshaid Nonglanglieh : Ka don ha ka Wah Blei hajan Nonglieh.

Kshaid Kusang : Ka don ha ka wah Blei shatei lam sepngi na Shyrkon.

Kshaid Urnar : Ka don ha ka wah Langrew, ka shnat ka wah Umngi. Ka don hajan Mawrap shatei lam sepngi na Sarin.

Haneng jong ka don sa kawei ka kshaid ba la khot ka **Urnar Nah** bad sharum pat ka **Kshaid Ladew**.

Kshaid Urkaiang : Ka don ha ka wah Rambrai shatei na Rambrai.

Ka khana ka ong ba la don hyndai kawei ka briew kaba kyr-teng ka Iang. Kane ka briew ka la ur bad la iap ha kane ka kshaid ha ka por ba ka leit mih iap briew sha shiliang kane ka kshaid. Haduh mynta ki dang don ki dak jong ki tiar ba ka kit kiba paw halor u mawsiang kum ka jasong, u khra kiad, u klong, u skaw bad kiwei kiwei.

Kshaid Phansang : Ka don ha ka wah Phansang, ka shnat ka wah Khri Synnia. Ka don shatei na Myriaw.

Kane ka kshaid ka don ar tylli ka jingphylla. Shiwa ba ka wah Phansang kan poi sha kane ka kshaid ka ngam noh shapoh u lum bad ka sa mih syndon ha ka dur jong ka kshaid. Kawei pat ka long ba haba kane ka wah ka pynmih ka jingsawa kaba kham pher ki trai shnong ki ong ba u slap un hap khlem pep hapoh ka shinsgi ar sngi.

Kshaid Thup Thup Wei Khudoi : Ka don ha ka wah Khri shatei na Mairang.

Kshaid Kyrshoh Nianglong : Ka don ha ka wah Khri shatei na Nongkhlaw.

Dei hajan jong kane ka kshaid ba ka Sorkar ka thmu mynta ban den ia ka um na ka bynta ka bor ding ilektrik.

(b) **Kiwei pat ki kshaid kiba kham paw:--**

Kshaid Wahriat : Ka don ha Nongstoin ha ka wah Nonbah.


Kshaid Riat Tham : Ka don ha ka wah Umtham sepngi na Phlangmawprah.

Kshaid Rangkhasaw : Ka don ha ka wah Umngi mihngi na Rangmaw.

Kshaid Umlarpung : Ka don ha ka wah Umlarpung shatei na Nongriat. Ka long ka kshaid kaba jrong bha

Kshaid Utksew : Ka don ha ka wah Khri shatei lam sepngi na Mawiong Nongthliew.

Kshaid Thup Thup Mawtynrong : Ka don ha wah Khri mihngi na Laitdom.



8. **Ki Iew ki Hat ba kham kongsan :** Ia ki kyrteng jong kiba kham bun ki iew ki hat la ju ai da ka kyrteng jong ka jaka ne shnong ba long iew. Kine ki long ki iew ki hat ba kham kongsan :—

Iew Langstieh (ha Mairang)	Iew Kyrshai
Iew Shyllong (ha Nongkhlaw)	Iew Doranggre
Iew Kynrut	Iew Maram (ha Mawkyrwat)
Iew Khlawduh (ha Nongum)	Iew Rangblang
Iew Kynshi	Iew Byrki
Iew Rambrai	Hat Balat
Iew Markasa	Hat Nalikata
Iew Nongstoin	Hat Bakli
Iew Riango	

Ka iew Maram ha Mawkyrwat ka long ka iew kaba heh tam hapoh ka distrik. Ka hat Rilang ka la long shisien ka hat kaba pawnam shibun. Ha kata ka por ki brieve ki iathied jingthied tang da kaba shu iapli ia ki mar kum ka mluh bad u phan, u soh bad ka dohkha bad kumta ter ter.

9. **Ki Jingthung Jingtep :**

(a) **Ki Jingthung ha ri War :** Phandieng, sohmrit, kait, sohniamtra, kwai, tymphew, kba (ha ki thain khap Bangla Desh), bad kiwei kiwei.

(b) **Ki Jingthung ha ri Nongphlang :** Kba, phan myngngor, riewhadem, krai bad kiwei kiwei.

(k) **Ki Jingthung ha ri Bhoi :** Kba, riewhadem, sohniamtra bad kiwei.

10. Ki Krem Pubon : Katba lah ban tip kine harun ki long ki krem pubon hapoh ka distrik :—

Kyrteng

Shnong bamarjan

Wahnokshireng	.. Shibak
Rangbaljong	.. Shibak
Wahshibong	.. Shibak
Rangbarniang	.. Shibak
Ronggasora	.. Khonjowai
Iawpaw	.. Nongnah

Don kawei ka jaka hajan Maheshkhola kaba kyrteng ka Shikrek ha kaba ka um ka wan kynjat napoh khyndew ha ka por lyiur. Kaba phylla hangta ka long ba don hangta ki dohkha leh Ha ka por tlang kata ka um kam don. Hangne imat ka don ka kynja krem kaba don ka jingiasoh bad kiwei pat ki wah.

11. Ki Surok heh bad ki shnong ba kham kongsan harud lynti

(1) **Ka Surok na Nongstoin sha Shillong :** Ka iaid lyngba ka Nongspung, Markasa, Mawkohngei (Nongshi-long), Kynshi, Bynther, Mairang, Manai sha Shillong.

Na Mairang don kawei ka surok kaba leit shaduh Jirang lyngba ka Nongrmai bad Nongkhlaw. Nalor kane don ruh kiwei ki surok rit kiba iasoh bad kane ka surok.

(2) **Ka Surok na Nongstoin sha Williamnagar bad Tura :** Ka iaid lyngba ka Riango, Nongshram sha William nagar bad Tura.

Na Riango don kawei ka surok kaba leit shaduh Gauhati lyngba ka Arodonga.

(3) **Ka Surok na Balat sha Baghmara :** Ka iaid lyngba ka Umpung, Ranikor, Nonghyllam, Khonjowai sha Baghmara. Haduh mynta ym pat don jingkieng lyngba ka wah Kynshi ha Ranikor. Ia ki kali baroh kiba leit sha shiliang la shu kit da ki lieng.

(4) **Ka Surok na Weiloi sha Rangthong :** Ka iaid lyngba ka Laitmawsiang (East Khasi Hills), Pongkung, Jakrem, Mawkyrwat, Rangthong.

(5) **Ka Surok na Nongstoin sha Mawkyrwat :** Haduh mynta ym pat don surok kaba leit beit sha Mawkyrwat lait noh tang kawei kaba iaid lyngba ka Mairang, Mawngap, Mawphlang, Weiloi, Mawkyrwat.

La khmihlynti ba yn sa dep shen kaba shna ia ka surok na Nongstoin sha Mawkyrwat kaba iaid lyngba ka Mawkohngei, Umkrem, Pariong, Mawthong, Mawthawpdah, Sakwang, Jakrem, Mawkyrwat.

12 Ki Development Block

Kyrteng ki Block

Ophis trei kam (Headquarters)

Mawkyrwat Development Block	Mawkyrwat
Nongstoin Sunapahar ..	Nongstoin
Mawshynrut ..	Riangdo
Mairang ..	Mairang

13. District Council

Kane ka Distrik ka iadei lang hapoh kajuha ka Distrik Council bad ka East Khasi Hills. La khot ia ka

Khasi Hills District Council'. Ki hima trai ri hapoh kane ka distrik ki long kumne :--

Ki Syiem :

- | | | |
|-------------|----------------|-----------------|
| (1) Maharam | (2) Mawiang | (3) Nongstoin |
| (4) Langrin | (5) Rambrai | (6) Nobosohphoh |
| (7) Myriaw | (8) Nongkhlaw. | |

Ki Sirdar : Ka Nonglwai ka dei tang ma ka ka Ilaka Sirdar hapoh ka distrik.

Ki sirdar Jyrngam, Riangsih bad Nonglang ki don hi la ki jong ki Ilaka hynrei kim shym iadon kti ha ka jingiasoi soksular (agreement) bad ka sorkar Pharang kum ki 25 hima. U Sordar Mynsaw pat u la pynasoh noh ia lade mynta bad ka hima Rambrai.

14. Ki Shnong ba kham kongsan

Nongstoin : Ka dei ka nongbah jong ka distrik. Naduh hyndai hynthai ka long ka jaka shong bad jaka trei kam u Syiem Nongstoin. Ka shuon, ka la nang heh mynta khamtam nadah ba ki la nih ki Ophis sorkar. Ki briew kiba bun ki im na ka rep bad ka khaii pateng. Ki jingmih ba kongsan nangne ki long u phan, u riewhadem, u kha bad kiwei.

Mawthengkut : Ka don ha ri Lyngngam. Ki nongwei ki khot ia ka ka Sunapaher. Ka pawnam eh na ka bynta ka par silimanite bad mawshynrut. La tei hangne ia ka M. E. bad High School ba nyngkong eh jong ka ri Lyngngam. Kine ki skul ki la iarap shibun ia ki samla ban kynjoh lem sha ka jingstad jong ka juk mynta. Ka long ka shnong kaba neh jong ka ri Lyngngam. Ka bynta

kaba ha baroh arliang ka wah Blei kaba don hajan Maw-thengkut ka long ka jaka kaba seisoh shibun.

Ki shnong kiba bun ha ri Lyngngam kim ju neh ha kajuha ka jaka. Man ka teng ki kynriah jaka sha ki jaka rep kiba thymmai. Kiba bun ki briew ki la sdang sngewthuh mynta shaphang ki jingeh kiba mih na ka jingkynriah shnong.

Mairang : Ka long kawei na ki shnong kiba heh hapoh ka distrik. Ki briew kiba bun ki im na ka rep bad ka khali. Ka long ka shnong ba kham shong pdeng bad kaba kham iasuk lang ha ka leit ka wan. Ka iew Langstieh kaba don hangne ka long kaba pawnam shibun. Hangne la tei ia u mot sah jingkyrmaw ia u Syiem Tirot Singh, u syiem Nongkhlaw. Une u la iap ha ka byndikum u riewjhrur bad u riew leit ri ha ka kri ki Phareng. La mew ia u kum uwei na ki khla wai ka ri Khasi.

Nongkhlaw : Ka don shaphang shatei na Mairang. Ka long ka jaka shong u syiem Nongkhlaw naduh ki por mynshiwa. Ki briew hangne ki im na ka rep.

Rambrai : Ka dei ka shnong ba shong u syiem Rambrai. Ki briew ki im na ka rep, ka ri jingri bad na ka thain kriah thain shang.

Marskuin : Ka don shaphang shatei lam mihngi na Nongstoin. Ki briew hangne ki kren da ka ktien kaba iapher bak lbak na ka ktien jong ki briew kiba iadon marjan. Ki briew ki im na ka rep.

Pariong : Ka long ka shnong kaba heh shibun. Ki briew ki im na ka rep. Don kawei ka pynta kba kaba heh bha hapdeng shnong ba la khot ka Pyndem Niangmiat.

Ka dei ka shnong ha kaba la seng nyngkong eh ia ka M. E. School bad ka High School hapoh ka distrik. Ka la long ruh mynshiwa ka jaka shong u Syiem Mawiang.

Mawkyrwat : Ka dei ka jaka shong jong u Syiem Maharam hadien ba u la wan phet na Sakwang. Ka long ka shnong khaii kaba dang shu mih shen hynrei ka la heh shibun mynta khamtam naduh ba la wan ka Block. Ka long mynta ka jaka shong jong u Unit Administrator. Ka iew Maram kaba don hangne ka long ka iew kaba heh tam hapoh ka distrik. Don shibun ki Mawnam Mawbyinna hangne kiba la khein noh naduh ba la sdang ban long shnong.

Jakrem : Ka pawnam na ka bynta ka Umshit kaba don hajan jong ka. Don shibun ki briew na kylleng kylleng kiba leit khnang ban peit ia ka. Mynta ka Sorkar ka la shna pynitynnad ia ka na ka bynta ki nongleit nongwan.

Rangthong : Ka dei kawei na ki shnong kiba rim eh hapoh ka hima Maharam. Ka don ha khlieh lum shiwa ban pynnoh ri War. Ka jaka kam long kaba da seisoh bad bun ki briew ki la phet shnong.

Shngimawlein : Ka long ka shnong kaba beh tam hapoh ka hima Maharam. Ka long kaba dang sahdién shibun ha ka liang ka jingngang jingstad. Ki briew ki long kiba trei shitom shibun bad ki im na ka rep.

Mawpud : Ka don ha krung u lum lawpaw. Ka long ka shnong kaba itynnad bad kaba pyngngad shibun. Ki briew ki im na ka rep.

Nongkulang : Ka long kawei ka shnong kaba kham heh bad kham neh hapoh ri Lyngngam. Ka don ha ki thain ba shathie jong ka ri Lyngngam.

Balat : Ka don ha khap pud bad ka Bangla Desh. Ka shnong ka don mynta hapdeng ka jingma na ka jingwan tur jong ka wah Umngi. Don hangne ka hat kaba heh tam jong ka ri War hapoh ka distrik.

Jingkylli.

1. Dro ia ka map jong ka West Khasi Hills bad buh ia kine harum :—
 - (a) Pud Sawdong
 - (b) Nongstoin ; Mairang ; Mawthengkut ; Mawkyrwat ; Pariong ; Mawpud ; Nongkhlaw ; Rangthong ; Balat ; Kyrshai.
 - (k) Ka wah Kynshi bad lai tylli ki shnat wah jong ka ; ka wah Ryndi ; ka wah Khri bad ar tylli ki shnat jong ka.
 - (d) Lum Mawthadraishan ; Lum Miangiong ; Lum Symper ; Lum Kuttraw ; Lum Iawpaw.
2. Pyniabynta ia ka West Khasi Hills kat kum ka jinglong ka mariang.
3. Iathuh ia ki jaka ba don kine ki lum :—

Lum Kyllang ; Lum Mawthadraishan ; Lum Kyllai
Lyngngun ; Lum Niangram ; Lum Ryngkew.
4. Jer kyrteng ia ki wah baroh kiba leit hap sha ka wah Brahmaputra.

5. Naei ka mih ka wah Khri ? Kiei ki shnat ba kongsan jong ka ?
6. Iathuh katba phi tip shaphang ka wah Blei bad ka wah Ryndi.
7. Iathuh haei ki don kine ki kshaid harum :—
Winnia ; Urnar ; Urkaiang ; Thup Thup Weikhudoi ; Kyrshoh Nianglong.
8. Iathuh haei kine ki iew ki don :—
Khlawduh ; Langstieh ; Shyllong ; Maram.
9. Jer kyrteng saw jait ki jingthung kiba mih ha ri war bad saw jait kiba mih ha ri Nongphlang.
10. Lada phi kwah ban leit sha Nongstoin ne Mawkyrwa da ka kali (a) Naei phin kiew kali ? (b) Kaei ka surok ba phi dei ban iaid ? (k) Kiei ki shnong ba kongsan phi dei ban iaid lyngba.
11. Jer kyrteng ia ki Block baroh hapoh ka West Khasi Hills bad ia ki jaka ba don ki ophis trei kam jong ki.
12. Jer kyrteng ia ki hima syiem bad Sirdar hapoh ka West Khasi Hills.
13. Betai katba phi tip shaphang kine ki shnong harum :—
Nongstoin ; Mawthengkut ; Mairang ; Nongkhlaw ; Mawkyrwa.
14. Kine harum ki dei kiei ? Nuxsa : Nongsynrieh : u lum bad shnong. Langbarai ; Rina ; Byrki ; Riengdo ; Bytit ; Wahriat ; Nongkhnom.
15. Kdew ia ki kyrteng ki bym iadei jait :—
Nuxsa : Symper ; Iawpaw ; Kusang ; Kuttraw.
Jubab : Kusang (ka dei ka wah ne kshaid katba kiwei pat ki dei ki lum.)

- (a) Miangiong ; Pyndengru ; Weikohmang ; Kohtyllaw
 - (b) Kynshi ; Markasa ; Rangblang ; Pariong.
 - (k) Wahnokshireng ; Rangbaljong ; Rangbarniang ; Khonjowai.
 - (d) Riat Tham ; Ladew ; Lyngshiang ; Rydiak.
16. Jied ia ka jubab kaba dei :—
- (a) U lum Iawpaw u don (i) shathie na Nongnah
(ii) Shatei na Nongnah (iii) Mihngi na Nongnah.
 - (b) Ka wah Simsang ka long pud khyndiat ia ka West Khasi Hills bad ka (i) East Garo Hills
(ii) West Garo Hills (iii) East Khasi Hills.
 - (k) Ka wah Rwaing ka dei ka shnat jong ka (i) Wah Blei (ii) wah Kynshi (iii) wah Rilang.
 - (d) Ka kshaid Urnar ka don ha ka (i) wah Bytit (ii) wah Langrew (iii) wah Tyrsung Nongstoin.
 - (e) Ka Mawkohngei ka don ha ka surok (i) na Shil-long sha Nongstoin (ii) na Nongstoin sha Tura (iii) na Shillong sha Mawkyrwat.
17. Pyndap ia ki jaka ba suda :—
- (a) Ka wah Um It ka dei ka shnat jong ka wah.....
 - (b) ka ——— ka dei ka wah kaba heh tam bad jrong tam hapoh ka Jylla Meghalaya.
 - (k) Ka kshaid Pynnon ka don ha ka wah ——— mihngi na ———
 - (d) Ka ——— ka long ka iew kaba heh tam hapoh ka distrik.

- (e) Ka Jakrem ka pawnam na ka bynta ka ——— kaba don hajan jong ka.
-

K. JAINTIA HILLS

1. Ki Pud Sawdong

- Shatei .. Distrik Karbi Anglong (Assam)
- Mihngi .. Distrik Karbi Anglong bad North Cachar Hills (Assam).
- Shathie .. Distrik Cachar Hills (Assam) bad Bangla Desh.
- Sepngi .. Distrik East Khasi Hills.

2. Ka Rukom Synshar :

U Deputy Commissioner (Diputi Komishnor) u dei u khlieh jong ka distrik. Ka Jowai ka dei ka shnong ha kaba don ka Ophis trei kam jong u. Ia ka distrik la phiah shuh sha ki ar tylli ki Sub-division kumne :--

- | | |
|----------------|--------------------------------------|
| Kyrteng | Ophis Trei Kam (Headquarters) |
| Jowai | .. Jowai |
| Amlarem | .. Amlarem |

Hapoh ka Jowai Sub-division don kawei ka Administrative Unit ba la tip kum ka Khliehriat Administrative Unit. Ka Ophis trei kam jong ka ka don ha Khliehriat.

3. Ki bynta ba kongsan ka Mariang :—

Ia ka Distrik Jaintia Hills la khot ruh ka Ri Pnar. Lah ban pyniabynta ia ka ha ki lai bynta kat kum ka jinglong ka mariang.

(1) **Ri War** : Ka don shaphang shathic jong ka distrik.

Don ha ka bun bah ki them, ki lhuh, ki riat bah bad ki kshaid kiba jrong. Ka Lhuh jong ka wah Myntdu bad ka Lhuh jong ka wah Lukha ki long kiba kham kongsan. Don bun tylli ki rynsan lum na kiba lah ban iohi kyndiang ka ka ri Thor jong ka Bangla Desh. Ia ki briew ba shong ha kine ki jaka la khot ki War ne War Pnar.

(2) **Ri Lum Pdeng** : Ka don shaphang shatei jong ka ri War.

Ka dei ka bynta kaba kynjang tam jong ka distrik. Ki lum hangne ki don ka jingiasoh lang ter ter bad ki lum jong ka East Khasi Hills. Ia ki briew hangne la khot ki Pnar. Ki Hadem lane ki Biate ki don ha ka bynta ba shaphang mihngi jong kane ka bynta.

(3) **Khap Ri Bhoi** : Ka don shaphang shatei jong ki Lum Pdeng. Ka don markhap bad ka ri Bhoi kaba hap mynta hapoh ka Distrik Karbi Anglong jong ka Assam. Hangne ki lum ki noh suki suki.

4. **Ka Jinglong ka Suin Bneng** : Ki bynta jong ka ri Lum Pdeng ki kham khriat bad kham pyngngad ban ia ki jaka ha ri War bad ha khap ri Bhoi. Ki bynta kiba phai shaphang shathie ki ioh kham ban u slap ban ia ki bynta kiba phai shaphang shatei. U slap uba bun ch u wan ha ka por lyiur.

5. **Ki Lum ne Syntai Lum ba kongsan :**

Lum Maryngksih ne Mairangsip : U long u lum uba jrong tam ha Jaintia Hills. U don shaphang shathie lam sepngi na Saipung. U jrong kumba 1627 metre lane 5337 phut.

Lum Bah-bo-bah-kong : U don shaphang mihngi na Sonapur ha ka khlaw Narpuh.

Lum Iakor Sing : U don shaphang shathie lam sepngi na Saipung.

Lum Thirshoisip : U don shaphang shatei lam sepng na Moulsei.

Lum Sonaraja : U don hajan Sonapur harud ka wah Lukha.

Lum Tiniang : U don shaphang shatei lam mihngi na Raliang.

Lum Nongjngi : U don ha Nongjngi.

Lum Tyrshang : U don shaphang sepngi na Wahiajer.

Lum Selim : U don shaphang mihngi na Moopyut.

Lum Thangsyiem : U don shaphang shatei lam mihngi na Pala.

Dei ha une u lum ba la ju thang ia ki Syiem Jaintia ha ki por myndai. Ka jingnia, ka dang neh haduh mynta. Don ar tylli ki pung kiba jylliew bha harud une u lum.

6. Ki Wah ba kongsan

(a) Ki Wah kiba tuid sha ka wah Surma ha Bangla Desh :

Wah Myntdu : Ka mih na Khlich Myntdu shaphang shatei na Jowai. Ki shnat ka kongsan jong ka ki long ka wah Lynriang bad wah Prang

Ka wah Lynriang ka mih najan ka shnong Jongkaluh bad ka wah Prang ka mih najan Lad Rymbai.

Wah Lukha : Ka mih na shaphang Sutnga. Ka wah Simlieng ka long ka shnat ba kongsan jong ka.

Ka wah Simlieng ka long pud katto katne ia ka Jaintia Hills bad ka North Cachar Hills. Ki shnat ba kongsan jong ka ki long ka wah Jenju, wah Umsnait. Umkhangbang bad wah Maneng.

(b) Ki Wah kiba tuid sha ka wah Brahmaputra ha Assam

Wah Kupli : Ka mih na shaphang u lum Iakor Sing. Ia ka bynta kaba shakhlich jong ka la khot ruh ka wah Khynriam. Ka long ka wah kaba heh tam bad kaba jrong tam ha Jaintia Hills. Ki shnat ba kongsan jong ka ki long ka wah Dikisim, ka Umphung, ka wah Litang, bad ka wah Myntang. Kane ka wah ka long pud ia ka Jaintia Hills bad ka North Cachar Hills.

Ka Sorkar India ka la sdang ban den ia ka wah Kupli hamar pud bad ka North Cachar Hills ha Assam.

Wah Litang : Kane ka dei ka shnat jong ka wah Kupli. Ka mih na shaphang u lum Iakor Sing. Ki shnat wah ba kongsan jong ka ki long ka wah Umsaw, Wah Waikhyrwi, wah Umtarang, bad wah Umiurem.

Ka khana pateng ka ong ba ki syiem Sutnga hyndai ki mih na ka Li Dohkha. La ong ba ka Li Dohkha ka la kylla briew na ka dohkha ba la ioh da ka jingkhwai u Woh Ryndi na kawei ka thwei jong ka wah Waikhyrmi. U Woh Ryndi u la shong kurim ia ka Li Dohkha bad ki sa mih ki syiem Sutnga ha ri Jaintia.

Wah Myntang : Ka long ka shnat jong ka wah Kupli. Ka iakynduh bad ka shiwa ban rung sha Assam. Ka mih na shaphang shathie na Nongbah.

Wah. Mynriang : Ka mih na shaphang shathie na Mynsgat.

Wah Umkhen : Ka wan tuid na East Khasi Hills. Ka long pud katto katne ia ka Jaintia Hills bad ka Karbi Anglong. Ka rung sha Karbi Anglong na ka jaka ba khot ka **Jingkahulu.**

7. (a) Ki Kshaid ba kham heh bad kham phylla :

Kshaid Iale : Ka don ha ka wah Kupli mihngi na looksi. Ka long ka kshaid kaba heh tam hapoh ka distrik.

Kshaid Kyu : Ka don sharum ka kadlieng jong ka wah Kupli ha ka surok na Jowai sha Haflong. Ka kshaid ka don lai kyrdan bad ka jinghap jong ka um ka long kaba itynnad shibun.

Harum jong ka la den ia ka wah Kupli na ka bynta ka ding ilektrik. Hadien ba la den ia kane ka wah, ka kshaid Kyu kan sa duh noh.

Kshaid Samanong : Ka don ha ka wah Umiurem mihngi na Shangpung.

Kshaid Khlieh Narwan : Ka don ha ka wah Wai-khyrwi hapdeng Sutnga bad Narwan. Ka long ka kshaid kaba itynnad shibun.

Ha shiteng jong kane ka kshaid don ka synrang maw. Na kane ka synrang maw don ka lynti iaiaid kjat na kaba ki briew ki iaiaid na shiliang sha shiliang jong ka wah ha ka por ba heh um.

Kshaid Urdula : Ka don ha ka wah Lukha shathie na Sakhain.

Hyndai ki ong ba ka kshaid ka long tang kawei bad ka long kaba jrong shibun. Dei ka jingtim u syiem Sutnga ba kane ka kshaid ka sa long noh ar pateng. Don kiba ong ba ha ka por ba long dorbar u Syiem Sutnga kane ka kshaid ka ud haduh ba shitom ban long dorbar.

Kshaid Lakyoh : Ka don shaphang shathie na Rymbai bad ka shu jah noh shapoh krem. Ka long ka kshaid kaba iphylla shibun.

Kshaid Rynji : Ka don ha ka wah Myntdu hajan Mustem.

Kshaid Muwi : Ka don shatei lam mihngi na Moopyut.

Kshaid Tdem : Ka don hajan Bataw.

Kshaid Riat Rangkali : Ka don (ha ka wah Myn-tdu) mihngi na Tarangblang.

(b) Kiwei pat ki kshaid kiba kham paw :

Kshaid Kaikada : Ka don hajan Nongbah.

La ioh ia kane ka kyrteng na kawei ka briew kaba kyrteng ka Da kaba la noh iap ia lade ha kane ka kshaid.

Kshaid Tisha: Ka don hajan Nongbah.

Ka kur Biam ka ngeit ba u 'Lei Kyllang u sah hangne bad ki khein kyntang shibun ia ka. Don ka jingong ba kane ka kshaid ka shait ud shiwa ban don kiba iap briew na ka jait Biam. Ha trai jong kane ka kshaid don ka shyngoid maw kaba itynnad shibun ba la pynlong da ka mariang.

Kshaid Kaiksang : Ka don shathie lam sepngi na Shangpung. Ka don ha ka wah Umiurem.

Kshaid Tyrshi-Umiurem : Ka don ha ka wah Uniurem harum ka kshaid Samanong.

Kshaid Syngon : Ka don ha ka wah Waikhyrwi shatei lam mihngi na Sutnga.

Kshaid Lisheng : Ka don ha ka wah Siri hajan Moulhoi.

Kshaid Pongkola : Ka don ha ka wah Lenju mihngi na u lum Iakor Sing.

Kshaid Litein : Ka don ha ka wah Litang mihngi na Latyrke.

Kshaid Tyrshi Myntdu : Ka don ha ka wah Myn-
tdu shatei lam sepngi. na Jowai.

Kshaid Dongtanglein : Ka don sepngi na Sakhain.

Kshaid Synrang Rapati : Ka don hajan Jalaphet.

8. Ki Pung bad ki Nan

Pung Thadla-skein : Ka don ha Thadkskein barud ka surok na Shillong sha Jowai.

Ka Khana ka ong ba la tih ia kane ka pung da ki shipai u Sajar Nangli, u lyngkor jong u syiem Jaintia ha kata ka por. Ka khana ka ong shuh ba la tih ia ka tang mar shisien tieh da ka tdong ryntieh jong uwei pa uwei u shipai. Don ruh kiba ong ba la tih ia kane ka pung da ki khadar doloj jong ka ri Jaintia.

Pung Bir Jympamasi, Mynkoitok bad Umtisong : Kine ki don baroh lai tylli ha Nartiang. La ngeit ba la tih ia ki da ki shipai u Sajar Nangli.

Pung Umhang : Ka don ha Bataw. Ka long ka pung kaba heh bha.

Pung Kupli : Kane ka pung kan sa mih hadien ba la dep den ia ka wah Kupli mihngi na Iooksi.

Pung Syndai : Ka don hajan Syndai.

Ha ka don u mawsiang ba la oh shrong ia ka dur u hati, ka sngi bad u bnai. Mynta u luta jong u hati u la khein noh. Don 6 kyrdon ban hiar sha ka pung. La shna ia ka pung da u syiem Jain-tiapur hyndai.

Nan Kashari : Ka don ha Jowai. Don shibun ki dohkha ha ka.

Nan Sati Thang Im : Ka don hajan ka kshaid Kaikada ha ka liang kadiang ka surok na Jowai sha Nar-tiang.

La khot Sati Thang Im ia ka namar la don kawei ka briew kaba la thang im ia lade da kaba ryngkoh ha ding ha ka por ba thang ia u lok jong ka.

9. Ki Iew ki Hat ba kongsan : Ia kiba bun ki iew la khot kyrteng kat kum ka shnong ba ki don. Kine harum ki long ki iew ki hat ba kham kongsan :--

Iew Musiang (ha Jowai)	Iew Raliang
Iew Nartiang	Iew Sahnsiang
Iew Pysing (ha Ummulong)	Iew Thymmei (ha Kupli)
Iew Khyllaw (ha Sutnga bad Jowai)	Iew Pyngkat (ha Mynso)
Iew Mushai (ha Shangpung)	Iew Borato
Iew Rymbai	Hat Dawki
Iew Kuksoo (ha Nongbah)	Hat Muktapur
Iew Mulong (ha Lumshnong)	Hat Borkhat.

Ka Iew Musiang ha Jowai ka long ka iew kaba
 heh tam hapoh ka distrik.

10. Ki Jingthung jingtep

(a) **Ki Jingthung ha ri War** : Sohnamtra, sohtrun,
 sohjew, kwai, tymphew bad kiwei kiwei.

(b) **Ki Jingthung ha ri Lum Pdeng bad khap ri
 Bhoi** : Kba, sohnamtra, rymbai, shynrai bad kiwei kiwei.
 U shynrai uba mih na Shangpung u long uba bha eh.

11. Ki Krem Pubon bad kiwei ki Krem :

Kyrteng		Shnong ba marjan
Krem Marai	..	Saipung ¹
Krem Syiem	..	Jowai ²
Krem Rupasor	..	Syndai
Krem Rupan Amsohmahateng		Syndai ³
Krem Krang Manik	..	Tarangblang
Krem Umkyrpong	..	Umkyrpong
Krem Sutiang	..	Shnong Rim ⁴
Krem Labit	..	Sutnga ⁵
Krem Kot Syrti	..	Lum Shnong

1. Ki Hadem ki ngeit ba u syiem jong ki u mih na ka krem
 Marai. Namarkata, ki khein kyntang shibun ia ka.

2. Ki Syiem Jaintia hyndai ki shait pynrieh ia ki syiem kynthai
 bad shynrang hapoh ka krem syiem khnang ban lait na ka jingshah
 pyniap u syiem Malngiang.

3. La lap mynta ba don haduh 11 tylli ki krem pubon ha Syndai. Ka krem Amsohmahateng ka dei kaba dang shu lap shen.

4. Ka krem Sutiang ka dei ka kut jong u Iang Doloi ka Sutnga ha ka por ba ialeh thma bad ki phareng. Dei hangne ba ma u bad ki shipai jong u ki la rich ia lade.

5. Labit ka mut lymbil.

12. Ki Surok Heh bad ki shnong ba kongsan harud lynti.

(1) **Ka Surok na Jowai sha Shillong :** Ka iaidd lyngba ka Thadlaskein, Ummulong sha Shillong.

Na Ummulong lah ban leit shaduh Khanduli lyngba ka Wahiajer, Nartiang, Myngsngat, Kdiap, Namdong, Saitsama, Khanduli. Kawei pat ka lad ka khlad na Nartiang lyngba ka Nongjingi, Mookynshniam, Thangrain, Borato, Tahpat, Lokaro, Khanduli.

(2) **Ka surok na Jowai sha Haflong :** Ka iaidd lyngba ka Sabah, Jalong, Phra Mer, Shangpung, Raliang, Nongryngkoh, Khonshuang, Lookst, Priang, Iew Thymmei sha Haflong.

Don lai tylli ki surok rit kiba iasoh bad kane ka surok. Ka surok na Sabah sha Nartiang bad Nongjingi lyngba ka Nongbah ; kaba ar, na Jalong sha Mookynshnian ; kaba lai, na Raliang sha Borato bad Sahsnian lyngba ka Laskein.

(3) **Ka surok na Jowai sha Silchar bad Karimganj :** Ka iaidd lyngba ka Sabah, Jalong, Phra Mer, Tuber Kmai Shnong, Bapung, Pamura, Lad Rymbai, Dkhiah, Khliehriat, Byndihati, Umlong, Musiang Lamare, Wahiajer, Lumshnong, Sonapur, Ratacherra sha Silchar bad Karimganj.

Na Lad Rymbai don kawei ka lad kaba leit shaduh Dawki lyngba ka Rymbai, Bataw, Umlengsha, Lama Borkhat, Muktapur, Dawki. Shiwa ban poi ha Khliehriat pat don kawei ka lad kaba leit shaduh Umkyrpong, Saipung bad Khaddum lyngba ka Sutnga.

(4) **Ka surok na Jowai sha Dawki :** Ka iaidd lyngba ka Muphlang, Moopyut, Jarain, Amlarem, Nongtalang, Sohka, Dawki.

Na Amlarem kawei ka lad ka leit sha Muktapur lyngba ka Thangshrieh, Pdengshakap, Syndai bad Muktapur.

Nalor kitei don ruh shibun kiwei pat ki surok rit kiba ym lah ban buh lut hangne.

14. **Ki Development Block :**

Kyrteng (Ophis trei kam
(Headquarters)

Thadlaskein Development Block .. Thadlaskein

Khliehriat Development Block .. Khliehriat

Laskein Development Block .. Laskein

Amlarem Development Block .. Amlarem

14. **District Council :** Ka distrik ka la ioh la ka jong ka District Council naduh ka snem 1967. La tip ia

ka kum ka Jaintia Hills District Council. Ki nongsynshar trai ri hapoh jong ka ki long kumne :—

Doloi : Don 18 ngut ki doloi kiba don la ka jong ka jong ka Ilaka.

- | | | |
|-----------------|-----------------------|----------------|
| (1) Jowai | (2) Raliang | (3) Nartiang |
| (4) Mynso | (5) Nongtalang | (6) Narpuh |
| (7) Nongbah | (8) Nongjingi | (9) Rymbai |
| (10) Satpator | (11) Sutnga | (12) Shangpung |
| (13) Amwi | (14) Darrang | (15) Lakadong |
| (16) Nongkhlieh | (17) Shiliang Myntang | (18) Maskut. |

Ki Ilaka Doloi naduh 13 haduh 18 ki dei kiba dang mih hadien Mynshiwa ki don tang 12 doloi.

15. Ki Shnong ba kongsan :

Jowai : Ka long ka nongbah bad ka shnong kaba heh tam ha ka distrik. Ki briew ki la jan kot sha ka 9000 ngut ha ka Khanasmari 1971. Ka Ophis jong u Deputy Commissioner (Diputi komishnor) bad ka District Council ki don hangne. Ka jingleh niam Behdiengkhlam kaba heh tam bad kaba pawnam tam ha ka distrik ka ju don hangne man ka snem. La ker sawdong ia ka shnong da ka wah Myntdu. Shaphang shathie jong ka shnong ka don kawei ka them ba la khot ka 'Syntu Ksiar'. Ki briew

kiba kham bun hangne ki im na ka kam khaii, kam trei Ophis bad kam rep.

Nartiang : Ka long ka shnong kaba rim shibun. Ka niam Hindu ka dang neh haduh mynta naduh ka por ki syiem Jaintia hyndai. Hangne don lai tylli ki pung ba la ngeit ba la tih da ki shipai u Sajar Nangli hyndai. Don ruh shibun ki mawbynna kiba heh bad kiba rit. U mawbynna uba heh tam bad uba jrong tam u don hangne. U jrong haduh 8 metre bad u rben kumba 76 centimetre La pynieng ia une u maw da u Marphalyngki.

Wahiajer : Ka long ka shnong kaba rim shibun. Ka donnam na ka bynta u sohniamtra.

Sutnga : Ka long ka shnong kaba rim shibun. Hajan jong ka don kawei ka pung ha ka wah Waikhyrwi na kaba la ngeit ba la mih ki syiem Sutnga hyndai na ka Li Dohkha. Don ruh hangne ki mawbynna bad mawpun kiba sah nam naduh hyndai hynthai.

Shangpung : Ka don harud ka surok na Jowai shw Haflong. Ka pawnam na ka bynta u sohniamtra bad u shynrai uba bha eh.

Nongtalang : Ka don hajan Dawki. Ka long ka shnong kaba rim shibun. Nangne lah ban iohi ia ki thain jong ka Bangla Desh bad Jaintiapur.

Dawki : Ka don ha khappud ka Bangla Desh bad ka East Khasi Hills. Nangne don ka surok kaba pyniasoh bad ka Bangla Desh. Hajan jong ka don ka wah Umngot kaba long kawei na ki jaka khwai dohkha kaba ki briew ki shait smat ban khawi.

Borkhat : Ka dei ka shnong kaba la rim bha. Don kiba ong ba u syiem Borkuhain hyndai u shong hangne.

Rymbai : Ka donnam na ka bynta u dewiong.

Khliehriat : Ka dei ka shnong trei kam jong ka Khliehriat Administrative Unit bad ka Khliehriat Development Block. Ka don harud ka surok na Jowai sha Silchar bad Karimganj.

Lumshnong : Ka don harud ka surok na Jowai sha Silchar. Ka pynmih bun u sohniamtra.

Saipung : Ka dei ka shnong kaba rim tam jong ki Biato ne ki Hadem. Hangne don bun tylli ki khiew heh ba la shna da ki maw ia kiba la khot ki Mem Jubel. La ong ba la shna ia ki da u Lam Lir. Don kiba ngeit ba une u Lam Lir u dei uta u Sajar Nangli ba pawnam.

Moulsei : Ka don ha ka jaka kaba itynnad shibun harud ka wah Kupli. Ki bried kiba shong hangne ki dei ki Hadem.

Thuruk : Ka don halor u lum Umphung. Ki riewstad ki ngeit ba don u dewiong, ka umphniang bad ka par ksiar ha ki thain ba marjan bad kane ka shnong.


Ratacherra : Ka don ha khappud bad ka distrik Cachar hapoh Assam. Ki bried ki rep soh, kwai bad tympew.

Borato : Ka dei ka shnong kaba rim shibun. Hajan jong ka don ka dur ki masi lur u Miat Rynsut, u lok ka syiem Latympang.

TAINIA HILLS DISTRICT

Jinghatai

- Pud
- Wah
- Pud & wah
- Syntai Lum ▲▲
- Shnong . . ●●
- Surok Hah. ===
- Surok Rit. ---



**State Central Library
Government of Meghalaya
Shillong.**

Ka khana ka ong ba u Miat u dei uba bhabriew shibun. Ha kawei ka sngi katba ka syiem Latympang ka dang beh mrad ka la iohi ia u Miat ba u lur lyngkha. Ka dur jong u ka la pynshoh bieit ia ka bad ka la leh mynleh ud pang. Ki shakri jong ka ki la khot ia u Miat ban iarap ia ka. U Miat u la kohnguh bad u la bah ia ka sha iing. Hynrei ka syiem kam pyllait shuh ia u wat tang ban leit pyllait ia ki lyngkor na ki masi lur kiba don ha lyngkha. La ong ba u Miat u la iapoi kha noh bad ka hynrei kita ki masi ha lyngkha ki la kylla maw noh.

Bataw : Kane ruh ka long kawei na ki shnong kiba rim eh. Don kiba pyrkhat ba ka la long shisien ka lynti na kaba ki Shala ki la iaaid lyngba haba ki wan na shaphang mihngi.

Umkiang : Ka long ka shnong kaba heh ha khappud bad ka Bangla Desh.

Raliang : Ka long ka shnong kaba heh shibun. Ka donnam na ka bynta u sohniamtra

Bapung : Ka donnam na ka bynta ka jingdon u dewiong uba bha eh.

Nongbah : Ka long kawei ka shnong kaba heh shibun ha ka distrik.

Jingkylli

1. Dro ia ka map jong ka Jaintia Hills bad buh ia kine harum :—

(a) Ki Pud Sawdong

(b) Jowai, Amlarem, Khliehriat, Dawki, Shangpung
Looksi

- (k) Wah Myntdu, Wah Myntang, Wah Lukha, Wah Kupli.
 - (d) Lum Iakorsing, Lum Marangsih, Lum Tyrshang, Lum Tiniang.
 - (e) Ka surok na (i) Jowai sha Dawki (ii) Jowai sha Rata Cherra.
2. Iathuh ia ki Sub-division bad ki Administrative Unit baroh hapoh Jaintia Hills. Haei don ki ophis trei kam jong ki ?
 3. Kiei kine bad haei ki don ?
Thirshoisip ; Thangsyiem ; Waikhyiwi ; Urdula ; Umhang.
 4. Jer kyrteng ia ki shnat wah baroh kiba hap sha ka wah Kupli.
 5. Iathuh naei ki mih bad shaei ki tuid kine ki wah :--
Myntdu ; Kupli ; Myntang ; Umkhen.
 6. Iathuh ia ki jaka ba don kine ki kshaid :--
Kyu ; Tisha ; Synrang Rapati ; Litein ; Muwi ; Tdem.
 7. Jer kyrteng saw tylli ki pung hapoh ka distrik bad iathuh ia ki jaka ba ki don.
 8. Haei kine ki icw ki don ?
Musiang ; Mushai ; Kuksoo ; Pyngkhat ; Borkhat.
 9. Jer kyrteng saw jait ki jingthung ha Jaintia Hills bad iathuh ia ki jaka ba ki mih.

10. Lada phi iaid da ka kali na Jalong sha Khonshnong, kiei ki shnong kiba kham heh ba phi dei ban iaid lyngba ?
11. Iathuh kyrteng san tylli ki shnong ba kham heh ba phin iakynduh lada phi iaid da ka kali na Dawki sha Shillong lyngba ka Jowai.
12. Don katno tylli ki Ilaka Doloi ha Jaintia Hills ? Jer kyrteng shiphew tylli na ki.
13. Thoh katba phi tip shaphang kine ki shnong :--
Jowai ; Tuber ; Shangpung ; Nartiang ; Dawki ;
Syndai ; Rata Cherra ; Khliehriat.
14. Pyniadei ia ki jubab na ka liang kadiang bad ka liang kamon :—

Nuksa : Ka jubab ia ka (a) ha ka liang kadiang ka iadei bad ka (d) ha ka liang kamon. Ha ka jubab lah ban thoh tang (a)(d).

- | | |
|---|---------------------|
| (a) Ka wah Kupli ka mih na
shaphang | (a) Sutnga |
| (b) U Lum Maryngksih u don
shaphang shathie lam
sepagi na | (b) Laskein |
| (k) Ka Kshaid Khlieh Narwan
ka don hajan | (k) Syndai |
| (d) Ka Iew Thymmei ka don ha | (d) U Lum Iakorsing |
| (e) Ka krem Rupasor ka don ha | (e) Saipung |

- (g) Ka Ophis trei kam ka Laskuin. (g) Kupli.
Development Block ka don ha

15. Jied ia ki jubab kiba dei :—

- (a) U Lum Maryngksih u jrong (i) 1965 metre (ii) 1627 metre (iii) 1672 metre.
- (b) Ka wah Simlieng ka dei ka shnat jong ka wah (i) Myntdu (ii) Lukha (iii) Prang.
- (k) Ka Nan Sati Thang Im ka don hajan (i) Bataw (ii) kshaid Kaikada (iii) Syndai
- (d) Ka krem Labit ka don ha (i) Tarangblang (ii) Lumshnong (iii) Sutnga.
- (e) Ka Amlarem ka don harud ka surok na (i) Jowai sha Dawki (ii) Jowai sha Haflong (iii) Jowai sha Silchar.

16. Pyndap ia ki jaka ba suda :—

- (a) Ka ri War ka don shathie na——
- (b) Ka wah Kupli ka long pud ia ka Jaintia Hills bad ka——.
- (k) Ka wah Umkhen ka rung sha Karbi Anglong na ka jaka ba khot——.
- (d) Ka kshaid Urdula ka don shathie na——.
- (e) Ka pung Thadlaskein ka don harud ka surok na——
- (g) U lum——u long u lum bajrong tam ha Jaintia Hills.

17. Kdew ia ki kyrteng bym iadei jait (Nuksa : peit W. Khasi Hills).
- (a) Tiniang, Selim, Thirshojsip, Khynriam.
 - (b) Dikisim, Mynriang, Lenju, Lakyoh.
 - (k) Sohniamtra, kwai, sohtrun, sohjew.
 - (d) Marai, Krang Manik, Jalong, Kot Syrti.
 - (e) Mynso, Khlichriat, Nongkhlich, Rymbai.
-

D. WEST GARO HILLS

1. Ki Pud Sawdong

Shatei	..	Distrik East Garo Hills
Mihngi	..	Distrik East Garo Hills bad West Khasi Hills.
Shathic	..	Bangla Desh
Sepngi	..	Bangla Desh bad Distrik Goalpara (Assam).

2. **Ka rukom Synshar :** U Deputy Commissioner (Diputi Komishnor) u dei u khlich duh jong ka distrik. Ka Tura ka dei ka shnong ha kaba don ka ophis trei kam jong u. Ia ka distrik la phiah sha ki ar tylli ki Sub-division kumne :--

Kyrteng Ophis trei kam (Headquarters)

Tura	..	Tura
Baghmara	..	Baghmara.

Hapoh ka Tura Sub-division don ar tylli ki Administrative Unit kumne :--

Kyrteng Ophis trei kam (Headquarters)

Betasing	..	Betasing
Dadenggiri	..	Dadenggiri

(1) **Ki Ranab Lum ba shaphang shathie** : Ki don shaphang shathie ka distrik markhap bad ka Bangla Desh.

Ki jaka ki long kiba riat syriim ia ka ri war ha ri Khasi. Hapdeng ki ranab lum bad ka Bangla Desh don ki jaka madan kiba khim baroh shilynter ka khappud.

(2) **Ki Lum Pdeng** : Ka don ha khlich ki ranab lum bad hapdeng ka distrik. Ka long ruh ka bynta kaba jrong tam jong ka distrik.

(3) **Ki Sharing Lum ba Shatei** : Kane ka bynta ka don shaphang shatei jong ki Lum Pdeng. Ki lum ki noh suki suki haduh ban da poi ha East Garo Hills.

(4) **Ki Lum Madan ba shatei** : Ki kynthup ia ka jaka ba don ki kyntoit lum rit bad ki madan ba shaphang sepngi ka distrik.

4. **Ka Jinglong ka Suin Bneng :**

Ki jaka baroh ka distrik ki kham shit bad kham syaid ban ia ka ri Khasi bad Jaintia. U slap u jur bha hynrei u kham duna ban ia ha ri Khasi bad Jaintia.

5. **Ki Lum ne Syntai Lum ba kongsan :**

Lum Arbella : U don shaphang shathie lam mihngi na Rongram.

Lum Tura : U don shaphang mihngi na Tura.

Lum Ranggiri : U don shaphang shatei na Garobadha.

Lum Chitmang : U don shaphang shatei lam mihngi na Baghmara.

Lum Balpakram : U don shaphang mihngi na u lum Chitmang.

Ki Garo ki ngeit haduh mynta ba u lum Balpakram u dei u lum ba shong ki blei ki dken. Don bun ki khanatang kiba iathuh shaphang une u lum. Man ka por ju pynlong ka knia ka khriam sha kine ki blei. Don kawei ka pung kaba iong bha ha une u lum. La ngeit ba ka dei ka jaka sum jong ki blei hadien ba la dep thang ia ki riowiap.


6. Ki Wah ba kongsan : Baroh ki wah ki tuid sha ka wah Surma ha Bangla Desh bad sha Brahmaputra ha Assam.

(a) Ki Wah kiba tuid sha ka wah Brahmaputra :

Wah Jinjiram : Kane ka long ka wah kaba jrong bha. Ka long pud katto katne ia ka West Garo Hills bad ka Goalpara shaphang shatei bad ia ka Bangla Desh shaphang shathie. Ka mih na Agia hapoh ka distrik Goalpara. Baroh ki wah kiba tuid shaphang mihngi ki leit hap sha kane ka wah. Kiba kham kongsan na ki ki long ka wah Didak, wah Ringgi, wah Galwang, wah Ganol, bad wah Rongkhai.

Wah Didak : Ka mih na shaphang sepngi ka Anogiri. Ka long ka shnat jong ka wah Jinjiram.

Wah Ringgi : Ka mih na u lum Arbella. Ka leit hap sha ka wah Jinjiram.



Wah Galwang : Ka mih najan Galwanggiri. Ki shnat ba kongsan jong ka ki long ka wah Dimbri bad wah Singwill. Ka long ka shna' jong ka wah Jinjiram.

Wah Ganol : Ka mih na shaphang u lum Nokrek bad u lum Arbella. Ka wah Dilni ka long ka shnat ba kongsan jong ka. Ka leit hap sha ka wah Jinjiram.

(b) Ki Wah kiba tuid sha ka wah Surma :

Wah Simsang : Ka mih na shaphang shatei u lum Nokrek. Ka long ka wah kaba jrong bad kaba heh bha hapoh ka distrik. Ka long pud khyndiat bad ka West Khasi Hills Shiteng ka lynti jong ka ka don hapoh ka East Garo Hills. Ki shnat bakongsan jong ka ki long ka wah Ryndi, wah Rongkham, wah Rongdik bad wah Rom-bha. Ka long ka wah kaba pawnam shibun ha ka jingdon ki dohkha.

Wah Dareng : Ka mih na shaphang shathie u lum Nokrek.

Wah Bugi : Ka mih najan u lum Nokrek. Ka wah Norang ka dei ka shnat ba kongsan jong ka.

7. Ki Kshaid ba kongsan :

Kshaid Rongbang : Ka don ha ka wah Simsang hajan ka Rombagiri.

Kshaid Gongja : Ka don ha ka wah Gongja.

8. **Ki Iew ba kham kongsan** : Ia ki kirteng jong ki iew la khot kirteng kat kum ki shnong ba pynlong ia ki. Kita ki long kine :—

Iew Garobadha Iew Ampatigri Iew Kerapara

Iew Chokpot Iew Dimapara Iew Jengjalgiri

Iew Rongram Iew Baghmar

10. **Krem Pubon** : Haduh mynta dang lap tang kawei ka krem Pubon ba la khot ka Krem Siju. Ka long ka krem kaba ring shibun ia ki nongpeit kai bad nongiaid pyrthei.

11. **Ki Surok heh bad ki shnong ba kham kongsan harud lynti** :

(1) **Ka Surok na Tura sha Shillong** : Kawei ka lynti ka iaidd lyngba ka Assam lyngba ka Rongram, Asanangiri, Anogiri, Bajengdoba (East Garo Hills), Krishnai (Assam) Gauhati (Assam) sha Shillong.

Kawei pat ka surok ka iaidd lyngba ki lum Pdeng ka Meghalaya. Ka khlad na Asanangiri lyngba ka Songsak (East Garo Hills), Nongstoin (West Khasi Hills) sha Shillong.

(2) **Ka Surok na Tura sha Phulbari** : Ka iaidd lyngba ka Rongram, Rongchugri, Rongmachokgiri, Phulbari.

(3) **Ka Surok na Tura sha Baghmara** : Ka iaidd lyngba ka Adugiri, Kherapara, Machangpani, Dalu, Baghmara. Don ar tylli kiwei ki surok thymmai kiba khlad na Adugiri lyngba ka Chokpot bad na Machangpani lyngba

ka Gasuapara. Na Baghmara lah ban leit shaduh Shillong lyngba ka Balat.

(4) **Ka Surok khappud naduh Phulbari haduh Maheshkhola** : Ka iaid lyngba ka Hallidayganj, Garobadha, Mahendraganj, Purakhasi, Dalu, Baghmara, Maheshkhola.

Nalor kitei ki surok don ruh 'bun bah ki surok rit kiba poi sha kiba bun ki jaka kyndong ka distrik.

12. Ki Development Block

Kyrting ki Block :		(Ophis trei kam) Headquarters)
Rongram	Asananggre
Dalu	Barenggapara
Betasing	Betasing
JigJag (Jikjak)	Jik Jak
Selsela	Selsela
Dadenggre	Dadenggre
Chokpot	Chokpot
Dambuk Aga	Baghmara
Rongara	Rongara.

13. District Council

Don tang kawei ka District Council na ka bynta ka East bad West Garo Hills. Ki Nokma [bad ki Laskar kiba long ki nongsynshar trai ri ki hap hapoh ka jingpeit ka District Council.

Nokma : Ki dei ki kynja nongsynshar bad ki trai khyndew.

Laskar : Ki long kum ki kynja sordar ba la thung da ka District Council halor ka jingai jingmut ki Nokma. Ki bishar ia ki mokotduma kiba rit bad ki pynbeit ia ki jingiakajia ha shnong.

14. Ki Shnong ba kongsan :

Tura : Ka dei ka nongbah jong ka distrik. Ka don ha trai u lum Tura. Ka kirteng tynrai jong ka ka long Dura kaba mut 'U. Blei uba heh' (big God). La pynkylla kirteng ia ka naduh ka por ba wan ki phareng. Ki briew ki don kumba 15,000 ngut. Hangne don ka Ophis jong ka District Council bad kiwei kiwei ki Ophis Sorkar. Ka Ophis jong ka Education Board ka Meghalaya ka don hangne.

Baghmara : Ka don ha khappud ka Bangla Desh harud ka wah Simsang. Ka donnam na ka bynta ki dohkha kiba bang.

Dalu : Ka don ha khappud bad ka Bangla Desh harud ka wah Bugi. Ka donnam na ka bynta ka jingrep kba.

Mahendraganj : Ka don ha tduh eh jong ka distrik harud ka wah Jinjiram. Ki briew kiba bun hangne ki dei ki Ajong.

Phulbari : Ka don shaphang shatei ka distrik. Ka donnam na ka bynta ka jingpynmih kynphad, sainalia bad dohkha.

Siju : Ka don shaphang shatei na Baghmara. Ka donnam na ka bynta ka krem pubon kaba ki Garo ki khot ka Dobak Kol, kaba mut, ka krem lymbit. Sawdong jong ka don bun bah u dewiong bad u mawramsang.

Nongalbibra : Ka don harud ka wah Simsang sepngi na Williamnagar. Ka pawnam na ka bynta u dewiong bad ka jingpynmih ding ilektrik na u dewiong. Ka long ka shnong kaba roi shibun.

Jingkylli :

1. Dro ia ka map West Garo Hills bad buh ia kine harum :—
 - (a) Ki Pud Sawdong.
 - (b) Tura, Baghmara, Rongram, Phulbari, Dalu, Mahendraganj.
 - (k) Wah Simsang, Wah Bugi, Wah Singwill, bad wah Didak
 - (d) Lum Tura, Lum Balpakram, bad lum Arbella.
2. Pyniabynta ia ka West Garo Hills kat kum ka jinglong ka mariang.

3. Naci mih bad shaei tuid ka wah Jinjiram ?
4. Iathuh ia ki kyrteng jong ki Block baroh. Jer kyrteng ruh ia ki Ophis trei kam jong ki.
5. Jer kyrteng saw tylli ki shnong ba kham heh kiba don harud ka surok na Tura sha Baghmara.
6. Thoh katba phi tip shaphang kine :—
Tura ; Siju ; Nongalbibra ; Baghmara.
7. Jied ia ka jubab kaba dei :--
 - (a) Ka wah Simsang ka mih na (i) Lum Nokrek (ii) Lum Tura (iii) Lum Arbella.
 - (b) Ka wah Rombha ka dei ka shnat jong ka wah (i) Banda (ii) Simsang (iii) Galwang.
 - (k) Ki Laskar ki dei ki (i) trai khyndew ha Garo Hills (ii) ki nongbishar ia ki mokotduma rit (iii) Ki dei ki shipai Garo.
 - (d) U Lum Tura u don (i) Sepngi na Tura (ii) Shatei na Tura (iii) Mihngi na Tura.
8. Pyndap ia ki jaka ba suda :--
 - (a) Ki———ki dei ki nongsynshar trai ri bad ki trai khyndew ha Garo Hills.
 - (b) Ka Pubon ba pawnam eh ha West Garo Hills ka don ha———.

(k) Ki Administrative Unit hapoh ka Tura Subdivision
ki long ka—— bad ka——.

(d) Ka wah Ringgi ka dei ka shnat jong ka wah——

E. EAST GARO HILLS

1. Ki Pud Sawdong :

Shatei .. Distrik Goalpara (Assam)

Mihngi .. Distrik West Khasi Hills bad
West Garo Hills.

Shathie .. Distrik West Garo Hills.

Sepngi .. Distrik West Garo Hills.

2. Ka Rukom Synshar : U Deputy Commissioner (Diputi Komishnor) u long u khlieh jong ka distrik. Ka Williamnagar ka dei ka jaka ba don ka ophis trei kam jong u. Don tang kawei ka Administrative Unit hapoh jong ka. La khot ia ka ka Resubelpara Administrative Unit bad ka Ophis trei kam jong ka ka don ha Resubelpara.

3. Ki Bynta ba kongsan ka Mariang :

(1) Ki Lum Pdeng : Ka kynthup ia ka bynta kaba shaphang shathie eh jong ka distrik. Ka long ruh ka bynta kaba kynjang tam ha ka distrik. U Lum Nokrek u don ha kane ka bynta.

(2) **Ki Sharing Lum ba shatei** : Kine ki lum ki noh suki suki na ki Lum Pdeng haduh ban da poi ha ki jaka ba kham madan ka distrik.

(3) **Ki Lum Madan** : Ki kynthup ia ki lum rit kiba don ha ki jaka ba kham madan markhap bad ka ri Thor ka Assam. Ka long ka jaka kaba kham bun biew bad kaba kham seisoh.

4. **Ka Jinglong ka Suin Bneng** : U slap u kham jur ha ki Lum Pdeng. Ka Suin bneng kam da shit ne khriat eh.

5. **Ki Lum ne Syntai Lum :**

Lum Nokrek : U long u lum uba jrong tam ha ri Garo. U don shaphang shathie lam sepugi na William nagar. U jrong kumba 1418 metre lane 4652 phut.


Lum Mangri : U don shaphang shatei lam mihngi na Williamnagar.

6. **Ki Wah ba Kongsan :**

(a) **Ki wah kiba tuid sha ka wah Brahmaputra :**

Wah Ildek : Ka mih najan Mangsang. Ki Khasi ki khot ia ka ka wah Rydiak. Ka long pud khyndiat bad ka West Khasi Hills.

Wah Monda : Ka mih najan Songsak. Ka wah Chichra ka long ka shnat ba kongsan jong ka. La khot ruh ia ka ka wah Dudhnai ha Assam.



Wah Damring : Ka mih na sha ki thain u lum Arbella. Ka wah Rongre ka long ka shnat ba kongsan jong ka. La tip ruh ia ka kum ka wah Krishnai ha Assam.

Wah Didram : Ka mih na shaphang Anogiri. La tip ruh ia ka kum ka wah Jinari ha ri Thor Assam.

(b) **Ki Wah kiba tuid sha ka wah Surma ha Bangla Desh :** Don tang kawei ka wah na kane ka distrik kaba tuid sha ka wah Surma ha Bangla Desh. Kata ka dei ka wah Simsang. Shiteng jong kane ka wah ka don ha West Garo Hills.

7. Ki Kshaid :

Kshaid Mokma : Ka don ha ka wah Chichra hajan Nongbak.

Kshaid Chibok : Ka don ha ka wah Chibok shaphang shathie na Rongrenggiri.

8. Ki Pung :

Pung Khasek : hajan Songsak ka long kaba heh shibun. Don shibun ki nongiaid pyrthei kiba wan peit kai ia kane ka pung.

9. Ki Iew ki hat ba kongsan :

Ki iew kiba kham kongsan ki don ha Rongjeng bad Simsanggiri.

10. **Ki Jingthuug jingtep ba kham kongsan :** Ki ki jingthung jingtep ba kongsan long u kba, kynphad, sainalia, sohniamtra bad kiwei kiwei.

11. **Ki Surok Heh bad ki shnong ba kham heh harud lynti :--**

(1) **Ka Surok na Williamnagar sha Tura :** Ka iaid lyngba ka Simsanggiri, Rongrenggiri, sha Tura. Na Rongrenggiri ka don kawei ka surok kaba leit shaduh Mendi-pathar lyngba ka Songsak.

(2) **Ka Surok na Wiliamnagar sha Damra (Assam) :** Ka iaid lyngba ka Nongalbibra, Darugiri, Rongjeng, Wageasi, Dainadubi sha Damra. Lah ruh ban leit na kawei pat ka lynti lyngba ka Songsak.

(3) **Ka Surok na Williamnagar sha Shillong :** Kawei ka lynti ka iaid lyngba ka Damra ha Assam. Kawei pat ka iaid lyngba ka Songsak ne Nongalbibra, Darugiri sha Shillong lyngba ka Nongstoin.

(4) **Ka Surok na Williamnagar sha Baghmara :** Ka iaid lyngba ka Nongalbibra, Siju, Rewak, Karukol, Baghmara. Na Baghmara lah ban leit shaduh Shillong lyngba ka Balat.

Nalor kitei don ruh shibun ki surok rit ha kylleng ka distrik.

12. **Ki Development Block :**

Kyrteng	Headquarters ne Ophis Trei kam
Resu	.. Resubelpara
Songsak	.. Songsak
Rongjeng	.. Rongjeng
Samanda	.. Samanda

13. District Council :

Kane ka distrik ka iadon bynta lang bad ka Garo Hills District Council ha kaba ka Ophis trei kam jong ka ka don ha Tura. Ki Nokma bad ki Laskar ki don kumba don ha West Garo Hills.

14. Ki Shnong ba kongsan :

Williamnagar : Ka dei ka shnong thymmai ba la pynlong ruh kum ka nongbah jong ka distrik. Ka don harud ka wah Simsang bad marjan bad ka Simsanggiri. Ia kane ka kyrteng la ai kum ka jingai burom ia u Williamson A. Sangma uba la long u Chief Minister ne Myntri Rangbah Duh ka Jylla uba la mih napdeng ki Garo. La pyniasoh ia kane ka shnong bad baroh ki shnong kiba kham heh ha Meghalaya.

Simsanggiri : Ka long ka shnong kaba kham heh kaba don marjan bad ka Williamnagar. Ka don harud ka wah Simsang.

Darugiri : Don hangne ka khlaw Sorkar ba la thung ia ki dieng na ka bynta ban pyndonkam ha kaba ring sainar ilektrik.

Rongrenggiri : Ka don harud ka wah Simsang. La tip ia ka kum ka shnong kaba khadduh eh ba ki Garo ki ialeh pyrshah ia ki phareng.

Karkutta : Ka don ha khappud bad ka Assam. Ka long ka shnong khaii kaba heh shibun. Ka pynmih u kwai, tympew, laha bad kynphad.

Rajasimla : Ka don markhap bad ka Karkutta.
Ka pynmih bun bha u sohniamtra.

Mendipathar : Ka long ka shnong kaba heh shibun
markhap bad ka Assam.

Resubelpara : Ka don sepngi na Mendipathar.
Ka pawnam na ka bynta ka Umshit kaba don hangta.

Bajengdoba : Ka don harud ka wah Didram. Ka
pawnam na ka bynta ki dohkha.

Dainadubi : Ka don harud ka wah Monda ne
Dudhnai. Ka donnam na ka bynta ka umsoh bad ka jing-
pynjuh ia ki hati khlaw.

Jingkylli :

1. Dro ia ka map East Garo Hills bad buh ia kine harum :
 - (a) Ki Pud Sawdong.
 - (b) Williamnagar, Songsak, Rongjeng, Mendipathar,
Rongrenggiri.
 - (k) Lum Mangri, Lum Nokrek.
 - (d) Wah Monda, Wah Damring, Wah Ildek.
2. Kiei ki bynta ha kongsan jong ka jingsynshar sorkar
ha East Garo Hills. lathuh ia ki jaka ba don ki
Ophis trei kam jong ki.
3. Jer kyrteng ia ki shnong baroh kiba don harud ka surok
na Williamnagar sha Damra.

4. Jer kyrieng ia ki Block baroh hapoh ka East Garo Hills.
Jer kyrteng ruh ia ki jaka ba don ki Ophis trei
kam jong ki.
5. Thoh katba phi tip shaphang kine harum .
Williamnagar, Darugiri, Rongrenggiri, Dainadubi.
6. Jied ia ki jubab kiba dei :--
 - (a) U lum Nokrek u jrong (i) 1814 metre (i') 1418 metre
(iii) 1481 metre.
 - (b) Ka wah Monda ka mih najan (') Mangsang (i) u
Lum Artella (iii) Songsak.
 - (k) Ka kshaid Mokma ka don ha ka wah (i) Chichra
(i) Chibok (iii) Ildek.
 - (d) Ka umslut ka don ha (i) Raja Simla (ii) Re ubel-
para (iii) Dainadubi.
7. Pyndap ia ki jaka ba suda :--
 - (a) U lum ——— u long uba jrong tam ha Garo Hills.
 - (b) Shathic jong ka East Garo Hills ka dei ka distrik ———
 - (k) Ka wah ——— ka dei tang ma ka ka wah ba kham
neh kaba tuud sha ka wah Surna
 - (d) Ka pung ——— ka don hajan Songsak.

— — — — —

B Y N T A III.

MEGHALAYA

LYNNONG 1.

KI JINGTIP BA DONKAM

1. **Ka Jingsdang ka Meghalaya :** Ka Meghalaya ka long kawei na ki 22 tylli ki Jylla jong ka ri India. La pynlong ia ka da ki lai tylli ki distrik kiba mynshiwa ba la tip kum ka Khasi Hills, Jaintia Hills bad Garo Hills. Kine ki distrik ki don mynshiwa hapoh ka Jylla Assam. Naduh ka 2 tarik u Iaiong (April) 1970 ki la ioh la ka jong ka jingsynshar ba la tip kum ka Autonomous State of Meghalaya. Kane ka rukom synshar kam shym ioh ia ka bor kaba pura kum kiwei pat ki Jylla ka ri India. Dei naduh ka 21 tarik u Kyllalyngkot (January) 1972 ba ka sorkar kmie ka la ai ka bor ba pura ia ka Meghalaya kum kiwei pat ki Jylla ha ka ri. Ia ka kyrteng Meghalaya la ai da uwei u rangbah uba kyrteng u Dr. S. P. Chatterjee. Ka ktien Meghalaya ka mut, 'Ka jaka shong jong u Lyoh'. Ngi lah ban ong ba ka Meghalaya ka long kawei na ki Jylla kaba itynnad tam ha ri India.

2. **Ki Pud Sawdong :**

Shatei	.. Assam.
Mihngi	.. Assam.
Shathie	.. Bangla Desh.
Sepngi	.. Bangla Desh bad Assam

3. **Ki Distrik bad ki Ophis trei kam jong ki :** Ia ka Khasi Hills mynshiwa la phiah sha ki distrik East bad

West Khasi Hills. Ia ka Garo Hills pat la phiah sha ki distrik East bad West Garo Hills. Ka Jaintia Hills ka sah kumjuh kine harum ki long ki distrik bad ki jaka trei kam. jong ki :--

Distrik	Ophis trei kam (Headquarters)
East Khasi Hills ...	Shillong.
West Khasi Hills. ...	Nongstoin
Jaintia Hills ...	Jowai
East Garo Hills ...	Williamnagar
West Garo Hills ...	Tura.

4. Ka jingheh bad jingbun briew :

Ka Jingheh ...	Kumba 23,000 skwer kilometre
Jingbun briew (1971)	10 lak tam
Shynrang ...	5 lak tam
Kynthei ...	5 lak duna
Ki briew ha Sor	Shi lak shiteng

Ki briew ha

Kyndong Phra lak shiteng.

La antad ba ki briew hapoh Meghalaya kin yrn duna ia ka 13 lak ha ka Khanasmari 1981 (Ka jingkiew kaba 3.15%).

5. **Ki Sor hapoh Meghalaya :** Haduh mynta don
6 tylli ki Sor Rit hapoh ka Jylla. Kita ki long kine :—

Kyrteng

Ka jingdon ki brieve

Shillong Municipality	..	87 hajar
Shillong Cantonment	..	5 hajar
Nongthymmai	..	16 hajar
Mawlai	..	14 hajar
Jowai	..	9 hajar
Tura	..	15 hajar.

La khmih lynti ba ha ka Khanasmari ka snem
1981, ki brieve ha sor Shillong kin palat ia ka shi lak bda
kan sa long ka Sor Bah.

LYNNONG 2

KA JINGLONG KA MARIANG

1. Ki Lum Rit ka Meghalaya :

Ia ka Jylla la pynlong da ki lai tylli ki kyntoit
Lum Rit kumne :--

- (1) Ki Lum Khasi ne Khasi Hills ha ki distrik
East bad West Khasi Hills.
- (2) Ki Lum Jaintia ne Jaintia Hills ha ka distrik
Jaintia Hills.
- (3) Ki Lum Garo ne Garo Hills ha ki distrik
East bad West Garo Hills.

Kine baroh lai tylli ki kyntoit Lum Rit ki don ha ujuh u Lynter lum uba iaaid na mihngi sha sepngi. U long kum u mot hapdeng ki madan bah jong ka Assam shaphang shatei bad ka Bangla Desh shaphang shathie.

2. Ki bynta ba iapher jong ka Jylla :

Lah ban pyniabynta ia ka Jylla ha ki saw tylli ki bynta kat kum ka jinglong ka mariang.

Ki Ranab Lum ba Shathie : Ka kynthup ia ka, ri War ha ri Khasi bad Jaintia bad ki ranab lum ka ri Garo Ki long ki jaka kiba don bun bah ki them, ki lhuh, ki riat bah, ki kshaid, ki rynsan lum, bad kiwei kiwei. Ki jaka ha kane ka bynta ki ioh kh'm bun u slap bad ki kham syaid.

Ri Khasi ka mut ka East bad West Khasi Hills ha kaba ki shong ki Khasi ; Ri Jaintia ka mut ka Jaintia Hills ha kaba ki shong ki Pnar kiba long ruh ki Khasi bad Ri Garo ka mut ka East bad West Garo Hills ha kaba ki shong ki Garo ne Achik

(2) **Lum Pdeng :** Ka kynthup ia ki jaka kiba jrong tam ka Jylla. Ki syntai lum kiba jrong tam jong ka Jylla ki don ha kane ka bynta Ki jaka ki long kiba kham khriat bad jur slap.

(3) **Ki Sharing Lum ba Shatei :** Ka kynthup ia ka ri Bhoi jong ka ri Khasi bad ki sharing Lum ba shatei jong ka ri Garo. Ki jaka ki kham shit bad u slap u kham duna

(4) **Ka Ri Thor :** Kane ka kynthup ia ka bynta ba shaphang shatei eh bad sha sepngi jong ka ri Garo. Ki jaka ki shit bha bad u slap u kham duna.

3. **Ki Wah :** La tip ia ka Meghalaya kum ka Jylla kaba jur slap tam ha ka pyrthei. U slap u ai ha ngi shibun tylli ki wah. Ka jingdon u lynter lum na mihngi sha sepngi ka pynlong ia ki wah ba kin tuid shaphang shatei sha ka wah Brahmaputra bad shaphang shathie sha ka wah Surma. Peit ia kine ha ka map jong phi.

(1) Ki wah kiba tuid sna ka wah Brahmaputra ki long ka wah Kupli, Umkhen, Umiam Khwan, Umtrew, Khri, Manda, Damring Jinjitam bad kiwei kiwei.

(2) **Ki Wah kiba tuid sha ka wah Surma :** Ka wah Lukha, Myntdu, Umngot, Umnub, Umiew, Umngi, Kynshi, Simsang, Dareng bad Bugi.

4. **Ki Kshaid :** Ka jingjur u slap, ka jingbun ki wah bad ka jinglong ki lum hapoh ka Jylla ki ai ha ngi bun bah ki kshaid kiba jrong bad kiba itynnad kham tam ha ka por heh um mynlyiur. Teng teng yn shem ba ka mariang ka sain dur ia ki kshaid ha ka rukom kaba itynnad shibun. Ki kshaid kiba khambun ki don tang ha ka por lyiur. Ha ka por tlang ki jah noh ne ki rit. Namar ka jingbun ki kshaid ha ka Jylla ngi lah ban ong ba ka Meghalaya ka dei ka ri jong ki Kshaid. Niar koit ki ri ha ka pyrthei ki ban don bun ki kshaid kumba don ha ka Jylla Meghalaya. Ki Kshaid kiba kham pawnam ha ka jingheh ne jingitynnad ki long ka Kshaid Lynshiang, Kshaid Shad thum, Kshaid Kyrshoh Nianglong, Kshaid Nohsngithiang, Kshaid Iale bad bun kiwei pat.

5. **Ka Jinglong ka Suin Bneng :**

Ki Lum Pdeng jong ka Jylla ki kham jrong bad kham khriat ban ia kiwei pat ki bynta jong ka. Kine ki

ki ioh thah kumba ar ne lai bnai ha ka shisnem. U slap u jur bha ha ka Jylla baroh kawei. U slap uba bun eh u hap ha ka por lyiur. Ki jaka kiba phai shaphang shathie ki ioh kham bun u slap namar ki lyer slap ki wan boh na shaphang shathie lam sepngi. Ka shnong Mawsynram bad Sohra ha khlieh ri War ki long ki shnong Khasi kiba jur slap tam ha ka pyrthei.

LYNNONG 3

KI BRIEW BAD KI KAM JONG KI

1. Ki Briew :

Ki Khasi bad Garo ki dei ki trai shnong ba nylla jong ka Jylla Meghalaya naduh barim bajah. Baroh ar ki khein jait bad hiar pateng ha ka ioh ka kot na ka liang kynthai. Ia ki Khasi hapoh Jaintia la khot ruh ki Pnar. Ha ka por jong ngi mynta ki la don ruh shibun kiwei ki jaitbynriew kiba la wan shong wan sah bad long trai shong ha Meghalaya.

Ia ki Khasi la pyniabynta kyllum kumne :—

(1) **Ki Nongphlang ne Khynriam** : Ki shong ha ki Lum Pdeng jong ka ri Khasi.

(2) **Ki War** : Ki don ha ki thain ri War jong ka ri Khasi bad Jaintia.

(3) **Ki Bhoi** : Ki don ha ri Bhoi.

(4) **Ki Mikir** : Ki don ha ki thain ri Bhoi. Kine ki la kylla Khasi na ka jingiashong kha khleh bad ki Bhoi. Kiba bun na ki ki khein jait na ka liang shynrang.

(5) **Ki Hadem ne Biate** : Ki don ha ki thain phang mihngi ka ri Jaintia.

(6) **Ki Lyngngam** : Ki don ha ri Lyngngam.

(7) **Ki Dyko** : Ki don hapdeng ri Lyngngam bad ri Garo.

2. **Ki Jingtrei jingktah** :

Ki jait jingtrei jingktah bakongsan ha Meghalaya ki long kumne harum :--

(1) **Ka Rep** : Ki briew kiba bun eh ha Meghalaya ki dei ki nongrep. Ki jingrep ba kongsan ki long u kba, u riewhadem, u phan, u kwai, tymphew, ki jait soh ba bun jait, ki jhur ba bun jait bad kiwei kiwei.

(2) **Ka ri Jingri** : Don tang khyndiat eh ki briew ha ka ri jong ngi kiba im beit tang na kaba ri jingri. Ka kam ri jingri ka dei tang ka kam synrop kaba iaid lang bad ka rep. Ki jingri ba kongsan ki kyuthup ia ki masi, blang, kulai, sniang, syiar, bad kiwei kiwei.

(3) **Ka kam Tih Par** : Don katto katne ki briew kiba im na ka kam tih par kum u dewiong, mawshun, silimanite bad kiwei kiwei.

(4) **Ki kam Trei Kti** : Don shibun ki kam trei kti kiba ki Khasi bad Garo ki tbít eh. Kita ki long ka kam thain jain, thain kriaah, thain shang, thain shylliah bad bun kiwei kiwei.

(5) **Ki kam Karkhana** : Ki kam Karkhana ki dei ki jait jingtrei kiba dang kham thymmai hapoh ka Jylla.

Haduh mynta ki dang don tang khyndiat eh ki karkhana kiba kham thikna. Don shibun ki lad ki lynti ba lah ban plie thymmai ia ki karkhana Rit bad Heh ha ka Jylla. Ka jingbym lah ban plie ia ki ka long bunsien eh namar bym don ki trai shnong kiba la pyntbit ha kine ki jait kam. Ki Karkhana ba kham kongsan kiba don mynta ki long kine harum :—

(a) Ka Karkhana pynmih dewbilat ha Mawmluh (Mawmluh Cherra Cement Limited). Kane ka long ka Karkhana kaba heh tam ha ka Jylla.

(b) Ka Karkhana pynmih Plywood ha Byrni (The Meghalaya Plywood Limited).

(k) Ki Karkhana Rit kiba pynmih ia ki jait mar ba bun jait kum ki wait, mohkhiew, tari, sdie bad kiwei. Kine ki don ha Myllem, Laitlyngkot, Mawkdok bad shawei shawei. Mynhyndai ka ri Khasi ka pawnam shibun ha kaba pynmih bad sain in ka nar kaba bha eh. Ia kane ka nar la salan sha ri dkhar. Ka jingpynmih nar ka duh noh naduh ba wan ki phareng namar ki wan rah ia ka nar kaba kham tad dor. Ka Byrni bad ka Mendipathar ki long ki jaka ba la sdang ban mih ki karkhana rit bad heh ha ka Jylla.

(6) Ka kam Pynmih ding ilektrik : Kane ka long kawei na ki kam kaba donkam eh ha ka ri jong ngi. Ia kane ka kam lah ban nang pynheh bad pyniar shuh. Lah ruh ban die ia ka ding ilektrik sha kiwei ki Jylla ba marjan. Ki jaka pynmih ding ilektrik mynta ki long kine :—

(a) Ka Umiam ha Barapani (Umiam Hydel Project).

- (b) Ka Kyrдем Kulai hajan Umsning (Kyrдем Kulai Hydel Project).
- (k) Ka Umtrew hajan Byrni (Umtru Hydel Project)
- (d) Ka Nongalbibra (Garo Hills Thermal Project) ha West Garo Hills.
- (e) Ka Kupli (Kopili Power Project) hapdeng Jaintia Hills bad Assam.

(7) **Ka kam Khaii** : Ki briew ha ka Jylla ki la nang bun. Ki jingmih bad ki jingdonkam ruh ki la nang bun man ka snem. Ka khaii pateng ruh ka nang jur. Haduh mynta, ia ki kam khaii kiba kham bun la bat da ki briew kiba nabar ka Jylla.

(8) **Ka kam Shakri** : Don bun ki briew ha ka Jylla kiba im tang na ka kam shakri. Kiba kham kongsan na ki ki long ka kam irei ophis, bylla kit nong, bylla sngi, hikai skul, die jingdie, bad bun kiwei kiwei.

3. **Ki Jingmih ba kham kongsan ba salan sha ri dkhar :**

(1) **Ri Khasi bad Jaintia** : Phan, sohphoh Nong-khlaw, dieng sawdong, lasi (latyrpad), 'seh khlein, mawshun, shun, dewbilat bad kiwei kiwei. Nalor kine, la die ruh shibun ka ding ilektrik sha Assam.

(2) **Ri Garo** : Kynphad, Sainalia, diengsawdong, sying. bad kiwei kiwei.

4. **Ki mar ba kongsan ba wan rah na shabar :**

Don bun bah ki jingdonkam ka Jylla ba la wan rah na shabar. Kiba kham kongsan ki long ki jain, ki tiar

shet, ka kotsada, ki jait kor ba bun jait, ki kali, ka umphniang petrol, umphniang bam, u khaw, ka shini, u slasha, u atta, ka dohkha, ka mluh bad kiwei kiwei.

LYNNONG 4

KI JINGTHUNG JINGTEP BAD KI PAR

1. **Ki Jingthung jingtep** : Kine harum ki long katto katne ki jait jingthung jingtep ha ka Jylla.

Kba : U long u jai jingthung ba kham kongsan ha ka Jylla. Don bun jait ki jait kba ba la rep kat kum ka jinglong ki jaka. U kba u donkam kham bun ka um bad u kham iadei ha ki jaka shit. Lah ban rep kba ha lum ne pynthor. Bunsien u kba pynthor u kham bha ban ia u kba lum. Ki thain kiba pynmih kba shibun ki long ka ri Bhoi, ki khappud ka Assam bad Bangla Desh, bad ha kylleng ki Lum Pdeng ka Jylla

Riewhadem : U dei u jingbam bynrap jong kiba bun ki briew. U dei u jingthung lum uba donkam shibun ka um. U met bha ha ki thain ri Bhoi bad ki Lum Pdeng

Phan Mynngor : U long uwei na ki jingthung ka Jylla ba la rep na ka bynta ban salan. U mih bha ha ki jaka ba kham duna ka um. Lah ban thung ha ki pynthor kba shiwa ban rep kba bad ha kper ne ha lum. Ka ri Khasi ka ju long naduh mynhyndai kaba pawnam shibun ha ka jingpynmih phan.

Phankaro : U mih ha kylleng ka Jylla. U kham met ha ki thain ri War bad ri Bhoi.

Kait : Don bun jait ki kait. Ki mih ha kylleng ka Jylla lait noh ki Lum Pdeng kiba kham jur ka jing-khriat. Ka kait kaba bun eh ka mih na ki thain ri Bhoi.

Solphoh Nongkhlaw : U long u jait soh uba kordor shibun na ka bynta ban salan. La shem ba u ai ka jing-myntoi kaba kham bun ban ia kino kino kiwei pat ki jait jingthung. U mih bha ha ki jaka kiba kham khriat.

Sohniamtra : U dei u jait soh uba pawnam shibun naduh mynshiwa kham tam hapoh ri Khasi. U mih bha ha ki thain ri War bad ri Bhoi. U donkam shibun ka um slap bad ka sboh.

Sohtrun : U mih bha ha ki jaka kiba syaid kum ha ki thain ri War bad ri Bhoi.

Sohjew : Don bun jait ki sohjew kiba mih ha kylleng ka Jylla. Ki jait sohjew kiba kham kongsan ki long u sohkwit, soh nairiang, soh mad, soh sying, soh myndong, bad kiwei kiwei.

Sying : Don ar jait ki sying. U Sying bah bad u Sying makhir. Ki mih bha ha ki thain ri War bad ri Bhoi namar ba ki kam syaid bad ka khyndew ka kham sboh. U slap uba jur eh u lah ban pynsniew ia u sying.

Sohmynken : Don bun jait ki sohmynken. Ki mih ha kylleng ka Jylla.

Kwai bad Tympew : Ki mih bha ha ki jaka kiba kham shit kum ha ri War bad ri Bhoi.

Lasi ne Latyrapad : La pyndonkam ha kaba shet jingtah bad kaba shna umphniang iwbihi. Ka mih bha ha ki jaka ba kham syaid. Ka mih ha ki thain ri War bad la shem ba ka mih bha ha ki thain ri Bhoi ruh. La ju salan bun bah ka lasi sha ri dkhar.

Tipui ne Sohmrit Khlaw : U long u jait jingthung uba rem dor shibun. U mih bha ha ki thain ri War.

Synsar : Dang shen ki briew ki sdang ban rep ia u namar u iaid bha ha ka salan. U mih bha ha ki thain ri War bad ri Bhoi namar ki kham syaid.

Phlang Sohmat (Citronala) : Une u dei u jait phlang iwbihi uba kordor shibun. La pyndonkam ha kaba shna umphniang iwbihi. U mih bha ha ki thain ri Bhoi.

Ki Jhur : Don bun jait ki jait jhur ba lah ban thung ha ka Jylla. Ia ki jhur kiba kham bun la thung ha ki jaka rud Sor namar ki kham iaid ha kaba die ia ki. Kine ki kynthup ia u kubi, u tyrsu, u muli, soh lakum, kajor, sohbaingon, ki jait ri ba bun jait, pathaw, sohkhia bad bun kiwei pat.

Kynphad : U mih ha ka jaka kiba kham syaid bad kham madan. U mih bha ha ki thain ba shaphang shatei ka ri Garo. Ia u kynphad la salan sha ri dkhar na ka bynta ban thain jain.

Sainalia : U mih ha ki jaka ba bun bha ka umi. U mih ha ki pynthor jong ka ri Garo. La ju salan ia u sainalia sha ri dkhar.

Nalor kitei don ruh shibun kiwei pat ki jait jingthung kiba mih khyndiat khyndiat ha kylleng ka Jylla.

2. **Ki Par** : Ki par kiba kham kongsan kiba don ha ka Jylla jong ngi ki long kine harum :--

Dewiong : U don ha kylleng ka Jylla kham tam ha ki bynta kiba shaphang shathie. Ia u dewiong uba kham bun la ju tih na ki thain Sohra bad Laitryngew. La ngeit ba u dewiong uba bun eh u don ha ri Garo.

Mawshun ne Mawramsong : Don bun bah u mawshun ha ka Jylla. U don ha ki sharing lum ba shaphang shathie jong ka Jylla naduh ri Garo haduh ri Jaintia.

Silimanite : U don tang ha ri Lyngngam sawdong jong ka Mawthengkut ne Sunapahar. U Silimanite ha Meghalaya u long hapteng uba bha tam ha ka pyrthei. Ka Meghalaya ke long ka nongpynmih Silimanite kaba bun eh ha ri India.

LYNNONG 5

KI LYNTI SYNKIEN

Don lai jait ki lynti hapoh ka Jylla kiba iarap ia ka leit ka wan ki briew. Kita ki long ki lynti iaid Liengsuin ne eroplein (Aeroplane), ki surok kali bad ki lynti iaid briew. La khmih lynti ba kan don sa ka lynti iaid rel na Gauhati sha Byrni ha ki khyndiat snem ki ban wan. Haba shna ia ki surok kali bad ki lynti iaid kjat ngi ioh ruh bun tylli ki jingkieng ba la pun lyngba ki wah bah bad wah rit.

1. **Ki Lynti Liengsuin** : Don ar tylli ki jaka hiar liengsuin ha ka Jylla. Ki don ha Umroi bad ha Pomlum (Upper Shillong). Na ki katto katne ki daw ka jinghiar ki liengsuin ha Umroi ka la sangeh shipor hynrei mynta ki la sdang hiar biang Ha Pomlum pat ki hiar tang ki liengsuin rit jong ki shipai.

2. **Ki Surok Kali** : Ngì la pule shaphang ki surok kali haba ngi pule ia ki distrik. Mynta ngin iapeit tang ia ki surok bah kiba pyniasoh ia ki shnong heh jong ka Jylla bad katto katne kiwei pat ki shnong heh hapoh Assam (peit ia kine ha ka map jong phi).

(1) **Ka Surok na Shillong sha Tura bad William-nagar lyngba ka Gauhati** : Man ka sngi ki don ki kali kiba leit na Shillong sha Tura lyngba kane ka surok. Ka iaìd lyngba ka Nongpoh, Gauhati, Dudhnai, Krishnai, Resubelpara, Bajengdoba, Rongram, Mura. (Ka Gauhati, Dudhnai, bad Krishnai ki don hapoh Assam). Ka surok kaba leit sha Williamnagar ka khlad na Dudhnai sha Damra, Mendi-pathar, Songsak, Williamnagar.

(2) **Ka Surok na Shillong sha Tura bad William-nagar lyngba ka Nongstoin** : Kane ka surok kam shym pat bha mynta. Ki kali ki iaìd teng teng na kane ka surok. Ka surok ka leit lyngba ka Mairang, Nongstoin, Riango, Rongjeng, Darugiri sha Williamnagar ne Tura.

(3) **Ka Surok na Shillong sha Tura lyngba ka Balat** : Ka iaìd lyngba ka ri War khap Bangla Desh. Ki shnong kiba kham kongsan harud lynti ki long ka Mawsynram, Balat, Baghmara, Adugiri, Tura.

(4) **Ka Surok na Shillong sha Silchar bad Karimganj :** Ki kali ki iaid man ka sngi lyngba kane ka surok. Ka surok ka iaid lyngba ka Mawryngkneng, Jowai, Khliehriat, Silchar ne Karimganj. Ka surok sha Silchar bad Karimganj ka khlad na Badarpur hapoh ka distrik Cachar.

(5) **Ka Surok na Shillong sha Haflong :** Ka iaid lyngba ka Mawryngkneng, Jowai, Shangpung, Raliang, Haflong. Ki kali ki kham duna ha kane ka surok namar ki nongleit nongwan kim don shibun.

3. **Ki Jingkieng :** Ka Jingdon shibun ki surok ha ka por mynta ka pynioh ruh ha ngi shibun ki jingkieng ba la pun lyngba ki wah heh bad wah rit. Ki jingkieng ki iarap ia ki briew ban leit jingleit da ka kjat na kawei ka jaka sha kawei pat. Ki Jingkieng kiba kham itynnad ha ka Jylla ki long ka Jingkieng hajan Dawki ba la pun lyngba ia ka wah Umngot, ka Jingkieng hajan Umpung ba la pun lyngba ia ka wah Umngi bad ka Jingkieng ha Baghmara ba la pun lyngba ia ka wah Simsang. Nalor ki jingkieng surok ki don ruh ki jingkieng iaid briew ba la pun da ki siej ha ka dur u simpyllieng ne ka ryntieh. Kiwei pat ki shna jingkieng da kaba shu pynsdien da ki thri na shiliang sha shiliang jong ka wah. Ia ki um kiba kham rit la shu buh tang da ki dieng sawdong bad lyntang. Nalor kitei ngi shem ruh bun tylli ki jait Jingkieng ha ri War ba la shna da ki thied jong ki dieng jri. Ki long kiba itynnad shibun bad ki neh katba ka dang im kato ka dieng jri.

LYNNONG 6

KI KHLAW

1. **Ki Jait Khlaw :** Ki khlaw ki long ka spah ba la buh da ka mariang. Ki khlaw ha ka Jylla ki la nang duh

katba nang mih ki snem. Kine harum ki long ki jait khlaw kiba kongsan ha ka Jylla :—

(1) **'Law ri sumar** : Ki dei ki jait khlaw kiba ki trai jong ki ki don hok tang ia ki khlaw ba ki sumar. Ka khyndew ka dei ka jong ka Sorkar ne District Council.

(2) **'Law ri kynti** : Ki dei ki khlaw kiba ki trai ki don hok halor ka khyndew bad halor ki khlaw.

(3) **'Law Kyntang ne 'Law Adong** : Ki dei ki khlaw ba la buh kyrpang na ka bynta ka niam ka rukom.

(4) **'Law Lyngdoh** : Ki dei ki khlaw ba la ai kyrpang da ka hima ne ka kur ia ki Lyngdoh.

(5) **'Law Shnong** : Ki dei ki khlaw ba la buh kyrpang da ka shnong na ka bynta kino kino ki jingdonkam jong ka.

(6) **'Law Raid** : Ki dei ki khlaw paitbah jong kano kano ka shnong ne hima ba lah ban pyndonkam paitbah. Bun kine ki khlaw kim don shuh mynta.

(7) **'Law Akhing** : Ki dei ki jait khlaw hapoh ri Garo. Mynshiwa kine ki khlaw ki hap hapoh ki Nokma. N. duh ka snem 1952 ka District Council ka la shimti hi noh sha lade ia kine ki khlaw baroh. Ki Nokma ki ioh tang shi bynta na ka musur jong ka dor ki dieng haba ka District Council ka die ia ki.

(8) **'Law Sorkar** : Ki dei ki khlaw ba la pyncyrypang bad sumar da ka sorkar. La khot ia ki ki Reserved Forest bad ki Protected Forest

2. Ki Jingmyntoi na ki Khlaw :

(1) Ki pynsboh ia ka khyndew bad ki bat ia ka sboh na ka jingkit noh ka umslap.

(2) Ki pynneh ia ki umpohliw. Ki umpohliw ki rit ne jah noh hadien ba la pynkhuid ne pom ia ki dieng na ki khlaw.

(3) Ngi ioh ia ki dieng sawdong ban shna iing ne shna tiar bad salan ia ki sha ri dkhar.

(4) Ngi ioh ia kiba bun ki mar khlaw kum ka dieng akor, snep dieng ba bun jait, siej, thri, laha, tiewdieng, bad kiwei kiwei.

(5) Ki ai jaka shong ia ki sim bad ki mrad khlaw.

3. Ki Jait Dieng ba kham kongsan :

(1) **Dieng kseh** : Ka mih ha ki jaka lum kiba kham khriat. Ki dieng kseh ha ka Jylla ki long hapdeng kiba bha tam ha ka pyrthei.

(2) **Dieng blei ne sal** : Ki mih bha ha ki thain ri Bhoi bad ki jaka kiba markhap bad ka ri thor Assam. Ki long ki jait dieng kiba bha, kiba eh bad kiba rem dor shibun.

(3) **Dieng Bti** : Ki mih ha ki thain ri War bad ri Bhoi. Ki long ki jait dieng kiba ch, kiba itynnad bad kiba rem dor shibun.

4. Ki daw kiba pynjot ia ki khlaw :

(1) Ka jingpluh jong ki khlaw. Kane ka mih na ka jingwieng ding kai jong ki briew bad ka jingbret ding khlem akor jong ki nongiaid lynti.

(2) Ka jingthang shyrti re thang ram ka pynjulor shibun ia ki khlaw. Ka dang don mynta ha ri War, ri Bhoi bad ri Garo. Ka jingsynlen jong ki lum Khasi bad Jaintia ka mih na ka jingthang ram jong ki tymmen hynda

(3) Ka jingpom diengsawdong ia ki dieng kiba. tit kiba dang dei ban heh bad san shibun

(4) Ka jingthang rnga bad jingthoh dieng iap kaba khlem da khein ia ki jingmyntoi kiba lah ban pynmih hadien.

5. Ki Lad ban pynneh bad pynroi ia ki khlaw :

(1) Dei ban thung dieng thymmai man ka por ha ki lum bad jaka bym pat don dieng.

(2) Dei ban sumar kaba bret ding kulmar bad kaba wiang ding kai ia ki khlaw.

(3) Dei ban sangeh ia ka rukom shyrti bad thang ram.

(4) Dei ban pom dieng sawdong tang ia ki dieng kiba la san pura.

(5) Ym dei ban thang rnga bad thoh dieng iap ia ki dieng bha.

LYNNONG 7

KI MRAD KHLAW BAD KI JINGRI

1. Ki Mrad Khlaw :

Mynshiwa don bun bah ki mrad khlaw ha ka Jylla. Kita ki kynthup ia ki hati, ki niangbri, ki bthong, ki sier, ki skei, ki dngiem, ki khla, ki myrsiang, ki sim babun jait bad bun kiwei kiwei Kine ki mrad ki la duna shibun mynta namar ka jingiai pyniap ki nongbeh mrad bad ka jingnang duh jong ki khlaw. Lehse ka por kan ym slent ba kine ki mrad khlaw kin duh neh syndon na la

Jylla jong ngi. Ki mrad khlaw kiba kham bun mynta ki don ha ki khlaw Narpuh, ha ri Bhoi, ha ri Lyngngam bad ha ri Garo.

2. Ki Jingri :

Kine ki kynthup ia ki masi, ki blang, ki muid, ki kulai, ki hati, ki miaw, ki ksew, ki syiar bad kiwei kiwei.

Masi : Ki don ha kylleng ka Jylla lait noh tang ha ki jaka ba kham riat kum ha ri War. Ka masi ka ai ha ngi ia ka dud, ka khi, ka sboh, ka snieh, ka doh bad kiwei kiwei. Ki masi kyrtong pat ki lur ia ki lyngkha bad teng teng ki ring ia ki kali dieng.


Blang : Ki don ha kylleng ki jaka ba don ki masi. Ki ai ha ngi ia ka doh, ka snieh bad ka sboh.

Muid : Ki don ha ki thain ri Bhoi bad ki jaka ba kham madan. La pyndonkam ia ki ha kaba lur lyngkha, ring dieng sawdong, ring kali dieng bad kiwei Ngi ioh ruh ia ka dud, ka snieh, ka doh bad ka sboh.

Kulai : Ngi kham shem ha ki Lum Pdeng ka Jylla. La pyndonkam ia ki ha kaba kit jingkit, kaba ring kali dieng, kaba shong briew haba leit jingleit, kaba ia mareh thong bad ka kam ialeh thma.

Hati : Ngi shem ia ki ha ki jaka ba kham madan kum ha ri Bhoi. La pyndonkam ia ki ha kaba kit jingkit bad kaba ring dieng sawdong.

Miaw : Ngi shem kylleng ki jaka. La ri ia ki na ka bynta ban kem khnai.



Ksew : Ki don ha kylleng ki jaka. La ri ia ki ha
ing ban iada na ki nongshun bad ban leit beh mrad.

Syiar : Ki don ha kylleng ka Jylla. Ki ai ha ngi
ia ki pylleng, ka doh bad ka sboh.

Jingkylli : (La Kynthup ruh ia ki jingtip ba la thoh ha ki
distrik).

1. Dro ia ka map Meghalaya bad buh ia kine harum :—
 - (a) Ki Pud Sawdong.
 - (b) Rongram, Simsangiri, Rongjeng, Baghmara, Riango, Mairang, Sohra, Nongpoh, Shillong, Khliehriat, Nartiang bad Jowai.
 - (k) Wah Simsang, Wah Kynshi, Wah Umiam Khwan bad Wah Lukha.
 - (d) Lum Tura, Lum Chitmang, Lum Iawpaw, Lum Raitong, Lum Maryngksh, Lum Bah-bo-bah-kong.
2. Jer kyrteng ia ki distrik hapoh Meghalaya bad ai ia
ki jaka ba don ki ophis trei kam jong ki.
3. Pyniabynta ia ka Jylla kat kum ka jinglong ka mariang.
4. Jer kyrteng san tylli ki wah kiba tud sha ka wah Brahma-
putra.
5. Jer kyrteng san tylli ki jait jingtrei jingtah jong ki
briew hapoh Meghalaya Batai katba phi tip
shaphang kawei na ki.
6. Jer kyrteng san jait ki jait jingmih ha Meghalaya ba
salan sha ri dkhar bad san jait ba wan rah na ri
dkhar. Balei donkam ban wan rah ia ki tiar na
shabar ka Jylla ?

7. Thoh katba phi tip shaphang kaba rep ia kine ki jinghung hapoh ka Jylla Meghalaya : kba, soh-phoh Nongkhlaw, sohtrun, kynphad.
8. Thoh katba phi tip shaphang kine ki par : Dewiong, mawshun, silimanite.
9. Jer kyrteng ia ki jait lynti synkien baroh kiba don hapoh ka Jylla Meghalaya. Haei don jaka hiar liengsuin ?
10. Thoh katba phi tip shaphang kine ki jait khlaw :
 (a) 'Law ri sumar (b) 'Law Kyntang (k) 'Law raid
 (d) 'Law akhing (e) 'Law sorkar.
11. Kiei ki jingmyntoi ba ngi ioh na ki khlaw ?
12. Kiei ki daw kiba pynjot ia ki khlaw ? Kiei ki lad ba lah ban pynneh ia ki ?
13. Kiei ki jingmyntoi ba ngi ioh na kine ki jait mrad ? masi, kulai, muid, syiar.
14. Jied ia ka ne ki jubab kiba dei :—
 (a) Ka ktien Meghalaya ka mut (i) Ka ri jong u slap (ii) ka jaka shong jong u lyoh (iii) ka ri lum ba pynggad.
 (b) Ki Hadem ki don shaphang (i) sepngi ka West Khasi Hills (ii) mihngi ka East Khasi Hills (iii) mihngi ka Jaintia Hills.
 (k) Ka Rongjeng ka don harud ka surok na Shillong sha Tura lyngba ka (i) Gauhati (ii) Nongstoin (iii) Balat.
 (d) Ka dieng Sal ka mih bha ha ki thain (i) Ri War (ii) Ri Bhoi (iii) Ri Lum Pdeng.
 (e) Ki mrad khlaw mynta ki la nang duh namar (i) ki briew ki la nang bun (ii) ka jingiap khlam ki mrad (iii) ka jingduh noh ki khlaw.

- (g) Ki jaka pynmih ding ilektrik ki don ha (i) Umtrew
 (ii) Umiam (iii) Kyrdem Kulai (iii) Sohra
 (iv) Nongstoin (v) Nongalbibra (vi) Kynshi.

15. Pyndap ia ki jaka ba suda :-

- (a) Ka Meghalaya ka ioh ia ka Jylla kaba pura ha ka——
 (b) Don —— tylli ki Sor Rit ha Meghalaya.
 (k) Ia ki lai tylli ki kyntoit lum rit ha Meghalaya
 la khot —— .
 (d) Ki trai shnong nylla jong ka Meghalaya ki dei ki——
 (e) Ka Karkhana Plywood ha Meghalaya ka don ha——
 (g) Ia u phlangsohmat la pyndonkam ha kaba shna——

BYNTA IV

KA RI INDIA BAD KI JYLLA MIHNGI

LYNNONG 1

KI JINGTIP BA DONKAM

1. **Ka Jingsdang :** Ka ri India ka don hapoh ka Khyndew Bah Asia. Ha ki por kham mynshiwa la synshar ia ka da ki syiem kiba pher ba pher na kawei ka por sha kawei pat. Dei naduh ka jingwan synshar ki Phareng ba ngi sa ioh ia ka ri India kumba ka long mynta. Ka ri India ka la ioh ia ka jinglailtuid na ka jingsynshar ki Phareng naduh ka 15 tarik u Nailar (August) 1947. Naduh ba la ioh ia ka jinglailtuid, ka ri India ka la sdang ban iaaid shaphrang ha kiba bun ki bynta kum ka jingnang jingstad, ki lynti synkien, ki karkhana heh bad rit bad kumta ter ter.

2. Ki Pud Sawdong :

Shatei .. China, Nepal bad Bhutan.

Mihngi .. Burma, Bangla Desh bad Bay of Bengal.

Shathie .. Indian Ocean.

Sepngi .. Arabian Sea bad Pakistan.

3. Ka Jingheh :

Ka ri India ka iar kumba 3200 Kilometre na mihngi sha sepngi bad 3000 Kilometre na shatei sha shathie. Ka jingheh ka don kumba 33 lak skwer Kilometre.

4. Ka Jingbun briew :

Ha ka snem 1961 ki briew ki don kumba 44 klur katba ha ka snem 1971 pat ki briew ki la jan kot sha ka 55 klur. Lehse ha ka snem 1981 ki briew kin palat ia ka 70 klur.

5. Ka Jinglong ka Mariang :

La ker kut ia ka ri India na shaphang shatei bad Mihngi da ki Lum Bah Himalaya bad na shathie da ka duriaw bah Indian Ocean. Ki jaka kiba kham bun ki long kiba shit bha ha ka por Lyiur. Ki jaka ha ri lum ki long kiba pyngngad. U slap uba kham bun u hap ha ka por lyiur. La pynbynta ia ka ri India sha ki saw tylli ki bynta ba kongsan kat kum ka jinglong ka Mariang :-

(1) Ki Lum Bah ba shatei ki kynthup ia ki sharing lum jong ki Lum Bah Himalaya bad ki Lum Rit jong ki Jylla Mihngi.

(2) Ka Madan Bah ba shatei ha baroh arliang
ki wah Ganges bad Brahmaputra.

(3) Ki Lum Lyndiang jong ka Deccan shaphang
shathie jong ki Madan Bah.

(4) Ka Madan rud Duriaw kaba don lajan bareh
shi lynter ka rud duriaw.

6. Ki Jylla bad ki nongbah jong ki :

Don 22 tylli ki Jylla (State) bad 9 tylli ki Jylla
Rit (Union Territory) ha ri India. Kita ki long kine :-

Jylla (State)	Nongbah
Andhra Pradesh Hyderabad
Assam Dispur
Bihar Patna
Gujarat Gandhinagar (Ahmedabad)
Haryana Chandigarh
Himachal Pradesh Simla
Jammu & Kashmir Srinagar
Karnataka Bangalore
Kerala Trivandrum
Madhya Pradesh Bhopal
Maharashtra Bombay
Manipur Imphal
Meghalaya Shillong
Nagaland Kohima
Orissa Bhubaneshwar

Punjab	Chandigarh
Rajasthan	Jaipur
Sikkim	Gangtok
Tamil Nadu	Madras
Tripura	Agartala
Uttar Pradesh	Lucknow
West Bengal	Calcutta

Jylla Rit (Union Territory) :

Andaman bad Nicobar	Port Blair
Arunachal Pradesh	Itanagar.
Chandigarh	Chandigarh
Dadra bad Nagar Haveli	Silvassa
Delhi	Delhi
Goa, Daman bad Diu	Panaji
Lakshadweep	Kavaratti
Pondicherry	Pondicherry
Mizoram	Aizawl

(Ka Chandigarh ka long ka nongbah jong ka Haryana, Punjab bad Chandigrah).

LYNNONG 2.

KI JINGMIH BAD KI MAR SALAN BA KONGSAN

1. Ki Jingthung Jingtep :

(a) **Ki Mar Bam** : U kba, u kew, u riewhadem, u phan, u slash, u pai (na uba ngi ioh ia ka shini), ki jait soh ba bun jait bad kiwei kiwei.

(b) **Ki Mar Karkhana** : U kynphad, u sainalia, ka jri, duma sla bad kiwei kiwei.

2. **Ki Par** : u dewiong, par nar, par tama, mica, umphniang petrol, mawshun bad kiwei kiwei.

3. **Ki Jingmih na ki Karkhana** : Ki lieng ne jhad, ki jait nar ba bun jait, ki jain, shini, kotsada, sai byrni, ki dawai babun jait, ki kali, ka sboh bad bun kiwei kiwei.

4. **Ki Jingri** : Don kumba 35 klur ki jingri kat kum ka jingniew ha ka snem 1971. Kine ki kynthup ia ki masi, ki langbrot, ki blang bad ki muid.

5. **Ki Mar salan shabar ri** : Ki kynthup ia u sainalia, sai byrni, slash, ki snieh miad, ki kynja umphniang bam, laha, dewiong bad kiwei.

6. **Ki Mar ba thied na shabar ri** : Ki kynthup ia ki jait kor shna jingshna ba bun jait, ki kali, ka umphniang petrol, ka kotsada, ki jait dawai, kynphad, u kew bad u khaw.

LYNNONG 3

KI LYNTI SYNKIEN.

1. **Ki Surok Kali** : Ki Surok bah bad surok rit ki don ha kylleng ka ri India. Ki surok kali ki poi wat shaduh ki kyndong tam jong ka ri bad ki jaka lum. Ki Surok bah ki pyniasoh ia baroh ki shnong kiba heh jong ka ri India. Ki la pynsuk shibun ia ka leit ka wan, ki brierw.

2. **Ki Lynti Rel** : Don bun bah ki lynti rel hapoh ri India. La pyniaid ia ki kat kum ki dong ba iapher iapher jong ka ri la khot ki Zone. Don baroh 9 tylli ki Zone.

3. **Ki Lynti Jhad ne Lieng** : Ki lieng bad ki jhad rit ki iaid lyngba ki wah bah kum ka Ganges bad Brahmaputra. Ki Jhad heh ki iaid tang ha ki duriaw Bay of Bengal, Indian Ocean bad Arabeen Sea.

4. **Ki Lynti Liengsuin** : Ki la don shibun ki jaka hiar Liengsuin ne eroplein ha ri India. Ki liengsuin ki la pynsuk bad pynstet shibun ia ka iaid ka ieng ki briew ha ki por mynta. Ki jaka hiar liengsuin kiba kham heh ki long ka Delhi, Calcutta, Madras, Bombay, Hyderabad Nagpur.

LYNNONG 4

KI JYLLA SHATEI LAM MIHNGI.


1. **Ki kyrteng ki Jylla** : Don san tylli ki Jylla (State) bad ar tylli ki Jylla Rit (Union Territory). Ki Jylla ki kynthup ia ka Assam, Meghalaya, Manipur, Nagaland, bad Tripura. Ki Jylla rit ki long ka Arunachal Pradesh bad ka Mizoram.

2. **Ka Jinglong ka Mariang** : Baroh ki Jylla lait noh ka Assam bad ka Tripura ki dei ki Jylla ri Lum. U slap u jur bha ha ki jaka baroh. Man ka snem ju don ka jingshleu um ha kylleng ka Assam. Ki jaka ha ri lum ki kham pyngngad ban ia ki ri Thor bad ri Madan. Ka wah bah Brahmaputra kaba mih na ki lum bah Himalaya ka iaid lyngba ka ri Assam. Ha baroh ar liang jong

Shatei

INDIA

Ki jylla bad ki
Nongbah



ka don ka Madan Bah ha kaba don ki jaka rep kiba seisoh shibun. Lah ban pynbynta lyngkot ia ka jinglong ka Mariang kine ki Jylla ha ki lai tylli ki bynta kumne :-

(1) **Ki Lum Bah shaphang shatei** : Ki kynthup ia ki sharing jong ki lum bah Himalaya. Kine ki ker ia kine ki Jylla na shaphang shatei bad na shaphang mihngi.

(2) **Ki Madan Bah ka wah Brahmaputra bad ka wah Surma** : Baroh ar ki don ha Assam.

(3) **Ki Lum Rit** : Kine ki kynthup ia ki Lum Rit jong ka Meghalaya, Mizoram, Nagaland, bad Manipur.

3. **Ki Jingmih ba kongsan :**

(1) **Ki Jingthung Jingtep :**

Kba : U mih bha ha ki madan bah jong ka wah Brahmaputra bad ka wah Surma. U mih ruh katto katne ha ki Jylla ri Lum.

Slasha : U mih bha ha Assam. La ju salan ia u slasha jong ka Assam shabar ka ri India.

Phan : U mih bun eh ha Meghalaya.

Pai ne Sugar cane : U mih ha kylleng ki jaka kham tam ha Assam.

(2) **Ki Par :**

Umphniang Petrol : Ka Digboi ha Assam ka pyn mih bun bah ka umphniang petrol.

Dewiong : Don shibun u dewiong ha Assam bad Meghalaya.

Mawshun : U mawshun u don bun eh ha Meghalaya.

Silimanite : U don tang ha Meghalaya.

(3) Ki Jingri :

Ki jingri kiba kham bun ki don ha jaka ba kham madan. Ka Assam ka don bun eh ki jingri. Ki kynthup ia ki masi, ki blang, ki langbrot bad ki muid.

4. Ki Lynti Synkien : Ki lynti synkien ki dang duna shibun ha baroh ki Jylla jong kine ki thain. La pyniasoh ia ka ri India bad kine ki Jylla tang da i bynta iba rit hapteng ka Assam bad West Bengal hajan Siliguri. Ki lynti synkien ba kongsan ki long kumne harum :--

(1) Surok Kali : Don kawei ka surok bah kaba pyniasoh ia ka ri India bad ki Jylla shatei lam mihngi. Kane ka iaidd lyngba ka Assam shaduh Dibrugarh. Dei tang ki surok kali kiba la kham pynsuk ia ka leit ka wan jong kine ki Jylla kham tam ki Jylla ri Lum.

(2) Lynti Rel : Ki lynti rel ha kine ki thain ki hap hapoh ka North Eastern Frontier Railway Zone. Ka Headquarters ne Ophus trei kam ka don ha Gauhati ne Maligaon. Ka lynti bah ka iaidd naduh Siliguri bad New Jalpaiguri ha West Bengal haduh Tinsukia. Ki steshon kiba kham heh ki long ka New Bongaigaon, Rangya, Gauhati, Chaparmukh, Lumding, Dibrugarh bad Tinsukia. Shiwa ban poi ha Gauhati don kawei ka Jingkieng kaba jrong bad kaba skhem bha ba la pun lyngba ka wah Brahmaputra. Ha kane ka jingkieng don ka lynti rel, ka surok kali bad ka lynti iaidd briew.

Don kawei ka tnad lynti rel kaba pait na Rangya kaba leit shaduh Murkongselek lyngba ka Tezpur bad ka North Lakhimpur. Kawei pat ka tnad ka pait na Lumding bad ka leit sha Silchar bad Dharmanagar hajan Karimganj

lyngba ka Haflong. La khmih lynti ba yn sa don shen ka lynti rel na Gauhati sha Byrni hapoh Meghalaya.

(3) **Lynti Liengsuin** : Ki jaka sangeh Liengsuin kiba, kham kongsan ki don ha Gauhati, Dibrugarh, Imphal, Silchar bad Agartala.

(4) **Ki Lynti Jhad ne Lieng** : Don tang katto katne ki lieng rit bad ki jhad rit kiba iaid ha ka wah Brahma-putra. Kiba bun ki wah rit jong kine ki thain kim long kiba bit ban iaid lieng namar ki bun eh ki lad lad.

5. **Ki Briew** : Kane ka thain ka don ka jinglong kaba kyrpang na kiwei pat ki thain ha ka liang ka jingdon jong ki jaitbynriew kiba iapher iapher. Kine ki jaitbynriew ki iapher shibur kawei na kawei pat bad ki kren ki ktien kiba iapher bak lbak kawei na kawei pat. Ki jait briew ba kongsan ki long ki Assamese, ki Bengali, ki Kachari, ki Khasi, ki Garo, ki Manipur, ki Mizo, ki Naga, ki Hmar, ki Kuki, ki Mikir, bad bun kiwei pat.

6. **Shikyntien shaphang ki Jylla Shatei lam Mihngi :**

(a) **Assam** : Ka long ka Jylla kaba heh tam na ki Jylla Shatei lam Mihngi ka ri India. Ka don kumba 78 Skwer kilometre ka jingheh. Ki briew ki don kumba 15 millian. Don ar tylli ki wah bah ha ka, ka wah Brahma-putra bad ka wah Surma. Ki bynta kiba kham bun ka Jylla ki don ha ki madan bah jong kine ar tylli ki wah. Ki jaka lum ki long syriem ia ka ri Khasi bad Jaintia. Ka Dispur ka dei ka nongbah jong ka.

Ki briew kiba kham bun ki im na ka rep. Ki jingrep ba kongsan ki long u kba, u slasha, sainalia, u

pai bad bun kiwei pat. U slasha nangne u long uba pawnam shibun. Kiwei pat ki jingmih ka Jylla ki long ka um-phniang petrol, u dewiong bad kiwei. Ia ki briew kiba shong ha ka la khot ki Assamese. Don ruh kiwei pat ki briew kum ki Bengali, ki Khasi, Garo, Mikir bad kiwei kiwei.

Ka Jylla ka don ka lynti rel kaba iaid napdeng jong ka bad kaba don shibun ki tnad jong ka. Don ruh bun tylli ki surok kiba pyniasoh ia ki kyndong jong ka Jylla baroh.

(b) **Manipur** : Ka dei ka Jylla kaba dang mih shen ryngkat bad ka Jylla Meghalaya. Ka don kumba 22 hajar skwer kilometre bad ki briew ki don kumba 11 lak. Ka bynta kaba kham bun jong ka Jylla ka long ka ri Lum ha kiba ngi shem ia ki Naga, ki Kuki, ki Hmar bad kiwei. Ha ki medan pat ngi shem kham bun ki briew ba la tip kum ki Manipuri. Ki briew kiba kham bun ki im na ka rep kum u kba, u riewhadem, u pai bad kiwei. Don tang kawei ka surok kali kaba pyniasoh bad kiwei ki Jylla kaba iaid lyngba ka Nagaland. Don ruh kawei ka jaka hiar liengsuin ha Imphal.

(k) **Nagaland** : Ka long ka Jylla ri Lum bad ka nongbah jong ka ka long ka Kohima. Ka heh kumba 16 skwer kilometre bad ki briew ki don kumba 5 lak. Ia ki briew kiba don ha ka la khot ki Naga. Ki briew kiba kham bun ki im na ka rep kum u kba, riewhadem, phan bad ki soh babun jait. Dang don bun bah ki khlaw bah na kiba lah ban ioh bun ki dieng sawdong. Ka Jylla ka la ioh bun tylli ki surok kali naduh ba ka la ioh ia la ka jong ka Jylla.

(d) **Tripura** : Ka la ioh ia ka Jylla kaba pura ryngkat bad ka Meghalaya. La ker kut ia ka lajan baroh sawdong da

ka Bangla Desh. Ka heh kumba 10,500 skwer kilometre bad ki briew ki don kumba 16 lak. Ka Jylla baroh kawei ka long kaba madan lait noh ki katto katne ki jaka markhap bad ka Mizoram. Ki briew kiba kham bun ki im na ka rep. U Kba u long u jingrep ba kongsan. Ka Agartala ka dei ka nongbah jong ka.

(e) **Mizoram** : Ka dei ka Jylla Rit ba dang loh shen ryngkat bad ka Jylla Meghalaya. Ka long ka Jylla ri Lum. Ia ki briew kiba don hangne la khot ki Mizo. Ka Aizawl ka dei ka nongbah jong ka. Ka heh kumba 21 hajar skwer kilometre bad ki briew ki don palat 3 lak. Ki briew kiba kham bun ki im na ka rep. Ki lynti synkien ki la nang kham bun katba nang mih ki snem.

(g) **Arunachal Pradesh** : Kane ka long kawei pat ka Jylla Rit kaba dang mih shen ryngkat bad ka Meghalaya. Ka don markhap bad ka China. Ka don ha ki sharing lum jong u lum bah Himalaya. Ka long ka jaka kaba khriat bha. Ki briew kiba don hangne ki dei ki riw-lum. Ka Itanagar ka dei ka nongbah jong ka. Ka heh kumba 84 hajar skwer kilometre bad ki briew ki don kumba 5 lak. Ki briew kiba kham bun ki im na ka rep kum u kba, u krai, u riwhadem bad kiwei. Don shibun ki khlaw bad ki mrad khlaw.

7. Ki Shnong kiba kham kongsan :

Gauhati : Ka don harud ka wah Brahmaputra hapoh ka distrik Kamrup. Ka dei ka shnong kaba heh tam ha ki thain ba shatei lam mihngi ka ri India. Ka dei ka shnong khaiti kaba heh shibun. Hangne don ka jaka pynkhuid umphniang petrol. Ka Dispur kaba long ka nongbah jong ka Assam ka don markhap bad ka.

Dibrugarh : Ka don harud ka wah Brahmaputra.
Ka long ka shnong khaii kaba heh shibun.

Imphal : Ka dei ka nongbah jong ka Manipur.
Ka long ka shnong kaba heh hapdeng ka madan bah
kaba don sawdong jong ka. Ka pawnam na ka bynta ka
jingpynmih khaw bad jain. Ka dei ruh ka shnong khaii
namar ka dei ka jaka pdeng jong ka Jylla.

Kohima : Ka dei ka nongbah jong ka Nagaland.
Hajan jong ka don u lum uba jrong bha ba ki khot u
Lum Japho. U long u lum uba jrong tam hapoh Nagaland

Aizawl : Ka dei ka nongbah jong ka Jylla rit
Mizoram. Ka shnong ka la nang heh bad ka la nang roi
ha kine ki khyndiat snem ba la dep. Ka long ka jaka
lum ha kaba shitom bha ban ioh um.

Itanagar : Ka dei ka nongbah jong ka Arunachal
Pradesh. Ka shnong ka la nang roi bad nang heh.

Jingkylli

1. Jer kyrteng ia ki Pud Sawdong ka ri India.
2. Kiei ki bynta ba kongsan ka ri India kat kum ka
jinglong ka mariang ?
3. Katno tylli don ki Jylla bad Jylla Rit ha ri India ?
Jer kyrteng san tylli ki Jylla bad lai tylli ki Jylla rit.
4. Jer kyrteng ia ki jait mar ba salan shabar ka ri India.
5. Kiei ki jait lynti synkien kiba don ha ri India ?
6. Kiei ki jylla kiba don shaphang shatei lam mihngi ka ri
India ?

7. Jer kyrteŋ ia ki jingthung jingtep bad ia ki Par ba kong-san ba ŋi shem ha ki Jylla shatei lam mihŋi ka ri India ?
 8. Jer kyrteŋ ia ki jaitbyuriew baroh kiba don ha ki Jylla shatei lam mihŋi ka ri India.
 9. Thoh katba phi tip shaphang kine : Gauhati, Imphal, Kohima.
 10. Jied ia ka jubab kaba dei :—
 - (a) Ha ka snem 1971 ki briew ha ri India ki don kumba (i) 44 klur (ii) 55 klur (iii) 70 klur.
 - (b) Ka tnad jong ka lynti rel kaba leit sha Silchar ka khlad na (i) Gauhati (ii) Rangya (iii) Lumding.
 - (k) Ia ka Umphniang Petrol ŋi ioh na (i) Assam (ii) Nagaland (iii) Meghalaya.
 - (d) Ia u maw silimanite ŋi ioh na (i) Maupur (ii) Mizoram (iii) Meghalaya.
 11. Pyndap ia ki jaka basuda :—
 - (a) Ka ri India ka ioh jinglailuid ha ka ———.
 - (b) Ha ka snem 1971 ki jingri ha ri India ki don kumba——
 - (k) Don ——— tylli ki Zone jong ki lynti rel ha ri India.
 - (d) Ki madan bah ka wah Brahmaputra bad wah Surma ki don ha ——— .
-

Santa Fe Central Library
Governments of the State of New Mexico
Albuquerque, N. M.

KI JINGPYNBEIT

- page 7, lain kaba ar na kaba khadduh: pule
"1 cm = 100 cm" ha ka jaka "1 cm = 1000 cm"
- page 38, lain kaba ar na kaba khadduh: pule
"Lum Didum" ha ka jaka "Lum Dihum"
- page 43: Ka khana ha khlieh ka page ka dei ban don hadien
ka Kshaid U Ren ne Kshaid Shyngliar.
- page 48 (3): Pule kumne:— Ka surok na Shillong sha Dawki:
Ka iaid lyngba ka Pomlum, Myllem Umtyngngar, Lait-
lyngkot, Pynursla, Mawshun, Umsyiem sha Dawki.
- page 58: Ka dur jong u Lum ka dei U Lum Kyllang.
- page 65 No. 9 (b): Pule "Ki Jingthung ha ri Nongphlang ne
ri Lum Pdeng".
- page 72, Jingkylli kaba 9: pyndap shuh sa ki ktien "ne Ri Lum
Pdeng" hadien ka ktien "ri Nongphlang".
- page 73 Jingkylli No. 16 (k): Pule wah Rwiang ha ka jaka wah
Rwaing.
- page 73, Jingkylli No. 16 (d): Pule "Tyrsung Nonglang" ha ka
jaka "Tyrsung Nongstoin".
- page 95, Ha khlieh jong ka page pyndap kumne:
"3. Ki bynta ba kongsan ka Mariang:—"
- page 95, 3(4): Pule "Ki Lum Madan shaphang sepngi "ha ka
jaka "ba shatei".
- page 98, No. 8: Ia kine ki iew pule kumne:—
Iew "Ampatigiri" ha ka jaka "Ampatigri"
Iew "Baghmara" ha ka jaka "Baghmar"

*Ki nonghikai kin sngewbha ban pynbeit ia kitel ki jingbakla
ha kaba sdang ka snem*

KI KOT DA U P. T. MARWEIN

1. Ka Geography na ka bynta ki Skul Primary Rs. 6.00
2. Meghalaya Hand Book(Ha Press) (approx) 8.00

Kan mih lehse ha u bnai March 1981.

Don lai tylli ki bynta ha ka Kot. A glimpse on Meghalaya, Shillong Guide bad ka Who's Who. Ka Kot kan myntot shibun na ka bynta ki Samla pule, ki Samla wad kam, ki nonghikai, bad ia kiba bun kiwei pat. La thoh ha ka ktien phareng kaba suk bha ban sngewihuh.

Lah ban ioh ia kitei ki Kot na Synod Book Room bad na kiwei pat ki jaka die kot. Lah ruh ban ioh na I L. Ropmay, "Warphlang", Garikhana Road, Shillong 793002.

KI KOT THYMMAI U REV. T. RODBORNE

1. U KHASI (Dor: Rs.12) La iathuh nangno u wan. La jer palat 40 tylli ki jait ktien ba la kren hapoh Ri Khasi, bad palat 3000 ki jait ki khong kylleng ka ri.
2. KI KHANATANG NA RI WAR (Dor: Rs. 12): La iathuh shaphang ka Hima Arphewlai shnong hyndai na kaba la mih ka Confederacy Shala La iathuh ruh ia ki Dustur bad ki Riti ki War naduh hyndai haduh mynta.
3. U MYNSIEM BAKHUID HA LA JINGTREI (Dor: Rs 8): La kynshew 15 tylli ki Jingiathuhkhana shaphang ka Jingtrei U Mynsiem Bakhuid ha ka Balang bad ki briew. Ki jingkren kiba naduh ka snem 1938 haduh mynta.
4. KI SERMON SYNOD BAD ASSEMBLY (Dor:Rs 10): La lum lang 15 tylli ki Jingiathuhkhana bad jingkren subject ha ki Synod bad Assembly.
5. U NONGBAH KHALA: Ka kot ka ban sa mih shen. Lah ban ioh na I Mrs. H. Rodborne, 'Warphlang', Garikhana Road, Shillong bad na Synod Book Room.

Dor: Rs. 6.00